

ASO LUA, 19 MATI 2024

Na nofoia e le Fofoga Fetalai le Nofoa i le itula e 9.33 i le taeao.

Tatalo.

FOFOGA FETALAI: Ou te faasilasila atu ua amatalia nei Taulumaga a le Fono Aoaofaitulafono.

TUUINA ATU O PEPA

Na tolaulauina e le Failautusi i le Fono Aoaofaitulafono le faasologa o Pepa e tusa ai ma T.T.49(2).

1. P.P.2023/2024, Nu.155 Tali a le Malo i le P.P.2023/2024, Nu.87 Lipoti a le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae i le P.P.2023/2024 Nu.16, Lipoti Faaletausaga a le Matagaluega o le Palemia ma le Kapeneta mo le Tausaga Faaletupe 2021/2022.

Ma le faaaloalo lau Afioga.

FOFOGA FETALAI: Ou te muai faatalofa atu i le mamalu o le tatou Palemene i lenei taeao fou, i le afio o lau Afioga i le Tamaitai Palemia, afio foi lau Afioga i le Sui Palemia, afio a outou Afioga i Minisita o le Kapeneta, faapea foi a outou Afioga i Minisita Lagolago.

Afio lau Afioga i le Taitai o le Itu Agai aemaise foi lau Afioga i le Sui Taitai faapea foi sui usufono mamalu uma o le Palemene.

E le faaititia lava le agaga o le faafetai i le Atua i Lana tausiga a o feagai ai le tatou Maota ma fonotaga faaumiumi. Malo le folau, malo le soifua manuia ma le lagi e mama.

Le paia i Ofisa Sili o Pulega o Matagaluega ma Faalapotopotoga Tumaoti a le tatou Malo, faamalo le usu i lenei taeao fou.

Le tapuaiga a Samoa o lo o faafogafoga mai e le gata i Samoa nei ae faapea foi i soo se tafa o le lalolagi i ou paia faalupelupeina, matou faatalofa atu i lenei taeao fou. Tapuai maia ma le manuia.

Le alofaiva o le tatou Maota i lenei aso ia agalelei le Atua ma faa-tofa mai le lagi lo outou finagalo. Ia manuia le usugafono a le Palemene manuia foi le tapuai mai a si o tatou atunuu.

ILOILOGA O LIPOTI A KOMITI FAA-PALEMENE MA TALII A LE MALO:

FOFOGA FETALAI: E tusa ai o le faasologa o Lipoti a Komiti Faa-Palemene ma Tali a le Malo o lo o i le Pepa o Galuega, o Lipoti muamua e tolu (3):

- 1) P.P.2022/2023 Nu.154,
- 2) P.P.2022/2023 Nu.106, ma le
- 3) P.P.2023/2024 Nu.156.

faatasi ma Tali a le Malo, na faagasolo le iloiloga i le aso fono 15 Mati 2024 ma ua faaauau i le taeao nei.

FOFOGA FETALAI: E tolopo Tualumaga i le aso fono 15 Mati 2024, o lo o saunoa faamalamalama le Afioga i le Minisita mo Aoga, i nisi o mataupu sa laga e sui usufono mamalu.

O le mea lea ou te tapa lau Afioga i le Minisita mo Aoga mo lau saunoaga faaauau, e talifuaitau i mataupu sa laga e sui usufono mamalu.

Lau Afioga i le Minisita.

Afioga Hon SEUULA IOANE (Minisita mo Aoga): Ou te muai faatulou atu i lenei vaega o le aso. O lea ua uma ona saunoa lau Susuga i le Taitai o le Maota Fono aua le tatou talosaga i le tatou vatapuia ma lo tatou Atua. O lea foi la ua uma ona toto le niu teevao ma togi le soi o le tuaoi aua lo tatou vatapuia ma lo tatou Atua. O lea foi ua fofola le fala o le taulafoga ma ou te talitonu ua atoa lava tupe o le taulafoga i le taeao nei.

Lau Afioga i le Fofoga Fetalai, ou te fia faaaogaina se vaega o le gagana mai le faiva o le malofie. Masalo e tofua lagona uma lava e sui usufono o lo o laeiina le laei a Samoa le uiga o se tau faamatalatala atu.

O le taotoga ananafi a o lea o le a sauni e toe taoto nei, o le vaega sili lea ona e fia faalogologo i ai o le sosooga o le ta, e le gata e maini ae fofo ai foi le mageso o le manua i le taimi ua te'a.

Lau Afioga i le Fofoga o le Fono, ua mafua ona ou amata i le itu lea ou te fia momoli le agaga faafetai ma le faamalo i Sui o Komiti o Aoga ona o le Komiti o Aoga lea na gata ai lau tala talu ai. O lea foi la ua ou manao e toe amata ai, i le alaala ma papaaa ma e'e mai i fanua le tapuai faafofoga mai a tupu ma e'e o le tatou atunuu o i latou sa galulue i totonu o Komiti o Aoga i le tauatiaeina o Komiti o Aoga. E le gata o Sui o Nuu, o Sui o Komiti, e i ai foi nisi Komiti o Aoga ua latou faaaogaina le itupa o Susuga i Faafeagaiga. Ia, o le mea lene lea ou te faamalulu atu ai ne i avea foi se tala ma se upu e lape ai le gagana.

Lau Afioga i le Fofoga o le Fono, ae le i amataina ia le faamatalaga i le Komiti o Aoga, e muamua ona ou momoli le faamaisega e tauala atu i le Matagaluega o Aoga ma Aganuu i le tuua ai o le Malo e le Afioga ia Seiuli Paul Wallwork ona o se tasi lenei o poututoa o le tatou atunuu ua loa lona soifua i totonu o le Matagaluega o Aoga. Sa faiaoga, sa taitai aoga, o ia foi o se tasi o poututoa ua le gata i aoga a le Malo a o aoga foi a Ekalesia. Ua tuua nei le Malo ae o lo o faaauau lava e lona alo lana miti sa fai e auauna pea i le atunuu e ala i aoaoga

aemaise o taaloga. Ia faamaise le Atua ma agalelei le Atua, ia foai le lototele i le tina ma le nofoa a alo a o feagai ai i taimi o faigata.

Lau Afioga i le Fofoga o le Fono ona ou toe foi mai lea i le Komiti o Aoga. E le i leva nai tausaga na tuuina atu ai i tua le Pulega o aoga e vaai e tatou alaafaga ma nuu i tua ma itumalo. O i ina na faamalosi ai le auai mai o sui taitasi ua le gata o matai, o tina, o faifeau e lavea i totonu o Sui o le Komiti. Ae tasi le tagata o le Matagaluega e lavea i le Komiti lea, o le pule aoga ona ta'u loa lea o Faalapotopotoga uma nei o le Komiti o le Aoga e pulea le aoga. E le mafai la lau Afioga ona faitoatasi le matafaioi a le pule aoga seiavagana ua soalaupule lelei ma sui o le nuu i le agai i luma o le Komiti. E oo foi la i le Komiti, Sui o Nuu e le mafai ona faia sa latou pule toatasi se i vagana foi ua soalaupule ma galulue faatasi ma le susuga i le pule aoga ona faatoa gaioioi ai lea.

Ua fautua mai le tatou Komiti o le Vafealoai se i toe tilotilo lava le Matagaluega e toe faamaati ma toe faamaoti matafaioi a le Komiti o Aoga ina ia sologa lelei. Ua lagomau mai tiasa ma ua taoto mai tia nisi o tupu ma tamalii o le atunuu sa latou galulue i lenei vaega aemaise foi ulu aoga. Peitai ua loa taimi ma ua fesui ai foi faiga ua i ai foi nisi Komiti fou, o nisi ulu aoga fou o lea ua ofi mai i totonu o le Komiti lea ma ua talafeauga lelei le fautuaga o le a toe faamaoti ia ma toe vaavaai matafaioi a Komiti ina ia mautinoa le saogalemu o le latou nonofo ai.

Lau Afioga i le Fofoga Fetalai, o lau tala lea e masani ona ou fai i ulu aoga. ulu aoga e leai lava sau uo sili ona latalata ia te oe e faigofie ai au galuega e pei o le Komiti o le Aoga. A lelei le va o faiaoga, pule aoga ma le Komiti o le Aoga o le a faigofie ona faatamoe le aoga agai i luma i nisi mea. Paga lea lau Afioga i le Fofoga Fetalai, e i ai nai isi aoga ua oo mai sa latou faasea i le Matagaluega. Ia, e pei lava ona tau foufou atu i le taimi ua sola masalo ua nunu le falute ma ua le ogatasi foi le futia ma le umele ua mafua ai ia tulaga. Ae faafetai i le fesoasoani mai, ia o lea foi la ua a'e ai se tofa ma se lagona i le Matagaluega e toe faafou ana faiga faavae ma mulimuli pea i tulaga pei ona faataatia mai ai.

Lau Afioga i le Fofoga o le Fono e i ai mataupu a le Iunivesite, lea o le a ou oo atu i ai muamua sa laga mai e nisi o sui usufono o le tatou usugafono. E ui lava ua uma ona saunoa ma faasoa foi i le simulator, ia ou te iloa e na o sina taimi laitiiti lava ou te pa'i i ai. O le tatou fale lea i tai sa faapea e fuafua e fai ai le Aoga a Seila ia o i ina la lea sa i ai le manatu e aumai le tatou masini tele lea e tuu i ai i totonu. Peitai e aumai le size o le masini ua uma ona fau le fale e le taitai ofi ai i totonu, o lona uiga e toe talepe atoa i lalo. O lea na faataatia mai ai ma tuu le ofo se i tau tuu i lalo le size o le masini lea ia fetui ma o tatou fale. Lau Afioga, ae lavea loa tatou i le Koviti-19 ma faamai, poloka ai loa i ina e oo mai lava i le taimi nei e le o mafai lava. A o la e ua tilotilo i ai le Iunivesite i lana Tala Faaopoopo o le Tupe 2024/2025 ina ia fesoasoani e faataunuu mai se tatou masini lelei lea. Atonu foi o se isi vaega taua lea mo le agai i luma o alo ma fanau a si o tatou atunuu i le matata o seila ina ia i ai se tatou masini lea pei ona afea i finagalo.

Sa matou asiati atu i Fiti ma le Afioga i le Minisita o le Soifua Maloloina ma le Minisita o Tupe i le taimi... na ave lea o matou e faamatamata i le Fiji

Airways. O le mea muamua lava na ave i ai matou, o le ave i le mea la e i ai simulator. Na matou o ai i totonu, ia o le matuai vaalele atoa lava le mea lea ua matou i ai i totonu faagaioi mea uma. O le Afioga i le Minisita o ia lea le isi pailate sa aumaia le matou vaa ma matou sese'e i Faleolo ma matou toe fo'i i Fiti. Ia, ona matou o foi lea i le vaega e nonofo ai pasese, o se matuai aoaoga lelei ma e mautu lelei. E matou te omai masalo toetiiti lava masani le vaega lea i ki o le vaalele, ae o tatou lea e leai se tatou vaalele. O lea la e tau aumai se tatou masini lea e faaoga i tatou vaa ina ia fesoasoani i alo ma fanau, le au seila.

Sa fesiligia e se tasi sui usufono o le tatou Maota lau Afioga i le Fofoga Fetalai le leitio po o le TV a le tatou Iunivesite pe ua i ai se latou commercial license. Lau Afioga....

Tofa LEALAILEPULE Rimoni Aiafi (Faleata 3): Lau Afioga i le Fofoga o le Fono...

Afioga Hon SEUULA IOANE: O lea ua i ai, ua faa-commercial nei le tatou TV a le tatou Iunivesite...

FOFOGA FETALAI: Malie lava lau Afioga i le Minisita se i tuu atu le avanoa ia Faleata 3. O se mea na afea i lau lauga?

Tofa LEALAILEPULE Rimoni Aiafi: Le mea tonu lava lea lau Afioga i le simulator lea ua oo i ai le saunoaga, leaga o lea o le a se'e ese ai.

FOFOGA FETALAI: Ia saunoa.

Tofa LEALAILEPULE Rimoni Aiafi: Faafetai lau Afioga mo le... E faatalofa atu foi i le paia o le tatou aufono i leni taeao fou.

O le faafetai lau Afioga i le Minisita i le mataupu lea. A o lau fesoasoani pe a tau ane ai le... o mea nei o simulators ae aemaise i inei lava ia i mea tau kamupani vaa, e tele ina fai i atunuu foi ia i fafo e mamao ma le sami. A o tatou, o lea lava e fai i luga o le sami. O lea ou te matau sa i ai vaa ia na faatau mai Toelau, vaa ia na faatau mai taugofie, e i ai foi vaa ia lea e saunoa le Afioga i le Minisita o la e tu i Savaii. Ou te talitonu o vaa nei e tatau ona faaoga, aemaise o lea e i luga o le sami, e feoai atu i Savaii ma omai ma fai ai aoga a le fanau i le taimi nei. E le tau faatalia i le masini lea. Ia ma le faaaloalo lava. Faafetai.

FOFOGA FETALAI: Tulai mai lau Afioga i le Minisita. Malie lava mo le faasaoina o lau Afioga i le Minisita, tulai mai le sui usufono mo Safata 1.

Afioga LEAANA Ronnie Posini (Safata 1): Faafetai tele i lau Afioga i le Fofoga Fetalai. E tasi foi lea mea sa oo i ai se tala a leni itumalo o le simulator lea, ae faafetai tele i lau Afioga i le Minisita ona o lea ua matau atu, o lea foi ua faitau atu i Tali a le Malo o lea e manino. A o le matou lea tuualalo atu i lau

Afioga aua o lea e faitau atu ua tolu nei tausaga i le fa tausaga o talia le simulator lea, o lea foi ua i ai le faafitauli, a o le mea e ave i ai le faamuamua a le tatou Malo. Ae talitonu a saili tupe a le tatou Malo i manuia o aiga i alo ma fanau nei, ua matua manuia ai lava o tatou aiga. E pei foi ona fai atu o le aoga lea, na pau lava lea o le aoga e aumai a latou silapasi o latou aoga e aumai faava o Malo lea e aoaoina ai. Tatou te faafetai ai foi la i le tatou Malo ona o lea e mafai ona fai le aoga lenei, ona o lea ou te matau sa fai e Tonga le aoga lea, ae ua le gafatia e Tonga ua toe aveese le aoga lea a Tonga, a o lea e fai lava e le tatou Malo ona e faataua le tele o lona taua. Ma le agaga faaaloalo.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon SEUULA IOANE: Ia, faafetai lava i le finagalo foi ua faailoa. Ou te manatu o le faamausaliina lava o le faamoemoe e pei ona agai atu le tatou Malo e faataunuaina. O lea ua mautu ma ua tapena foi ina ia faataunuaina ia faamoemoega lelei, ae faafetai tele lava mo le faamanatu. O lea foi ua faafogafoga mai le Pulega a le Iunivesite i vaega taua e ave i ai le faamuamua ma le mea e faasolosolo lemu i ai.

Lau Afioga i le Fofoga Fetalai, ona ou oo mai lea i se tasi o sui usufono sa ia saunoa i le siitia o le tologi o le tupe ua alu faaletausaga a le Iunivesite mai le taimi tuanai e oo mai le taimi nei. Lau Afioga e lua lava auala e mafua ai ona siitia le tupe faaaogaina, ua sii tologi o faiaoga.

Lua, ua faaoga e le Iunivesite ana ia lava teugatupe e fesoasoani e faatamoe ai le Iunivesite, ae a uma loa le piriota, ona toe foi mai foi lea e avatu se tupe a le Malo. O le mafuaaga lena e mafua ai ona siitia i luga. E le gata i lea, i totonu o le Iunivesite, ua le gata ua faaopoopo polokalame e aoao ai tamaiti aoga, a ua faaopoopo ai foi ma faiaoga. O lona uiga, o le tulaga lava lea e tataua ona oo i ai le vaega lea tau aoaoga. Ia pei o se tali atu lea i lea faafesili.

Sa afea e se tasi sui usufono o le tatou... le tulaga lea e tataua ona vave faailoa sikolasipi a le tatou Aoga a le Iunivesite. Lau Afioga i le Fofoga Fetalai, o le vaiaso muamua o le resitala, na tuu le avanoa e talosaga mai ai tagata sikolasipi foi ia faa-TVET i tua atu o mea tau aoaoga. O le vaiaso lona lua tatala le avanoa e talosaga mai ai sikolasipi a le Ofisa o Aoga ona amata loa lea o le tatou galuega, ma o lo o sologa lelei lava ia fuafuaga i le taimi nei.

Susuga Hon TUILAEPa Fatialofa Auelua Sailele Malielegaoi (Taitai o le Itu Agai): Lau Afioga i le Fofoga Fetalai...

FOFOGA FETALAI: Malie lau Afioga i le Minisita. Lau Afioga i le Taitai o le Itu Agai.

Susuga Hon TUILAEPa Fatialofa Auelua Sailele Malielegaoi: E fesoasoani atu i le Afioga i le Minisita. Faafetai o lea ua faailoa mai e amata i le amataga. A o le mea lea matou te maua, faatoa sau le faasalalaua ia Iuni faalauitele i luga o le TV. Ae i ai le itu taua o le vave faalauiloa, ou te le tau

talauina lea vaega, ona e taua tele mo matua latou. Ae masalo e aafia uma ai lava tatou, le feoi solo o matua ia i tatou o sui usufono i le tulaga o pili aoga. Ia o lea ua laveai tupe ia e avatu i itumalo. Ae mo le silafia o lena foi e i ai sikolasipi a le tatou Iunivesite, ae lelei foi ona faalauiloa faalauaitele aua masalo po ua lua nei tausaga ou te matauina faatoa sau lava i le masina o Iuni ou te tilotilo i luga o le TV ma ou matauina mai ai.

Ae faamalo, afai o le tulaga lea, ua taua tele i le matou faalogologo atu.

FOFOGA FETALAI: Tulai mai lau Afioga i le Minisita e faaauau le saunoaga.

Afioga Hon SEUULA IOANE: Faafetai i le Taitai o le Itu Agai mo le tau faailoaina o itu ia. Ae ou te talitonu o le polokalame faataatia lava lena a le Iunivesite o le vaiaso muamua ma le vaiaso lona lua, o le vaiaso lena e tatau ona resitala ai i latou uma o ē e fia aoga faasikolasipi i totonu o le tatou Iunivesite.

Sa fesiligia foi e se tasi o sui usufono o le tatou usugafono le mea lea o le Digital Library a tatou. O le tausaga na tea nei 2023 na sainia ai ma faamauiina ua i ai i totonu o le tatou library tatou i Samoa le ituaiga faletusi lea e faaaogaina ai auala faatekonolosi faaonaponei, o lea ua i ai.

Sa afea foi i fuafuaga ma nisi finagalo o le tatou usugafono i nisi lava itu mo le faaleleia o le tatou Iunivesite, e le gata o togi e mafai ona ulufale ai tamaiti i totonu, o lea foi ua tilotilo i ai le Pulega a le Iuniveiste ina ia mafai ona faatosina mai tamaiti ia toatele tamaiti, e le gata lava i matata eseese ae o le itu lava lea faafaiaoga. E pei foi ona tau afea foi i finagalo o lo o i ai se faatalatalanoaga a le tatou PSC ma le Ofisa o Aoga ina ia toe tilotilo lava i le itu lea, ina ia le gata ia ausia e tamaiti i a latou suega togi e tatau ona ulufale ai i le tatou Iunivesite, ma toatele ai nisi e mananao e fia faiaoga. O lo o i ai foi le naunautaga i le Ofisa o Aoga ina ia saga faasalalau pea ma faalautetele ana faalauiloa ina ia faapena ona uunaia ai tamaiti e galulue i le itu lea o le itu faa-faiaoga.

E i ai le talitonuga sa fesiligia foi ma fautuaina e le Komiti o le Va Fealoai le itu lea tau i le siitia o maka o tamaiti aoga. Ua matauina ma ua faamauiina e le tatou Matagaluega, ma o se itu lelei foi lea. I lenei taimi, o lo o matua galue lava le Matagaluega i le itu lea, ona o lo o i ai lava le talitonuga o le Matagaluega e le o agai i luga iuga o suega a tamaiti, o lea lava e faapepepepe lava i le tulaga lea ua i ai nei.

Peitai o le tausaga lea na tea nei lau Afioga i le Fofoga Fetalai ma le mamalu o le tatou usugafono, ou te fiafia e faailoa atu, o iuga o suega i le tausaga lea na tea nei i le mea e masani ai, na o tamaiti lava e aoga i le taulaga e maua togi maualuluga. A o le suega i le tausaga lea na tea nei ua oo mai togi, ua mafai ona maua mai tua i Falealili ma Savaii ma isi vaega o le tatou atunuu tamaiti ua ausia togi pito sili ona maualuga. O se itu lelei lena.

O le isi foi itu, o le vaega lea a alii. E pei lava o le taimi masani ai e fao lava e tamaitai le tulaga lea, a o le tausaga lea na tea nei i le tilotilo ina ua faatulaga togi ma iloa ai, a'e ua alu a'e foi i luga le pitolaau a alii latou. O se itu lelei lea ina ua i ai foi se finagalo i le Matagaluega i le tausaga e 2022 sa o atu ai i tua

le Matagaluega ma faailoa atu i itumalo ma faafesili atu i itumalo po o le a so latou sao e fesoasoani mai i le pagatia lea e feagai nei ma le Matagaluega. Na matou o ma ave maka, faailoa i itumalo maka o latou tamaiti, ia ma tuu atu e aumai so latou finagalo ma avatu foi i ai le matou musumusu i le pulega a alii ma faipule, le aiga faifeau ma faafeagaiga matou te manaomia lo outou tauau, ua le lava faiaoga, matou te manaomia le tatou galulue faatasi. Matua, toaaga e fesoasoani ane e fai meaaoga a tamaiti ae faapena foi ona fesoasoani i le faiga o feau ae tuu tamaiti e fai meaaoga. E tasi lena auala e mafai ona siitia ai i luga togi o tamaiti, ia faaopopo i ai ma le mau auala e tele o lo o tapena e le Matagaluega, koleni faiaoga, faafou metotia ina ia faapena ona siitia ai aoga i totonu o si o tatou atunuu. Digital library, lea ua i ai. Faafetai tele.

Sa saunoa foi se tasi o sui usufono i le tuufaatasiga o tatou Iunivesite e lua o Alafua ma le NUS. I aso ia, o le igoa o le Iunivesite a tatou lea e i Alafua, Alafua Campus. I le taimi lenei, Samoa Campus, o lea ua tuufaatasi, ua uma ona sainia le MOU e le Pule o le tatou Iunivesite Aoao i Alafua ma le Pule o le tatou Iunivesite i le Papaigalagala, o le a galulue faatasi. O a mataupu e ono fai i ai le fetufaaiga ma fesoasoani mai ai le isi Iunivesite i le isi Iunivesite, o le auala lena o lea o le a tatou galulue ai.

Ia faafetai foi i le finagalo ua faailoa ua mafai ai ona silafia e lenei Maota Fono laasaga ua agai i ai tatou Iunivesite nei e lua, ma o le agaga maualuga ina ia faatuputupulaia pea le naunau o tatou alo ma fanau e auai i tatou Iunivesite. O le tele o taimi, fai mai isi tagata, matou te fia sikolasipi i Niu Sila, ou te fia alu i Ausetalia, a o lea lava e i ai avanoa lelei e mafai ona fesoasoani tele mo tatou. A o ou i ai i le vaega lea lau Afioga i le Fofoga Fetalai, ou te matua faafetai i Fono Faavae, aua e pei o aoga lava ia e lua o lea ua matuai momoli mai le latou faamalo ma le faafetai i le tele o tamaiti aoga ma pili tai \$1,000+ ua mafai ona totogiina e Fono Faavae.

O le mea foi lea e avea ai foi lenei laolao e faaofi atu ai se leo o le Matagaluega o Aoga i le Iunivesite, faafetai i Taitaifono, faafetai i Sui Taitaifono ma le mamalu o laulau a Fono Faavae taitasi, o i latou o lo o amanaia le itu tau aoaoga. E i ai foi lou talitonuga e le gata i le Iunivesite, ae faasolosolo lava seia oo lava i lalo i aoga Pre Schools ma ECEs. O le mea lea e momoli atu ai tele le faafetai ma le faamalo.

Lau Afioga i le Fofoga Fetalai, sa i ai se tasi fautuaga a le Komiti fai mai e faaolaola mea ia o taaloga faaleaganuu. Ia, lau Afioga, e le o faapea o lea lava e tau faaolaola...

Susuga Hon TUILAEP A Fatialofa Auelua Sailele Malielegaoi: Lau Afioga i le Fofoga Fetalai e i ai lava si mataupu lea...

FOFOGA FETALAI: Malie lau Afioga i le Minisita. Se i tulai mai lau Afioga i le Taitai o le Itu Agai.

Susuga Hon TUILAEP A Fatialofa Auelua Sailele Malielegaoi: I le tulaga lea e maua mai ai tatou sikolasipi mai Niu Sila ma Ausetalia, lea tatou te matauina ma le totoa o lo o agai pea i lalo sikolasipi nei. Masalo e tataua ona

tatou finafinau pea i le agai i luga o sikolasipi. Afai o se manatu lea e agai i lalo le o atu o tatou tamafanau ae fesoasoani mai e aumai le seleni e fesoasoani i le tatou Iunivesite, o se mea lelei, ae lelei le fai uma o mea e lua, tuu i luga tatou sikolasipi ma faaauau pea le aumai o fesoasoani i le tatou Iunivesite. Na o se fautuaga. Afai tatou te le finau, e leai foi se tali e aumai e Niu Sila ma Ausetalia. E tele aso ua tuanai sa faataoto mai ai le anoano o mau manoa, ae sa mafai lava ona tatou finau ma talatala malie mai tulaga ia o le avatu o tatou sikolasipi i Niu Sila ma Ausetalia, aemaise lava le vaega lea e aofia ai Inisinia, o Loia, e matua moomia lava le maualuluga o sikolasipi i Niu Sila, ae taatia ai isi sikolasipi mo tatou tamafanau e le mafai ona ausia le maualuga lea e faatulaga mai e latou i Niu Sila ma Ausetalia.

FOFOGA FETALAI: Tulai mai lau Afioa i le Minisita e faaauau le saunoaga.

Afioa Hon SEUULA IOANE: Faafetai i lau Afioa. Ou te iloa e le o au o le Minisita o lo o i ai mea ia tau sikolasipi i fafo a tatou. Peitai, na ou alu i le fono a aoga i Niu Sila ae alu ane ai le Minisita o Aoga a Niu Sila matou talanoa ma faasoa la i mea ia o sikolasipi. Ia, ou te manatu atonu e aoga foi i a tatou ma ē o lo o faalogologo mai o si o tatou atunuu. I lau matau i ai, e ausia loa e le tamaitiiti maka maualuga, e tasi lava le mafaufau o le matua e sikolasipi. E aunoa ma le manatu, e tele isi mau auala eseese faatoa mafai ona uia. E i ai isi taimi e le alu ai i le tagata lea e sili le sikolasipi ae maua e le tu tolu po o le tu lua. Ae te i ua fai mai le tamaloa lea sa ma talanoa e mafua mai i le taimi o le interview. E tele auala eseese e ono fesoasoani ai e faatumau ai le tagata e nofo ai i Niu Sila po o Ausetalia, ia pe le mafai foi ona nofo. Ia, pei o nai vaega na ina ia aveese mai o tatou mafauaoga faa-matua. E tele loa maka ua ausia e alo ma fanau tasi lava le mafaufau ia ua onomea ona alu e sikolasipi. O se itu lelei but e tatau foi ona tilotilo i isi itu i autafa ina ia ausia tulaga uma o lea itu. Ae faafetai i lau Afioa ua ou faamauina le taua o le vaega lea mo tatou. Tatou te manaomia tele aoaoga mai isi matata o le tatou atunuu e fesoasoani e atinae ai le tatou atunuu.

Lau Afioa i le Fofoga Fetalai, sa saunoa se tasi foi o sui usufono i le meaalofa lea a le malo o le OGG - One Government Grant ma faailoa fai mai e tatau ona vave ave i tua ina ia mafai ona faaoga i le tausaga nei ua alu. Lau Afioa, o le taimi a o ou faiaoga foi au ia, o le tele o taimi e masani ona sainsi ai a matou grant i ia tausaga ua alu, o se vaega o Iuni, Iulai e oo lava ia Aokuso pe a faifaiaga. A o le taimi nei i le tausaga nei, na amata ona tapena le sainiga i tua i le masina lea na tea nei. O le taimi la lenei, o la ua i ai uma lava i tua tupe a le tatou aoga ua faamatuu atu e le Malo ina ia galulue ai mo... Ua le gata o le faatinoga o totogi o faiaoga ae o le faiga o meaaoga a tamaiti ona o lea foi ua amata le tausaga. Ma o se taimi sili lenei na puupuu lau Afioa i le Fofoga Fetalai i le kalena faaleaoga. Ua uma ona seti le fuafuaga e oo atu... e le i oo atu i le fono lea a tatou ia Oketopa ua uma ona cover uma silapasi a tamaiti aoga ina ia aua ne i toe faalavelave i le taimi lea ona e ono tuua aoga ae faaoga

le aufaigaluega i nisi fuafuaga faale-Malo. Ia, pei o se vaega taua lea i lea foi vaega lea ua taatia atu.

E i ai nisi aoga o loo tuai pea ona aumai a latou Lipoti ma o se vaega sili foi lea na faigata i le taumafaiga a leMatagaluega aua e le mafai ona faamatuu atu pe afai e le manino ona lipoti mai tupe na avatu. O tupe, e le o ni tupe a le Matagaluega o Aoga, o tupe a le Malo. O lona uiga, e moomia foi e le Malo tala autu ma tupe ia vave mai. O le vave mai o le vave atu foi lena.

Lau Afioga i le Fofoga Fetalai, masalo ua... ua aafia uma mataupu sa laga. Ae o lenei taimi ou te momoli tele atu le faafetai i le Taitaifono o le Komiti o le Va Fealoai e tusa ma la outou sailiiliga. Aua ana le... O le lelei o la outou sailiiliga e le mafai ona atagia nei fuafuaga o lo o nonofo ma le Matagaluega o Aoga aemaise le tatou Iunivesite. Ou te iloa o se faamaite lelei ma ou te faafetai tele, ma o le a taumafai e faataunuu ma tali mea uma sa outou fautua mai ai a o alo le tatou atunu i le atinaeina o si o tatou Malo.

Lau Afioga i le Fofoga Fetalai, ia ona manatu lea faapea o le a alo ia i fanua le vaa, o lea ua ali fanua a lalo ma ua vaavaai atu i fanua lanulauava o si o tatou atunuu. Ia viia le Atua ua faataunuuina ma le manuia fuafuaga e le gata o le Komiti a o le Matagaluega o Aoga ma le tatou Iunivesite. O le mea lea e momoli atu ai le faafetai tele i le avanoa lau Afioga e sei fai se faafetai i le aufaigaluega i faiaoga, o le Pulega a le tatou Iunivesite Aoa aemaise le tatou Iunivesite i Alafua, a o le Matagaluega o Aoga, lau Afioga i le Ofisa Sili o Pulega ma lou Ofisa, ia o faiaoga, o asiasi aoga, o tamaiti aoga. Tatou galulue. O le upu a le Tusi Paia, “tatou galulue manu o ao a oo mai le po, e na o le moe lava le mea e fai.”

Lau Afioga i le Fofoga Fetalai, manuia le fonotaga o lenei aso. Faafetai.

FOFOGA FETALAI: Ua faamalo malele malo saunoa foi i lau Afioga i le Minisita o Aoga. E talitonu foi o lea ua faafofoga ma le manino le paia o le Maota aemaise foi o nisi itu taua e pei ona lagalaga, o se tuualalo foi aemaise o le faalaeiauina o le Matagaluega pei ona fautuaina e le maota. O le mea lea faafetai. Faafetai mo le saunoaga malamalama. O lea foi ua manino mea uma e tusa o le Tali a le Malo i fuafuaga pei ona fautuaina e le Komiti. O le mea lea faafetai malo lava le tapena.

Tulai mai lau Afioga i le Taitaifono mo le lafo.

Tofa ALE VENA ALE (Taitaifono o le Komiti o le Va Fealoai): Ou te ofo alofa atu ma faatalofa atu i lau Afioga i le Fofoga Fetalai i lenei taeao. Le paia foi o le Palemene aemaise o le tapuaiga a le tatou atunuu, soifua manuia i lenei taeao. Ae le i faatuina le lafo lau Afioga i le Fofoga Fetalai, ia e momoli atu le agaga faafetai i le saunoaga matagofie a le Afioga i le alii Minisita. E le gata foi i lea ou te fia momoli atu le agaga faafetai i Ofisa Sili o Pulega o Matagaluega aemaise foi o le galulue faatasi ma le Komiti o le Va Fealoai e tusa ai ma tatou Lipoti uma lea ua i luga o le Palemene ma o lea ua matauina ua maea ona faagasolo ma ua pasia e le Palemene i lenei taeao.

Ia ou te tulai atu ma le faaaloalo tele lau Afioga i le Fofoga Fetalai ina ia faatu le lafo, *Ina ia faamaonia e le Fono Aoao Lipoti e tolu (3) e pei ona i lumamea nei o le Palemene...*

1. P.P.2022/2023 Nu.154,
2. P.P.2022/2023 Nu.106, ma le
3. PP.2022/2023 NU.156.

O le lafo lea lau Afioga ma le faaaloalo tele.

Faaluaina e le sui usufono mai Vaisigano 1, sui usufono mai Aana Alofi 1, sui usufono mai Falealupo ma le sui mai Aana Alofi 3.

Na faamaonia le lafo.

FOFOGA FETALAI: Ou te tapa lau Afioga i le Minisita mo Aoga mo le lafo o le Tali a le Malo.

Afioga Hon SEUULA IOANE: Lau Afioga i le Fofoga Fetalai, ou te faatu le lafo, *Ina ia faamaonia e le Fono Aoao Tali a le Malo i Fautuaga a le Komiti o le Vaega Tau le Va Fealoai.*

Faafetai.

Faaluaina e le Minisita mo Fesootaiga ma Faamatalaga Tekonolosi.

Na faamaonia le lafo.

4. P.P.2022/2023 NU.95, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2021/2022 NU.9, LIPOTI FAALETAUSAGA A LE MATAGALUEGA O FAAMASINOGA MO LE FAAFOEINA O PULEGA TAU FAAMASINOGA MO LE TAUSAGA FAALETUPE 2019/2020 - ILOILOGA

4.1. P.P.2023/2024 NU.95, TALI A LE MALO I LE P.P.2022/2023 NU.95.

5. P.P.2022/2023 NU.150, LIPOTI A LE KOMITI O TULAFONO TUMAU, MATAUPU TAU FAIGA PALOTA, TALOSAGA MA TOFIGA FAALE-FAAVAE I LE P.P.2022/2023 NU.129, LIPOTI FAALETAUSAGA A LE KOMISI O LE TOEFUATAIGA O TULAFONO A SAMOA MO LE TAUSAGA FAALETUPE 2021/2022 - ILOILOGA

5.1. P.P.2023/2024 NU.117, TALI A LE MALO I LE P.P.2022/2023 NU.150.

FOFOGA FETALAI: Tulai mai lau Afioga i le Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae.

Afioga AUAPAAU MULIPOLA ALOITAFUA MULIPOLA: Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Lipoti e lua (2) a le Komiti o Tulafono Tumau, Mataupu Tau Faiga Palota, Talosaga ma Tofiga Faa-Faavae o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mo Faleata I ma le sui usufono mo Gagai fomauga 2.

Na faamaonia le lafo.

FOFOGA FETALAI: Ou te tapa lau Afioga i le Minisita o Faamasinoga ma Pulega Tau Faamasinoga.

Tofa Hon MATAMUA SEUMANU VASATI SILI PULUFANA (Minisita mo Faamasinoga ma Pulega Tau Faamasinoga): Lau Afioga i le Fofoga Fetalai ou te faatu le lafo, *Ina ia faautagia e le Fono Aoa Tali a le Malo e faatatau i Fautuaga a le Komiti o Tulafono Tumau, Mataupu Tau Faigapalota, Talosaga ma Tofiga Faa-Faavae.*

Faaluaina e le Minisita mo Fesootaiga ma Faamatalaga Tekonolosi, sui usufono mo Falealupo ma le sui usufono mo Aana Alofi I.

Na faamaonia le lafo.

FOFOGA FETALAI: Ua maea faautagia e le Fono Aoa Lipoti a le Komiti pei ona ou faailoa atu faapea foi Tali a le Malo.

Ia o le avanoa leni mo se sui usufono e sausaunoa i le tatou Lipoti. Ia, tulai mai lau Afioga i le Sui Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO (Anoamaa 2): Faafetai i lau Afioga i le Fofoga Fetalai. E faatalofa atu foi ma ofo alofa atu i leni taeao fou i lau Afioga i le faafoefoeina o le tatou fonousu. E faapea foi ona faafeiloai atu i le Afioga i le Palemia ma le Sui Palemia ma le Aiga Kapeneta, e faapea foi le Minisita Lagolago, le Afioga i le Sui Fofoga Fetalai.

Ia, e faapea foi le paia maualuga o leni itu i le afio o le Taitai o le Itu Agai faapea foi Afioga i sui usufono mamalu o le tatou Palemene. O Lipoti e pei ona aumai, tasi leni Matagaluega e taua tele i le matau atu i ai ona o le latou galuega ma le pitolaau o lo o taumafai e lagolagosua ai le tatou faigamalo faapea le atunuu. O le Matagaluega o Tulafono Toefuataiga, o Tulafono po o le Komisi o le Toefuataiga o Tulafono. Ia, e tasi foi leni lala o le tatou Malo e taua tele i le latou foi galuega o le tapenaina lea o Tulafono, Tulafono Tau Faaofi, faapea foi Lipoti e fautuaina ai ni Tulafono fou po o le toe teuteuina foi o Tulafono tuai, ma aumai ai fautuaga lelei. Ia, o le manatu ma le toe vaavaai atu, a o le matou tuualalo ia silasila lau Afioga i le Minisita ma le tatou Matagaluega lea i

tatou Tulafono ma fautuaga i Tulafono foi ia... ia ogatusa ma tulaga o lo o aafia ai le tatou atunuu. O tulaga foi ma fuafuaga o mea tutupu ia faapena ona fautuaina Tulafono, Tusia Tulafono e talafeagai ma lenei foi vaitau, aemaise lava i totonu o le tatou atunuu. Aua foi o le tele o isi taimi e pei e tau vaavaai po o faapei a o le a foi se faaupuga o Tulafono i isi atunuu ia aua ne i galo ma manatua pea, e ese foi lava mea o lo o tulai mai i isi atunuu, ese foi si o tatou atunuu aemaise lava tatou i inei i Samoa ia e ese le tatou aganuu. E i ai le tatou aganuu, o tu ma aganuu faa-Samoa, o le tasi lea tulaga e tataua ona fai ma silasila i ai ona e tataua ona ogatusa aemaise lava suiga o le soifuaga mai fafo ua aafia ai si o tatou atunuu. E tataua ona silasila lelei i ia tulaga. O isi atugaluga e pei ona faamauiina i le Lipoti a le Komiti, ia e sao lelei. O lo o... e le o lava loa i le latou Matagaluega. E tasi lea mataupu e silasila i ai lau Afioga i le Minisita faapea foi le Komesina o Matagaluega lea... E le o lava...

FOFOGA FETALAI: Ua ou vaelupeina le saunoaga a lau Afioga i le Sui Taitai, talu ai o lau Afioga e i ai i totonu o le Komiti. Ia, o lea foi e mataua atu e tasi lea faasea i le tele o sui usufono o le lē Saini, ae le o i ai foi se mea o faamaui ai se tulaga i le foi lele... lau Afioga i le Sui Taitai. Ia, o le mea lea, ia tou te silafia lava o outou ia e aafia i Komiti e le faaalua ni outou finagalo ua uma ona outou fono i mea ia. O le mea lea, ia, ua faagata ai foi i i lau saunoaga lau Afioga i le Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: Leai, lau Afioga. E faamalie i lau Afioga, e pei o lou tulai atu e fesoasoani i le Taitaifono, lea ua uma ona faataatia le matou Lipoti, o le mafuaaga lea. Ae le teena lou finagalo, o lou finagalo e faafoea le tatou fono. Ia, e i ai nai Lipoti ia e le o saini ai, ae le na o au foi e le o saini.

Ae faamalulu atu i lau Afioga, ona e i ai vaitaimi ia sa malaga ai i usugafono i fafo ia e le i auai ai i sueusega o mataupu. Ae o lau faitau atu e pei o lena lea e taumafai atu ai, ae faafetai.

FOFOGA FETALAI: Ia malie...

Tofa Hon LAUOFO FONOTOE NUAFESILI PIERRE LAUOFO: Faafetai

FOFOGA FETALAI: Ioe e faapena, o tatou e matutua foi i le Maota, tatou te tausii i tatou Tulafono.

Ia tulai mai se isi sui usufono e le lavea i le Komiti.

Afioga ALIIMALEMANU Moti Momoemausu Alofa Tuuau (Sui Usufono Tamaitai - Alataua Sisifo): Lau Afioga i le Fofoga Fetalai...

FOFOGA FETALAI: Ia tulai mai le Sui Usufono Tamaitai mo Alataua Sisifo.

Afioga ALIIMALEMANU MOTI MOMOEMAUSU ALOFA TUUAU: E faatalofa atu i lenei taeao matagofie i lau Afioga i le Fofoga Fetalai ae faapea foi le Afioga i le Tamaitai Palemia ma Minisita o le Kapeneta, o Minisita Lagolago, e faapea foi lenei itu o le malu i le Afioga i le Taitai ma sui usufono uma o ē o lo o agaia le tatou Malo, ae se i fai sina tala a lenei usugafono i tatou Lipoti a le Matagaluega o Faamasinoga faapea foi le Lipoti a le Komisi o le Toefuataiga o Tulafono.

O le matau atu i le Lipoti e tele ia... e ui a ua tuai 2019/2020 e tele matati'a na ausia e ui o le vaitaimi o le Koviti-19 ae o matati'a ausia ua pito sili ona pei e taua i lou a'u sui usufono, o le tofiaina lea o le Faamasino Sili fou lea ua i ai nei i le vaitaimi tonu lava lea i le tausaga lea, faapea foi le toe tofiaina o Faamasino e toa-10 aua le Faamasinoga o Fanua ma Suafa. E pei la o se fesili lea ua tulai mai, ua faaleleia ai la le auaunaga a le tatou Ofisa o Faamasinoga le Matagaluega o Faamasinoga ina ua tele a tatou Faamasino lea ua faafaigaluegaina i le vaitau tonu a lea aua le tatou Faamasinoga o Fanua ma Suafa?

O lea foi ua faamauina ai le faasainiina o konekarate aemaise foi tausaga faatapulaa pe litaea ai le Faamasino i le 68. Ona i ai lea o se lagona o lenei usugafono i le matau atu i lena vaiaso ma lenei foi vaiaso i le lē a'ua'u o le aufaigaluega aemaise faiaoga, ae le gata o faiaoga a o foma'i. O le a se silasila ma se tofa i lau Afioga i le Tamaitai Palemia ma lena itu ina ia toe siitia le tatou tausaga litaea, lea ua 68 le i ai ia konekarate uma ia a le au Faamasino. A o so matou vaivaiga e le tataua ona sii i luga le 60 tausaga e litaea ai ona o... le 70... ae se e le o sa outou lauga o lau lauga, ia lelei.

Ia o so'u lava lea vaivaiga aua lea e iloa e faagata i le 55 ae talitonu o le 55 ona o le NPF, ae tele lava mea e mafai ona fai e mafai foi ona tuu... a maua aua le suia fua le NPF tuu pea i le 55 ae mafai ona faa-voluntary le NPF. E amata atu i le taimi lea le 55 seia tau i le retirement age lea. O lea e talosagaina ai le toe silasila o le tatou Malo ina ia faagatusa ma le tulaga lea e i ai Faamasino. Afai e 68, ia tuu ifo i le 65 le aiufaigaluega ua tele... e pei ona saunoa nisi o sui usufono i lela vaiaso ua umi a le lifespan, po o le umi o tausaga o soifuaga o le aufaigaluega. O lea foi lava e talavou ma tele le aoga aemaise lava faiaoga ma foma'i e toe aumai ai i totonu ona o lea e matua tele le manaomia o le aufaigaluega.

O lona lua o so matou manatu e matau atu i i le tatou Lipoti e pau lava mea ia e aumai ai o le faaleleia o Lipoti Faaletausaga ia faapea le siitia o auuanaga, e ala i le siitia o tomai ma agavaa o le au Faamasino. O mea e talafeagai ia ae... Ona oo mai loa lea i le Samoa Law Reform le Komisi o le Toefuataiga o Tulafono.

E maitau atu i Lipoti, ia o mea lava ua tatou masani ai o ni avanoa sikolasipi, ia faapea foi le tapenaina o Lipoti Faaletausaga ma ia faaoga tataua iloilogaga a le Komisi. Aepeitai i totonu o le Lipoti Faaletausaga o lo o i ai le mataupu taua lava e pei ona sa taumafai atu le Sui Taitai o le Itu Agai. E i ai le Tulafono lea o le Iloiloga o Tulafono o Auupega 1960 o lea na tau amata i ai galuega a le tatou Ofisa lea i le Tausaga lea Faaletupe 2020/2021.

Peitai e faapea na toe taofia mulimuli ane ona o le tele o galuega faatino faaopoopo na ave i ai le faamuamua a le Komisi, ona o le manaomia vave. A o le talosaga a le Matagaluega o Leoleo ma Falepuipui, o le talosaga ina ia toe iloilo le Tulafono lea ona e le i toe iloilo ina lava talu na fausiaina a o le i Tutoatasi le atunuu. O le talosaga la lau Afioga i le Tamaitai Palemia ma le Kapeneta, faamolemole ave le faamuamua i le iloiloga o le Tulafono lea o Auupega.

E talu ai o se tulaga ua tata'i pea i ai finagalo o le atunuu aemaise le fono lenei mo le saogalemu ma le malupuipua o ona tagata pe a fua atu i le faatupulaia pea o le aofai o faalavelave e faatatau i auupega ma solitulafono, o lo o faaoo atu i le Matagaluega o Leoleo ma Falepuipui. E le o aumaia i le Lipoti a o lo o i totonu o le Lipoti Faaletausaga.

Ia na pau lena o ni nai motugaafa lau Afioga i le Fofoga Fetalai a lenei usugafono, e momoli atu ai le faafetai.

FOFOGA FETALAI: Ia malo saunoa i lau Afioga i le sui usufono mamalu. Tulai mai le sui usufono mo Falelatai ma Samatau.

Afioga LUPEMATASILA GALUMALEMANA TOLOGATA TOGIA TILE LEIA (Falelatai ma Samatau): Lau Afioga i le Fofoga Fetalai, e manatu o lea ua maea ona sii foi le viiga ma le faafetai i le Atua i lenei taeao e faatagisia foi le Agaga o le Atua e tautoaluaina i tatou a o faagasolo le tatou fonotaga. Ua maea foi ona e paepaeulufanua paia o le Maota faapea foi le maimoa faafogafoga tapuai mai a si o tatou atunuu.

Ae ou te fia faaaogaina lenei avanoa e molimoli atu ai foi faamaisega i le tuua o le Malo i le Susuga ia Seiuli o lē foi ua tele sona sao i le atinaeina o taaloga aemaise o aoaoga. Sa avea foi ma pule aoga i le Kolisi Mauaoga a Avele i le tele o tausaga ia sa ou aoaoina mai ai le tele o lesona taua e oo mai foi i lenei taimi. O le mea lea e momoli atu le faamaisega ma faamafanafanaga i le faletua ia Su'a ma le nofo a alo ma le aigaalii, ia faapea foi le Pulega ma le aufaigaluega a le Island Rock.

Ona ou oo mai lea lau Afioga i Lipoti Faaletausaga ma Lipoti a le Komiti sa iloilo ina e pei ona i luma o le Palemene. E fia oo se manatu o lenei itumalo i le Lipoti a le Komisi o le Toefuataiga o Tulafono. E momoli atu le agaga faafetai i le Komesina ma le tatou Matagaluega ona o galuega o lo o fitaituga i ai, a o nisi o fautuaga o lo o tuuina mai i le Lipoti a le Komiti, e moomia nisi o polokalame e fesoasoani i le faiga o research ma le faatinoina o le latou foi pitolaau. O le taimi nei e tusa ai ma le Lipoti a le Komiti ia e na o le PacLII o le igoa lea o le system o lo o maua ai se fesoasoani i lenei taimi, ia a o lo o aumai le latou talosaga i nisi o systems o lo o faaaogaina i nei vaitau e pei o Lexis, o le Nexis o le NZLII ma le AustLII e fesoasoani ai i le faatinoina o le latou galuega.

E lagolagoina e lenei itumalo, ma e pau le mea lea e taua i le Lipoti a le Komiti e fai si taugata e pei o le faafitauli lea o lea e aumai i le Lipoti a le Komiti. O le fautuaga la ma le tuualalo a lenei itumalo, ia se i silasila aua e mafai ona faaoga e le gata o le Law Reform faapea foi le Ofisa o le Loia Sili, ia e oo foi i tua i le

Private Sector e mafai ona share le cost e faatau ai lenei system taua ina ia siitia le tulaga o le faatinoina o le auauunaga.

O le isi tulaga na taua i le Lipoti o le lē lava o le aufaigaluega. Ia e le o se taimi muamua lea ua taua ai foi lenei faafitauli. O lea foi ua aumai le fautuaga e toe silasila le Malo i avanoa sikolasipi a o lea ou te matau ua... na ala foi ona aveese mai avanoa sikolasipi mai le profession lea o le Law ona o le matau foi i lena vaitau ua falake le maketi i le tele o le mau loia a o lea foi e aumai Lipoti e le o lava a Loia. E lagolagoina e lenei itumalo le fautuaga ua aumai, a o le mea ua tatau ona silasila i ai le Malo i lenei taimi, o le talitonuga lava o lo o lava a tatou loia ae tatau ona silasila totoa le Malo i le tulaga o i ai falefaigaluega. E tilotilo i le tulaga o le enabling environment ia i ai se tulaga lelei ma faaosofia e fiafia Loia ma tagata faigaluega e faigaluega ai. O lona uiga o se luitau i le Malo, e tatau ona silasila totoa i le faafitauli lea, e le gata i totogi a o le fiafia o Loia e o e faigaluega i Ofisa taua nei a le Malo. Aua e pei o lau matau, ua tele i, na faamavae ma o ese Loia mai Ofisa nei, e le o le totogi i lau matau, ae pei o le environment foi lele e faigaluega ai ma faaosofia ai le fiafia e faigaluega. O so o se luitau e tuuina atu i le Malo e tatau ona silasila totoa i ai le Malo i se tali o le faafitauli lea.

Ona ou oo mai lea i le Matagaluega o Faamasinoga. O se tasi o fautuaga a le Komiti o lo o tuuina mai i le Palemene, ia silasila totoa le Matagaluega ma le Malo i se format e faatino ai Lipoti Faaletausaga. E le gata i le Matagaluega o Faamasinoga ae faapea foi isi Matagaluega a le Malo ina ia tutusa pe consistent le format e lipoti mai ai galuega a Matagaluega a le Malo. Ae ou te le o maua i le Lipoti nisi o faamatalaga taua e ao foi ona silasila totoa i ai ma maua ai se malamalamaaga o le Palemene, e tai pei o le backlog o ni cases o lo o i ai i lenei taimi aemaise o le vaitau o lo o i ai le Lipoti, aua tasi ia performance indicators taua tele.

Aua o lea ou te matau ina ua tulai mai le Peresetene o Faamasinoga lea faatoa mavae atu nei, o le tele ia o le faaletonu sa i ai le Faamasinoga o Fanua ma Suafa. E faitau fia selau ma selau mataupu e le i oo i ai le faasologa a le Faamasinoga, ae tasi le matatia taua sa ausia foi e lea tamalii. E uma le lua i le tolu tausaga muamua o lana nofoaiga, ua tele ina maea uma ma update ia le backlog lea sa i ai le tele o mataupu po o cases a le tatou Faamasinoga o Fanua ma Suafa. So, e tasi lea vaega taua e tatau ona aumai ai se faamalamalamaaga i totonu o le Lipoti ia po o lea se tulaga o i ai.

O le isi itu taua, e fia ni talosaga apili ua maea ona faatino e tumau lona faaiuga pe aumai foi ua suia le faaiuga?

FOFOGA FETALAI: Ou te fautua atu i le sui usufono mamalu, talu ai ona o tatou Lipoti, e manatu lava i le anoliu o tatou Lipoti leaga o lea e fai tausaga. Atonu e sao foi lou finagalo i se isi itu, ae a tuu mai i le anoliu o le Lipoti sa talanoaina e le Komiti, ona pau ia o mea o lo o ua oo i ai le faatofalaiga a le Taitaifono ma le Komiti, e pei o tulaga na e... E pei foi ona ou fautua atu i le amataga, e i ai lava le taimi o tatou lauga faalauaitele ma faailoa ai tulaga faapea, ae a oo loa i tatou Lipoti, ia o lea e fia tulituliloa a tatou Lipoti ia pe faamaonia e le Maota ia mea o lo o taua i totonu ma le anoliu o tatou Lipoti. E

pei o le fesoasoani lena i le sui usufono mamalu. E taua lou finagalo ae o le taututu lava i a tatou Lipoti ina ia faafaigofie foi le galuega a le Taitaifono. Ia, ae o lea foi ua uma ona taatia Tali a le Malo e le mafai ona toe suia e tatou o lea ua taatia i totonu o le tatou Pepa o Galuega. O lau lea fesoasoani i le sui usufono mamalu, e fesoasoani atu ai i lou finagalo atonu lava le iloa po o le Lipoti o le tausaga fou ua sau ai mea na ua e aumaia.

Afioga LUPEMATASILA GALUMALEMANA TOLOGATA TOGIA TILE LEIA: Lau Afioga i le Fofoga Fetalai, e tumu lena itumalo i le ava ma le faaaloalo i lau Afioga. Ia ae pei o se tuualalo lea e tauala atu i le fautuaga a le Komiti lea e tuuina mai i le Palemene. O nisi o vaega e faaleleia ai Lipoti Faaletausaga a le Matagaluega e tuuina mai i le tatou Palemene. O nai vaega ia lea sa avatu ai se tuualalo ma se fautuaga aua e tasi ia o performance indicators taua e tatau ona maua i totonu o le Lipoti Faaletausaga a le Matagaluega. Ae ui i lea o le a se'e mai i nai vaega ia.

O le tulaga e fia fesili atu ai ona e le o i totonu o le Lipoti ia ae le o po lava se lilo. E oo mai i le taimi nei e pei e tasi lea vaega taua e pei ona ou taumafai atu, o le tuai ona faatino a tatou Faamasinoga. O le taimi nei e lua Peresetene o lea e totogi e le Malo...

FOFOGA FETALAI: Ia, ou te faamalie atu lava i le sui usufono o lo o tulai, masalo o lea ua avatu le faatonuga a le Nofoa, ia tatou agai tonu pea i le tatou Lipoti lea ona o le Lipoti lea o le 2019 ma le 2020. O lea foi ua uma ona taatia Tali a le tatou Malo, e le mafai ona toe tali atu le Malo i le tulaga lena ona o lo o faagasolo pea tatou Lipoti ma galuega.

O lau lena fesoasoani i le sui usufono mamalu tatou galulue faatasi. O le mea ua i ai tatou Lipoti, o lena, o le anoliu lea e tulituliloa ina ia pasia e le paia o le Maota. Atonu e i ai foi se isi taimi e avanoa ai tulaga ia e te taulagalaga maia, ia ona o le lipoti o le 2019/2020. O le faamanatu lea a le Nofoa ina ia tatou galulue faatasi e faasaoina ai foi le tatou taimi. Ma le agaga faaaloalo lau Afioga i le sui usufono mamalu, faaauau mai le saunoaga.

Afioga LUPEMATASILA GALUMALEMANA TOLOGATA TOGIA TILE LEIA: Faafetai i lau Afioga i le Fofoga Fetalai. O le mea mulimuli e fia oo i ai se faafesili a lena Itumalo, o lo o taua i le Lipoti e toalua Faamasino sa faamaloloina i le tausaga faaletupe lea ae le o i ai se faamalamalamaga po o a ni mafuaaga na faamalolo ai. O le fesili lea e fia tuuina atu i le Afioga i le Taitaifono ma le Komiti.

Ia faafetai tele mo lo matou avanoa. Ia manuia tele taimi o totoe o le tatou fonotaga. Faafetai.

FOFOGA FETALAI: Malo saunoa i lau Afioga i le sui usufono mamalu. Ia, se i tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJELUA SAILELE MALIELEGAOI: Lau Afioga i le Fofoga Fetalai ou te agai atu foi e fai sina

manatu i Lipoti nei e lua. O le a ou le toe agai foi i Utumaau o lea ua maea ona e paelago ma paepaeulufanua o le tatou taeao, paia o le tatou Maota aemaise foi o le tatou atunuu o lo o faafogafoga mai i ona tulaga faalupea.

Ae o le lua o Lipoti nei e taua tele mo tatou uma lava. Faamalo foi i le Komiti i latou fautuaga o lo o aumai. I le vaega lava lea o le Komisi lea o le Toefuataiga o tatou Tulafono, ua sefuluono (16) tausaga talu ona faatuina ma e lua Ofisa Sili o Pulega, o le Tamaitai o Tuala lea na faamavae na muai faauluulu i ai le Komisi lenei ma avea ma Faamasino, ia ma le Tamaitai foi talu ai nei, le Afioga ia Mulitalo. O lea ou tilotilo atu i le Lipoti ua faamavae Mulitalo. Dr. Mulitalo o le isi lea poutu o le Komisi, ua offer mai i ai e Solomona se galuega Faauluuluga foi i le tusiga o latou Tulafono. Ia, ma le isi foi tatou tusi Tulafono sa i le Ofisa o le Loia Sili ua offer mai i ai se totogi tele e Nauru e latou te tusia a latou Tulafono ua leva ona mananao e tusia Tulafono ia e atagia ai le taua, le faataua o latou tu ma latou agaifanua, a o lea ua amata ona sosolo atu. E pei o Samoa lea na amata mea ia o le faataua o tu ma agaifanua i totonu o le Faavae o latou atunuu ona sa mulimulitai pea i Tulafono e tusia e papalagi ma faataua ai tu ma aga faapapalagi.

Lau Afioga i le Fofoga Fetalai e luaselau onosefulu iva (269) le aofai la i le matau atu, o Tulafono lea ua latou toe teuteuina ma soloia ese le anoano o Tulafono ua leva ona tataua ona aveese i le taimi o Niu Sila e le o toe talafeagai ma lo tatou atunuu. I le matau atu foi i le Lipoti o lo o galulue faatasi le Komisi lenei o le Toefuataiga o Tulafono faapea foi ma le tatou Loia Sili, ia e faapea foi ma le tatou Matagaluega o le Faamasinoga. O le taua o le itu lea, ua faapitua le latou galuega, o le mea lea e taua tele, mo tulaga o Tulafono e talafeagai ma tatou tu ma a tatou agaifanua. O le mea lea e faataua tele e latou. Ia atagia i tatou Tulafono a tatou tu ma tatou agaifanua, e pei ona momoli manao mai i ai tatou tua'a na fausia le Faavae. O le ala lea e taua tele ai le latou galuega, o le a le Tulafono e avatu e latou te mataituina po o ogatasi ma le tatou Faavae. O le a matau foi e na o... pe na o le tolima ea, tolima ia latou Loia ia e totoe nei. E faapei ona le lava Loia i i, e le lava foi Loia i totonu o le tatou Ofisa o le Loia Sili. Ae 269 le aofai o Tulafono, lea la ua faafae ai nei le tatou atunuu. O se tulaga taua tele lena. Ae, e limataitaiina le latou galuega i manatu e avatu e le Palemia po o Minisita foi ma Ofisa Sili o Pulega o Matagaluega ona tilotilo lea o latou i le faatauaina.

O le mea taua o le avatu o taiala, terms of reference. E taua le mea o lo o finagalo i ai le Malo, o lea foi la ou te mataua mea ia e avatu, tai pei la o le tuufaatasiga o eleele, e leai foi ni taiala. Ae tataua ona manino taiala e avatu i le Komisi lenei e galulue ai. A o latou faatauaina le faatalanoa ma le atunuu, afai e faataua tu ma aga a Samoa e tataua ona talanoa manino latou ma le tatou atunuu. E taua tele la le latou galuega o lo o fai. Ae o lea e...

Afioga Hon FIAME Naomi Mataafa: Lau Afioga i le Fofoga Fetalai..

Susuga Hon TUILAEPA FATIALOFA AUELUA SAILELE MALIELEGAOI: E moomia ai la itu ia o lo o aumai i totonu o le Lipoti.

FOFOGA FETALAI: Lau Afioga i le Taitai o le Itu Agai, se i tulai mai le Afioga i le Tamaitai Palemia.

Tulai mai lau Afioga i le Tamaitai Palemia.

Afioga Hon FIAME Naomi Mataafa: Lau Afioga ona ua afea i le saunoaga a le Taitai o le Itu Agai se Faiga Faavae fou a le Malo, tuufaatasia o eleele. O le mea e fia faamanino, o eleele ia, o eleele faale-Malo, aseta a le Malo. E le o eleele o le atunuu lea e tuufaatasia i lalo o le vaega lea, aemaise o itutino o le Malo o lo o nafa ma mataupu tau eleele. Atonu i le lautele, i se vaaiga faa-faiga faavae mo eleele ma aofia ai ma eleele faaleaganuu, ia, o le taimi lena e talanoa ai i le atunuu. A o le agaga ua faavae ai le Faiga Faavae fou a le Malo ma ou te iloa e le o i ai i le Lipoti lea, lea ua ou... tau ina tata mai i totonu le tatou faasoa, o eleele faale-Malo lea ua tuufaatasi ia itutino sa nafa ma ia eleele. Faafetai.

FOFOGA FETALAI: Ae le i tulai mai lau Afioga i le Taitai o le Itu Agai...

Susuga Hon TUILAEPA FATIALOFA AUELUA SAILELE MALIELEGAOI: E fautuaina le Palemia fai ma faitau Lipoti.

FOFOGA FETALAI: Onosai mai lava lau Afioga i le Taitai o le Itu Agai.

Susuga Hon TUILAEPA FATIALOFA AUELUA SAILELE MALIELEGAOI: Faitau Lipoti ia e aumai i totonu i i.

FOFOGA FETALAI: Onosai mai, onosai mai.

Ua tele foi tala i lenei mea o le fai atu o le tala a le Nofoa ae le usitaia. Lau Afioga i le Taitai o le Itu Agai ua uma ona avatu le lapataiga muamua o mea nei ma ua ou manatu foi e le toe solomuli foi le faaiuga a le Fofoga Fetalai i tulaga faapenei.

Ia, ae o le avanoa mulimuli lea o lau Afioga pe a fai atu se tala a le Nofoa. Ma lau fautuaga, o lea ua saunoa manino le Palemia ia ma e ua... i le tuuavanoa atu foi ua matau atu e pei o le a toe tatala mai lau tofa i Faiga Faavae na faavae ai lenei Komisi. Ae silasila foi o lea tatou te talanoa le Lipoti. Ioe, o le agaga lena o lea e taumafai e tatai mai outou finagalo i le tatou Lipoti ona faigofie ai lea o le tatou galuega.

Susuga Hon TUILAEPA FATIALOFA AUELUA SAILELE MALIELEGAOI: Lea ua ou maua atu lou finagalo.

FOFOGA FETALAI: Ae... Se i uma atu le tala a le Nofoa, alaala mai i lalo, alaala mai lalo se i faauma atu le tala a le Nofoa.

Faamolemole, tata'i mai i i, ua le moomia foi ni tala salalau solo, pau lava le mea lea e moomia tatou agai i le tatou Lipoti lea ma fautuaga ia ua aumai ona faigofie ai lea o le tatou galuega.

Tuu atu le avanoa i lau Afioga i le Taitai o le Itu Agai, ia lea ua e faautagia mai se tala a le Nofoa.

Susuga Hon TUILAEPA FATIALOFA AUELUA SAILELE MALIELEGAOI: Ia o le a ou se'e ese ma le Lipoti a o lea ou te talanoa atu i mea ia e i totonu o Lipoti.

Lau Afioga i le Fofoga Fetalai ona ou se'e mai lea i le tulaga lea i le Faamasinoga. Masalo o le Faamasinoga lena ua tele naunau a tatou fesoasoani e ave i ai. Ae i ai le mea lea e aumai i totonu o le Lipoti ne i te i foi ua faapea lau Afioga ua ou tautala i se mea e le i avatua i Lipoti. O lea o lo o aumai ai, e 60+ le aofai... onosefulu tolu (63), le aofai o le afaigaluega i totonu o le Matagaluega o Faamasinoga e ese mea na tofia ai ese mea la e galulue ai.

O se tuualalo, e silasila pea i ai le Faamasinoga leaga o tatou faiga faavae ia, afai e faasalalau ni avanoa e te alu atu lava e galue ai i le avanoa lena. A o lea e aumai manino i le Lipoti, onosefulu tolu (63) le afaigaluega e ese mea na interview ai ma latou galuega na ofoina e fai ma mea la ua latou faia. Ae, e tataua lava ona ave le fesoasoani lau Afioga i le Fofoga Fetalai. Ma ou te manatu foi o le ala lea na ala ai ona liliu atu le tatou Malo e fai le fesoasoani mo le Faamasinoga leaga e taua. O le a le mea lea na tupu? E ese lava le Fale Faamasino o le Faamasinoga o Solitulafono, ese le Fale Faamasino o Mataupu Tau Fanua ma Suafa faaleaganuu. O fea la sa i ai le fale lena? Sa i gatai. E timu loa susu. Ma o le ala lea na aumai ai pea le tuualalo a le Faamasinoga, fai lelei le latou Ofisa, na ala ai ona fai le Ofisa tele lea i le fesoasoani mai le Malo o Saina. E tele le fesoasoani na fai, a o taimi na sa taape solo. Lea e aumai i totonu o le Lipoti e moomia ni fesoasoani atili, ma e matou te lagolagoina aua le tuua le fesoasoani e tataua ona ave.

Ae, lau Afioga i le Fofoga Fetalai o le faasologa maiga o le Faamasinoga, a tuu i ai le faaumiga o latou tausaga mai le 62 i le 68...

FOFOGA FETALAI: Ua ou vaelupeina le saunoaga a lau Afioga i le Taitai o le Itu Agai, talu ai ua tatou taunuu mai i le tatou taimi malolo o le taeao, o le faataatiaese Galuega a le Fono Aoao mo lana malologa o le taeao.

Na faataatiaese Taualumaga a le Fono Aoao Faitulafono mo lana malologa masani i le itula e 10.49 i le taeao ma toe faaauau i le itula e 11.24 i le taeao.

FOFOGA FETALAI: Ou te faasilasila atu ua toe amatalia nei Taualumaga a le Fono Aoao Faitulafono.

Lau Afioga ou te tapa lau Afioga i le Palemia mo le lafo.

LAFO MO LE SUIA O ITULA FONO

Afioga Hon FIAME NAOMI MATAAFA: Lau Afioga i le Fofoga Fetalai, o lea ua maea paleauau le taligasua a le paia o le Palemene e ala i le taumafataga o le taeao sa alo atu i ai. E i ai foi le manatu ua maua se faasiligamalosia e

faaauau ai le tatou galuega. Faafetai i lau Afioga aemaise le auaunaga faaauau a le tatou Ofisa mo le tautuaina o le Palemene.

Mo le sologa lelei o a tatou taualumaga ua ou tulai ai ma le faaaloalo e faatu le lafo e faapea, *Ina ia faataatiaese Tulafono Tumau 32 mo le Suia o tatou Itula Fono mo le aso fono lenei e faapea; o le a faaauau pea a tatou Taualumaga seia maea tagofia Lipoti ma Tali a le Malo o lo o i le Pepa o Galuega ona tatou tolopo ai lea.*

O le lafo lea ma le faaaloalo i lau Afioga.

Faaluaina e le Sui Palemia, Minisita mo Faatoaga ma Faiga Faiva ma le Minisita mo Taaloga ma Alagaoa mo le Fiafia o Tagata.

Na faamaonia le lafo.

FOFOGA FETALAI: Ia o le a faagasolo le tatou galuega e pei o le lafo ua faamaonia.

E faataatiaese tatou Taualumaga o lo o saunoa le Afioga i le Taitai o le Itu Agai. Ou te tapa lau Afioga i le Taitai o le Itu Agai mo le faaauauina o lau saunoaga.

Susuga Hon TUILAEPA FATIALOFA AUJELUA SAILELE MALIELEGAOI: Lau Afioga i le Fofoga Fetalai o lena ua tea atu sou matupalapala e pei ona avatu le saunoaga faamalo a le Palemia. Faafetai mo le faamalosiga sa alo i ai lau Afioga ma le Matagaluega.

E le o toe umi foi se manatu o Lipoti... E lua Lipoti o lo o talanoaina nei...

FOFOGA FETALAI: Malie lava lau Afioga i le Taitai o le Itu Agai se i tulai mai le Minisita mo Galuega Tetele pe i ai se...

Tofa Hon OLO Fiti Afoa Vaai (Minisita mo Galuega, Felauaiga ma Atinae Eese): Ioe lau Afioga i le Fofoga Fetalai. E nofonofo lava ma faalogologo ma matau le saunoaga a le Afioga i le Taitai o le Itu Agai. E lagona lava le agaga fiafia lau Afioga i le Fofoga Fetalai, e ese foi lea tautinoga, e fou foi i lau faalogo le tautinoga lea sa faatino i le taeao lenei, ona o le Lipoti lenei, o le Lipoti o le 2019/2020. Sa ou faalogologo lava la i le saunoaga a le Taitai o le Itu Agai o faapea, e 60+ tagata faigaluega na agai e faigaluega ae o atu e ese mea latou te faia. Lau Afioga i le Fofoga Fetalai, viia Iesu i lenei taeao, o lea la ua ou iloa ua talia e le Atua tatou talosaga i le aumai sao o lona lagona ma aumai sao le mea sese sa fai i lona taimi a o Palemia, 2019/2020. E ese sole.

Tuilaepa faafetai, viia le alofa o le Atua ua e talia Iesu e fai ma Alii ma Faaola i lou olaga, aua faatoa pau lava lea o se mea sao ua e aumaia. A o isi vaega uma o isi tausaga na o pepelo, pepelo, pepelo. O lea la, faafetai lava i lau tautinoga. Toe lava o se Patele e fai ai lau konefesi ona e magalo loa lea o lau agasala.

FOFOGA FETALAI: Ia, tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUELUA SAILELE MALIELEGAOI: Ou te faamalo foi i le Minisita, o lea toetiiti alu le itula faatoa tau ane i lea mea. Ae pei lava ona ou taumafai atu, o Lipoti ia tatou te talanoaina, o le 2019/2020, ia ma Iulai 2021 ia Iuni o le 2022. O Iulai la, na o nai aso na matou i ai. O le 2022... Ia manatua foi Iulai i le 2021 lea na matou o ese ai, a o le vaega tele la o i ina. O lona uiga la, o tatou uma lava.

O lea la lau Afioga i le Fofoga Fetalai, e aoga foi nai mea tatou te taliē a. Ou te le o alo lau Afioga, ou te le o alo lava i le mataupu lea. O le ala foi lena na ou... leaga faatoa ou faalogo lea i se mea faapea, a o lea foi e aumai i le Lipoti, o le taimi foi lea na fai si umi o avanoa le Ofisa Sili o Pulega o le Matagaluega. Na fai si umi i le taimi lea ina ua faamavae lē sa i ai muamua. O le tulaga la lena o lea sa ou talanoa atu ai, leaga o lea e aumai totonu o Lipoti ae ou te le i iloa ni mea faapea na tupu.

Ae o lau faamalo i le tele o fesoasoani na ave i le Matagaluega lena o Faamasinoga. Lea sa ou talanoa atu, o le isi lea faafitauli o le faigata ona maua ni tagata e fiafia e o atu e ave ma Faamasino ona e tele atu le tupe i tua. O le a la le mea na tupu? Na ma talanoa mai le... le Afioga i le CJ le Faamasino Sili ma talanoa tau mai faafitauli o faafeagai ma i latou, e moomia se faatosina. O le a le faatosina? Toe tuu i tua taimi litaea mai le 62 i le 68 ina ia faigofie ai ona faaauau pea i latou ua leva. O lona uiga e toe maua le isi 6 i se atunuu e le toatele ni Faamasino. E taua tele le itu lea na fai, a o matou faatasi ma Fiamē, ona aumai ai lea o le Teuteuga o le Tulafono e fesoasoani ai i le Matagaluega o Faamasinoga. Ia lea foi ua lelei fale o le Faamasinoga. E pei la o le itu lena, a toe tulai mai la nisi vaega, lea foi sa tele lava le fesoasoani a Ausetalia na faakomepiuta uma ai tatou records ina ne i te i ua leaga, a o lea foi e aumai lava le latou talosaga mo nisi fesoasoani, aemaise lava le training. O se talosaga taua. O le mataupu la lena, o lea foi matou te lagolago atu ai, o lea e aumai i totonu o le Lipoti.

Lau Afioga i le Fofoga Fetalai, ia o le mafuaaga lena na avatu ai ni manatu, ona o lea e tupu lava i totonu o le matou taimi, ae le o taofia ai... matou te le... O le ala lea e taua ai mea nei o Lipoti, aua e i ai taimi e tutupu ai mea i Matagaluega ae le o silafia e le Minisita ma le Kapeneta. Seiloga la e oo atu i luga ona faatoa gaoioi loa lea o le Palemia ma le Kapeneta i mataupu faapea.

Ia, lau Afioga i le Fofoga Fetalai, o le matou sao lena. Ia manuia le tatou Fono.

FOFOGA FETALAI: Malo saunoa. Faafetai mo le sao foi o lau Afioga i le Taitai o le Itu Agai.

Tulai mai Safata 1.

Afioga LEAANA RONNIE POSINI (Safata 1): Fafetai i lau Afioga i le Fofoga Fetalai. Ou te talitonu foi o le a tuulua se manatu o lena itumalo e ala foi i tatou Lipoti lea ua taoto i totonu o le tatou Palemene.

Lau Afioga i le Fofoga Fetalai, e laitiiti lava, e le tele foi se manatu i tatou Lipoti. Na pau le agaga, o le agaga faafetai i le Matagaluega o Faamasinoga. E matau atu i le tele o luitau ma faafitauli e faafeagai foi ma le tatou Matagaluega lea. Aua tatou te matau lava, e mai lava le Aso Gafua seia paia le Aso Faraile,

e tumutumu le tatou atunuu i i i le Fale Faamasino lea, e le gata i soligatulafono, a o le Faamasinoga foi o Fanua ma Suafa.

Na pau lava lea i lau matau atu o lea e vaavaai atu foi o lea e i ai luitau o lo o feagai lava ma le Matagaluega. O le luitau lea e i ai o le toaitiiti o le aufaigaluega, a o lea foi e aumai i le Lipoti lea luitau, o lo o siitia lava soligatulafono. E foliga mai i lau matau, e le iloa po o le tasi lea mea o lea e tuai ai tatou Faamasinoga ona o le siitia i luga o soligatulafono ma mataupu tau Faamasinoga o Fanua ma Suafa lea e omai ae toaitiiti le aufaigaluega.

Ou te momoli ai foi le agaga faafetai i le Matagaluega i le latou taumafai e faatino lava o latou tiute. O lau lea matau a o le toatele lava o le tatou atunuu tatou te mataitu lava o le tele ia o tatou mataupu e tolo mai lava e le Faamasinoga, a o le tasi la lea luitau o lea e feagai ma le tulaga o le tatou Faamasinoga, po o le a la se silasila i ai a le tatou Malo i le taimi lenei e tatau ona foia ai faafitauli ia e feagai ma le Matagaluega o Faamasinoga.

Ona oo mai lea i le vaega lea o le Toefuataiga o tatou Tulafono. O lea ou te matau atu i le Lipoti lea i totonu o le tusi lea mo tatou Tulafono foi ia o Teuteuga o Auupega, lea e aumai malosi e le Matagaluega o Leoleo. Aua o le mea moni lava lau Afioga i le Fofoga Fetalai, o lea ua tatou vaai i le tulaga matautia lea ua i ai le tatou atunuu. Lea faatoa tea atu nei lava po o le vaiaso ea lea na tea nei se tasi o faalavelave lea na tupu mai po o Sinamoga ea, lea sa fana mai ai e le tagata i totonu o le taavale le tagata la e savali mai autafa o le auala. O lau la lea vaai, ua matua matautia lava o le tulaga lea ua i ai tatou, o le matua matautia lava o le tulaga. A o le mea lea e ala ai ona mamafa foi le mafaufau i mea ia o auupega e lau mai totonu o le tatou atunuu, o le mea foi lea sa lauga ai i le taua.

Ia aua o lea ua tau matau foi i tali sa i ai, a e fia apply lava oe i le taimi lenei maua aiaiga e 21 ou tausaga, e talosaga i lau laisene pisinisi e aumai ai au laau malosi, ia e pule lava oe i le aumaiga o au pusafana i totonu o le tatou atunuu. I lau lea vaai lau Afioga i le Fofoga Fetalai, e matua matautia lava lea mea, a o le tatou atunuu foi na o le aufaifaatoaga lava latou te faaaogaina. Ae a tatou faitau foi i le aofai o faifaatoaga, e le toatele. A o le mea foi lea o le laaumalosi vaeatu le Maota lenei, e atoa lava le 20 tausaga o faaaoga, ae a ou vaai atu nei i le lauga maiga o pusafana ia e aumai totonu o le tatou atunuu, ona lagona ai lava lea o le faanoanoa, lagona ai foi le popole, leaga o lea ua tulai mai mea ia ua tatou vaai atu i ai tatou te puipui i ai. O le ala foi lea e ala ai ona aumai le malosi o le fautuaga lea i mea o auupega malolosi lea ua aumai. E toaitiiti tatou ae ou vaai atu i le lau mai o pusafana lea e aumai totonu o le tatou atunuu, o le popolega lenei. Aua o le mea foi lea, o lea ou te iloa foi le fana lea na faaaoga e le taavale lea, o se fana e aumai foi lele i faiga faasolitulafono.

O le mea foi lenei e ala ai ona inaina lenei itumalo i le tatou scanner foi lea po o le X-ray foi lea ua tolu nei i le fa tausaga o talanoa, o lenei lava e le i oo mai aua o lea e sao mai ai fana ia i totonu. A la lea ua tatou vaai i ai lea ua fua mai mea ia? E matua matautia le mea lea ua i ai tatou. Aua na ona tatou talanoa ma faia tatou fonotaga i totonu o le Palemene, a o mea ia e tatau ona tino mai ma puipui mai. Ou te masalo e le o toe mamao lava ae tatou toe vaai foi i nisi mea matautia e tulai mai totonu o le tatou atunuu ona o le tele o laaumalosi ia e aumai. O le mea foi lea e tatau ona silasila le tatou Malo i le Tulafono lea, aua

o le Tulafono lea o lea ou te vaai atu i le Lipoti lea e aumai, o le Lipoti mai le 1960 e le i toe teuteuina le Tulafono lea. O le mea lena e oo foi i mea ia o laaufaasaina, le aisa ma marijuana lea e tatau foi ona silasila i ai...

FOFOGA FETALAI: Malie lau Afioga i le sui usufono mamalu se i avatu le avanoa i le faauilavea a le Afioga i le Sui Palemia. Tulai mai lau Afioga i le Sui Palemia.

Afioga Hon TUALA Tevaga Iosefo Ponifasio (Sui Palemia, Minisita mo Tupe Maua): Lau Afioga i le Fofoga Fetalai, e leai se agaga e faauilavea i le sui usufono ma le saunoaga mamalu. Ona o lea ua tatou talanoa i se Lipoti o le 2019/2020, a o le Tulafono lena o le Tulafono mai le 1960, ma o lo o faaigoaina foi o le Arms Ordinance. O lena vaitau ua tau foi lele o le Act, ua le toe i ai le tulaga lea o le Ordinance. O lo o tuufesili pea lou mafaufau i se mafuaaga ua ala ai ona leva lena Tulafono ae leai se Teuteuga.

Mo le silafia e lau Afioga i le Fofoga Fetalai ma le mamalu o le Maota, o lo o i ai matou nei o lo o auai i le vaega lea o le aufanafana po o le Samoa Shooting Federation, o lo o avea foi nisi o matou ma sui tauva i le tauvaga lea o le fanafana i le va faale-Malo, o lea foi na auai atu i le Taaloga a le Pasefika lea na maua ai foi le pine auro a se tasi foi o atalii ia Franco Caffarelli. O lea ua lauga mai nei le sui usufono ona o le tulaga ua tatau ona teuteu, a o lea e tumau lava le fesili i lou mafaufau, o le a le mea na le faia ai i le 10 tausaga talu ai i le taimi na ou tusi mai ai i le Ofisa o Leoleo ma le Malo, faamolemole e fia sui le Tulafono lea ma fai i ai ni Teuteuga ona o le mafuaaga ina ia malupuipua i latou o lo o tagofia le laau malosi i lalo o taaloga.

O lea la ua minoi lena Faigamalo ia faatino le tulaga lena, ae o le tatalo atu, faafetai o lea ua faatino le Teuteuga ona o lea ua saunoa le sui usufono, na o le talanoa, talanoa. Ae mo le silafia o lea ua i ai le Teuteuga o lo o faatino nei e le Vaega lea o le Toefuataiga o le Tulafono. O lea foi ua taua le tatou scanner o le tatou container X-ray scanner le faata lea, masalo o lena ua outou silafia le aso ananafi na taunuu mai ai le vaa ma aumai ai le container lea o lo o i ai i luga le X-ray container scanner.

O se agaga foi e faaali atu ai le agaga faafetai i le matou Matagaluega ona e le i faigofie le taumafai e auina mai lena faaata mo mea tonu lava ia o lo o atugalua i ai le Maota i tulaga o le saogalemua o tulaga i fualaau ma laau faasaina. O le tala fiafia lena mo le Maota i le aso, o lea na taunuu mai ananafi o lena ua tuuina atu le faasalalau... E mo le silafia foi e le atunuu aemaise i latou ia o lo o aumaia pea fualaau faasaina, o lea ua i ai le auupega malosi lea ina ia tetee atu ai ma faatuputupuia ai pea le puipuga o le tatou atunuu mai laau po o laau malosi ma fualaau faasaina.

O le tali atu lea mo le silafia e le tatou Palemene.

FOFOGA FETALAI: Malo saunoa i lau Afioga i le Sui Palemia. Tulai mai lau Afioga i le sui usufono mamalu e faaauau le saunoaga.

Afioga LEAANA RONNIE POSINI: Lau Afioga i le Fofoga Fetalai e faafetai i lau Afioga i le Sui Palemia i le tulaga o le Tulafono lea ua e saunua ai. Aua ou te talitonu lava i tausaga ua mavae ma le tele o tausaga e leai ni mea tetele faapea ua tutupu. A o le vaai a le tatou Malo, a tatou vaai atu loa i suiga ua tulai mai ua faaletonu sui foi le Tulafono. Ae ala na le...

Afioga Hon TUALA Tevaga Iosefo Ponifasio: Lau Afioga i le Fofoga Fetalai...

FOFOGA FETALAI: Ia se i tulai mai lau Afioga i le Sui Palemia.

Afioga Hon TUALA Tevaga Iosefo Ponifasio: O le auala tonu lava lea na matou tusitusi mai ai i le 10 tausaga talu ai, ana sui le mea lea i le 10 tausaga talu ai, e le tulai mai mea ia ua tutupu mai i le taimi lenei e te saunua mai ai. E tele faalavelave o aafia ai foi lenei aiga e masalo o lea foi e silafia e Samoa ona o tulaga o le faaaogasese o le laaumalosi. O tulaga o Tulafono o lo o aumai ai laaumalosi ma tulaga faapena o la e aumai i lalo o le Tulafono, o lea foi e faaaua mai i totonu o le Matagaluega lenei. Ana aumai ni laaumalosi po o ni fualaau faasaina i se auala faanana po o se tulaga faapena, matou te teena. A o mea ia ua e saunua ai, leai o lea e aumai i ala o mea. O lo o i ai foi puipuiga a le Matagaluega o Leoleo.

Ia o le toe faaopoopo atu lea lau Afioga i le Fofoga Fetalai ma le ava tele.

FOFOGA FETALAI: Ia malo faafetai. Ia e masalo se i...

Susuga Hon TUILAEPFA Fatialofa Auelua Sailele Malielegaoi: Lau Afioga i le Fofoga Fetalai..

FOFOGA FETALAI: Tulai mai lau Afioga i le Taitai o le Itu Agai.

Susuga Hon TUILAEPFA Fatialofa Auelua Sailele Malielegaoi: Se i faamalalama lava si vaega lea... O le mea masani i faigamalo i aso ua tuanai, afai o la e lelei le Tulafono e leai se mea o le a suia ai fua.

O lona lua lau Afioga i le Fofoga Fetalai, o mea ia o le au fanafana e i ai lava fana a le au fanafana sa ou i ai foi. E 7 lava fana sa i ai e matou te o atu faaoga. A o le mea lea ou te matauina aemaise lava i latou e maua tupe e maua mea, e manao lava e faatau a latou fana ae matua le moomia. O la e i ai fana a le au fanafana e tusa e 7 fana la e sa i ai sa ou fana ai foi.

O le mea la lea, se aua le aumaia ni faamatalaga faapea i totonu o le Maota lenei. Afai lava ua silafia e le Sui Palemia le Tulafono e tataua ona sui, sui. Ae le o le tu a'e fai mai o le a le mea na tou le faia ai? E tau mai ai i ina e le o lelei le agaga lea e tali mai ai...

FOFOGA FETALAI: Ia, o lea ua maua le finagalo o lau Afioga i le Taitai o le Itu Agai..

Tofa LEALAILEPULE Rimoni Aiafi: Lau Afioga i le Fofoga o le Fono...

FOFOGA FETALAI: Ia e i ai se mea...?

Tofa LEALAILEPULE Rimoni Aiafi: Ia faamolemole lava, na o si mea e fia faamanatu i le Afioga i le sui usufono o lo o saunoa e eseese Tulafono. Ia manatua e i ai foi le Tulafono a Leoleo. E silafia e lau Afioga le tatou Gun Amnesty lea na fai, e lau mai fana solitulafono i tai ma faatamaia e le Malo ma sui ai loa le Tulafono o fana e aumai i totonu. Ua leva na sui le Tulafono lea, leaga o au e i ai foi au laaumalosi... ua sui ai le Tulafono ma le faiga o le process e own ai le fana ma lau pemitā. Ua leva na sui Tulafono ia e eseese Tulafono, e i ai foi le Tulafono a Leoleo ia i le faiga o latou fana o fana e faataga i Samoa ma fana e le faatagaina. Ma le faaaloalo lava.

FOFOGA FETALAI: Ia ua e malamalama mai lau Afioga i le sui usufono mamalu mai Safata 1, e eseese Tulafono. Ia saunoa mai...

Afioga Hon TUALA Tevaga Iosefo Ponifasio: Lau Afioga i le Fofoga Fetalai faamolemole.

FOFOGA FETALAI: Oi ia malie... se i tulai mai lau Afioga i le Sui Palemia.

Afioga Hon TUALA Tevaga Iosefo Ponifasio: Ia leai tatou te le o tusitusilima i totonu o le Maota. O lea ua saunoa foi le sui usufono mai Lepa e pei e sese le agaga lea e avatu ai se faamatalaga. Leai o le... sa avatu sao lava lau tala ona o faalavelave sa tutupu i lenei aiga e aafia ai le laaumalosi. Ae i ai lava lou au talitonuga, ana faasaosao le tatou Tulafono lea ina ua amata ona tusitusi mai le Samoa Shooting Federation ona o latou nei o lo o feagai pea ma laaumalosi. O lo o lelei le aoaoina o i latou i le faaogaina ma le teuina o latou foi e vaavaai i le Tulafono, ina ia usitaia ma lelei le alu i luma o le faatinoga o le Tulafono. O lea na matou taumafai ai lava ua ova atu i le sefulu tausaga talu ai e tusi mai se i faamolemole silasila ifo i le Tulafono. O le agaga lea lau Afioga e leai se...

FOFOGA FETALAI: Ia lea ua maua...

Afioga Hon TUALA Tevaga Iosefo Ponifasio: Agaga e pei ona i ai le finagalo o le sui usufono mai Lepa...

FOFOGA FETALAI: Le finagalo o lau Afioga i le Sui Palemia.

Afioga Hon TUALA Tevaga Iosefo Ponifasio: E leai e le faapena ni manatu i lenei taeao o lea e matagofie le...

FOFOGA FETALAI: Ia faafetai.

Afioga Hon TUALA Tevaga Iosefo Ponifasio: Faasoa a le Palemene. Ae mo le silafia o lea ua sui le Tulafono, o lea ua agai i ai le Afioga i le Minisita ma le Law Reform ina ia teuteu uma tulaga ia. Faafetai.

FOFOGA FETALAI: Ia malo faafetai. Lau Afioga i le sui usufono mamalu, atonu o lea ua talanoaina lea tulaga ma ua manino foi, see ese ia mai le fana ma le umi o le tatou mataupu.

Afioga LEAANA RONNIE POSINI: Lau Afioga i le Fofoga Fetalai faafetai lava, aua e ala ona tele ai se tala a lenei itumalo leaga o mea o lea ua tutupu mai. E leaga o le soifua lea ua maumau, ae afai e faamuta mai e lau Afioga...

FOFOGA FETALAI: Ia o lea ua maua...

Afioga LEAANA RONNIE POSINI: Ona faanoanoa lea o lenei foi itumalo...

FOFOGA FETALAI: O lea foi ua faagaoioi le tatou Tulafono...

Afioga LEAANA RONNIE POSINI: Ia o le agaga lena lau Afioga i le Fofoga Fetalai, e taua leaga o lea ua tatou vaavaai, o lea ua molimau foi e le Maota lenei o lea na lau mai pusafana e le i mamao atu...

Tofa Hon OLO Fiti Afoa Vaai: Lau Afioga i le Fofoga Fetalai...

FOFOGA FETALAI: Ia, se i tulai mai lau Afioga i le Minisita mo Galuega Tetele.

Tofa Hon OLO Fiti Afoa Vaai: Ou te masalo ana faapea e agai tonu lau Afioga i le Fofoga Fetalai le sui usufono i le Lipoti sao lea e aumai, o le taumafai e fai mai se format lelei o le latou Annual Report. Na pau lava lena o le mea ia faamanino ai mea uma, a o lea ua oo i fana. Sau se i... tau soso mai i totonu, soso mai i totonu i le mea lea e avatu ai le fautuaga a le Komiti.

FOFOGA FETALAI: Ia malie lau Afioga i le Minisita leaga o lea e taua i le Lipoti, ia o le Arms Ordinance lea e i totonu o le Lipoti. Ua i ai le manatu lau Afioga i le sui usufono mamalu o lea ua lava ma totoe au saunoaga, o lea foi ua faamau e le Afioga i le Minisita ma le agai i luma. Ae soso ese ia ma fana ma le umi o le tatou mataupu.

Afioga LEAANA RONNIE POSINI: Lau Afioga i le Fofoga Fetalai, ia lau Afioga i le Minisita mo Galuega, sole, se se i tau faitau faalelei Lipoti ia e aumai. E te tulai ifo lava e sau pogisa, se alofa ia se e fai faalelei a tatou mea.

Ia lau Afioga i le Fofoga Fetalai, o le ala lea, o le ala lea o lou taumafai atu leaga o mea o lea e tutupu mai, o lea ua tatou vaai i mea ia na tutupu mai i le

vaiaso lea na tea nei, ua feoai lo tatou atunuu ma fana i totonu o taavale pei ni militeli foi lea o le a tulai mai i totonu o le tatou atunuu.

E pei o le agaga lea o se manatu o lenei itumalo. Manuia tele le fonotaga.

FOFOGA FETALAI: Ia malo saunoa, tulai mai le sui usufono mo Aleipata Itupa i Luga.

Afioga FUAAVA SULUIMALO AMATAGA: Faafetai i lau Afioga i le Fofoga Fetalai mo le avanoa. Ou te iloa foi o lea ua uma ona saunoa nisi o sui usufono o le Maota. E momoli atu ai foi le agaga faafetai i lau Afioga aemaise foi le Failautusi o le Maota ma le afaigaluega e tusa ai foi ma le palegaauau o le Maota nei. Ou te iloa o le a le toe oo i ai se faamatalaga i paia ma sa o si o tatou atunuu, o lea ua uma ona e saunoa i le taeao ua tuanai. Ae o le a taumafai atu se motugaafa a lenei itumalo o Aleipata Itupa i Luga e tusa ai foi ma Lipoti ua i lumamea i le Laulau a le Palemene nei.

O lea ua manino saunoga a nisi o sui usufono mamalu o le Maota, ou te iloa foi o nisi ia o mataupu sa taumafai foi e avatu ai se faamatalaga a lenei itumalo. Ia ae ui i lea, o le a le toe oo i ai se tele o se faamatalaga i tulaga ia i le Lipoti o le Toefuataiga i tulaga ia i le tatou Tulafono lea o mea o auupega, o lea ua tele ina faasoia ai le Maota aemaise foi o le Matagaluega o Faamasinoga. Ia o le a taumafai lava e oo sao lava se manatu i fautuaga aemaise o Tali a le Malo i le Matagaluega o Faamasinoga.

Lau afioga e momoli le agaga o le faafetai i le Minisita aemaise foi le Resitara ma le paia o le afaigaluega, aemaise foi le mamalu o le Faamasinoga e tusa ai foi ma le Lipoti ma tulaga ua maeaea ona aumaia i le Lipoti. Ia aemaise foi o lea ua lauliliu e le Komiti ia ma aumai ai loa a latou fautuaga. O lau vaavaai atu ai i fautuaga a le Komiti pei e 2 lava fuatuaga lea e aumai i. O le tulaga foi lele... o le fautuaga 1 o le process, o le tulaga e faaleleia ai le lipoti mai a le Matagaluega e tusa ai ma le latou galuega faatino ina ia manino i le Komiti aemaise foi le Maota nei i le tulaga foi lele e fai ai le fuataga po o agai i luma le lelei o le faatinoga o galuega, po o tumau foi, ia po o ua tau se'e laitiiti i tua. O lena la ua uma ona aumai Tali a le Malo.

I le fautuaga 2, o lea e taua ai le tulaga lea i le tatou Savali o le tulaga foi lele ia faatupulaia ma siitia le tuuina atu o Savali i tua. O lo o i ai le tulaga foi lele i le faaupuga o le fautuaga, le malamalamaaga i le auunaga a le Matagaluega o lo o faatino. E taua tele le vaega mulimuli lava lea o le Fautuaga, ua agai ai se manatu o lenei itumalo ona e i ai foi tulaga faapea o lo o aafia tele ai le toatele o le atunuu ma e i ai foi sou talitonuga ma sou faatauavaa o lo o aafia ai le tele foi o aiga aemaise o le afaigaluega ona o le lē lava o le silafia ma le malamalama o le tatou atunuu i processes ia e faatino e le Matagaluega.

O le tulaga lea o lo o i ai ua tele ina tumutumu le mamalu o le atunuu i i ona o le tulaga e le o atoatoa lo latou malamalama. E i ai nisi o tulaga ua i ai le faaiuga a le Faamasinoga ae o lo o faapena lava ona gasolo mai le mamalu o le atunuu, aemaise nisi o itu e le i famanuiaina i nei Faamasinoga ma taumafai nisi o tulaga e fai atu e le afaigaluega, ia fai atu se tusi taofi i lea mataupu a o lea ua taatia le faaiuga a le Faamasinoga. E leai se isi e sili atu i le faaiuga ma

le Tulafono. A o le tulaga la i lau tau matau ona e i ai foi aafiaga o lo matou foi aiga i mataupu faapea, ia ou te oo lava i le Ofisa ma faatalatalanoa.

Ae i ai tulaga foi lele pei o se agaga alofa o le aufaigaluega, ona o se a alu atu i le taeo faatauana ou te manao e aumai le tusi e taofi le mea lea, taofi le mea lea. Ia a faamanino atu e le aufaigaluega ou te nofonofu lava i fafo seia aumai le tusi. E pei la o le tulaga lea tau... i sau matau ua i ai le agaga foi lele alofa o le aufaigaluega i ituaiga tulaga ia compassionate ground foi lele, aua o lea o le a nofonofu i le aso atoa le tagata lenei ae ua le vaai i le Tulafono ma le tulaga o faaiuga o lo o i ai. Ma e i ai foi tulaga ua tulai i nuu i tua, totonu o nuu, totonu o aulotu ona ua alu atu se tusi faapea. Ia manatua foi le tele o nai o tatou nuu, e alu atu loa se tusi mai le Ofisa o Faamasinoga ia ua pei foi lele o le a falepuipui, ua oo i se tulaga ua le mautonu faapea o lea ua poloaiga a mea o ia o le a tulai i luma o le Faamasinoga. O lagona ia ma o tulaga foi ia ua talatalanoa mai le tele o nisi tagata e pei e faapopoleina ai le loto ona o tulaga faapea. Ae a manino lava ma savavali i ala o le Tulafono ou te iloa o le fesoasoani foi lea i nai o tatou nuu ma aiga, aemaise o itumalo.

O le Tali la a le Malo lea e aumai i i le fautuaga lua lena, ia e taua le tulaga lea e faatino aoaoga e siitia ai le tomai, agavaa o le aufaigaluega i Tulafono ma faiga faavae o lo o limataitaiina ai le faatinoga o auaunaga. E taua le Tali lea, siitia le auaunaga a le aufaigaluega. E leai se tulaga e faatauagavale i le aufaigaluega i le poto ma le tomai o lo o i ai. Ae i ai nai mafuaaga na o lo o tulai mai i tulaga ia ona limataitaiina sese ai laia lea o ē o lo o omai.

O lo o i ai foi i le vaega o le Tali, o lo o faatino faalauiloa, public awareness i le atunuu ina ia lava lo latou silafia ma malamalama i laasaga o taualumaga faa-Faamasinoga - Court Processes. E i ai la lou talitonuga a tatou taumafai lava e tauave le manulauti lea, o le a taumafai foi la e faaitiitia le tumutumu mai o le mamalu o le atunuu i le Maota o le Faamasinoga. A malamalama lava ia ou te iloa foi o le a tele nisi o tali, ia aua o isi e omai lava i i e omai lava e le o malamalama. Na omai lea faatauana le tulaga a o la e taatia le Tulafono. E pei foi lele ua pressure ai le aufaigaluega e taumafai ia satisfy, ia faatino ma faamalie le mea o lo o gasolo mai ai le... ae taumafai latou ia faamanino atili, o le Tulafono, o le faaiuga ma tulaga uma faapena, aemaise o le process lea e faatino ai le latou galuega. E le gata i fanua, aua ua i ai foi mea faapena aemaise lava mea ia e avatu ai se poloaiga a le Resitara po o le Faamasinoga i mea ia o le teuga o ni maliu, aafia o eleele. Ia, o la e i ai se faaiuga e pule se Sa'o o le Aiga, a o lea ua sau le tagata e pule ai le Sa'o, o se pitovao, a o lea ua sau e avatu le poloaiga e taofi. Ia o le a tele ai lava le galuega a le aufaigaluega ona ota alofa ai lea, tele nisi galuega taua e attend i ai aemaise o Faamasinoga o lo o... ae o lo o taumafai lava e faamanino tulaga ia. Ma e lagolagoina e lenei itumalo le faataunuuna pea o tatou faalauiloa ia i tua i le mamalu o le atunuu ia manino i tulaga ia. E ese le faaiuga ese le mea e tau o le apili po o le talosaga toe iloilo, seiloga ua fai mai le faaiuga o talosaga toe iloilo faatoa sui lea o se faaiuga pe a faapea ua faaleaogaina le faaiuga muamua. Ae le faapea o lea ua i ai le faaiuga muamua a o lea pei ua omai e taumafai atu i le Ofisa e fai le mea lea e mananao ai, ae ua taatia le faaiuga ma tulaga ia.

E pei la o nai tulaga na e lagolagoina ai le fautuaga aemaise o lea ua manino le Tali a le tatou Malo ina ia agai i tua tatou public awareness, faalauiloa. Ou te iloa o le a fesoasoani tele lea i le galuega fita o lo o nafa nei ma le tatou Matagaluega, le Susuga i le Resitara aemaise o le Sui Resitara ma le maave eseese o alo ma fanau a le tatou atunuu o lo o galulue i totonu i i. Ta te malamalama foi i le tulaga lea o le o atu o tagata ua pressure atu le aufaigaluega ia fai lava ia faamalie le mea na oo mai ai. Ia ona ota alofa ai lea, e ui lava e le o auausia tulaga o le Tulafono ia ae ua taumafai lava e fai se mea foi lele, ia ona alu atu lea o le tagata lea ma le tusi ua faavevesi aulotu ma nuu ua tufa i ai.

O le isi tulaga e muamua oo le tusi i tua i le nuu, a o le tagata lea e address i ai le tusi e na te le i maua le tusi. Sa tataua ona faamuamua i ē o lo o address i ai le tusi, ia ona faapena lea ona faasafua. O le a leai se mea e faaeleelea ai fua nisi o faalapotopotoga, aulotu aemaise o le nuu. Afai lava o le tagata o lea e address i ai e ave sao lava i le tagata lena ia o lana ia lea matafaioi. Ae pei o nai vaega uma ia ua tulai mai ma mea o lo o tutupu ona o le lē manino o le mamalu o si o tatou atunuu i process ia ma taualumaga ia faa-Faamasinoga.

E momoli atu ai le agaga faafetai i le Minisita aemaise foi o le Resitara ma le Sui Resitara ma le mamalu o le Faamasinoga i le latou auunaga, e le o se mea e faigofie le faamalieina uma o le mamalu o le atunuu. Na pau lava le talitonuga o lena itumalo, o la outou auupega malosia o le mulimulitaia o tatou Tulafono o lea e pasia atu i totonu o le Maota lena i ona vaega uma. Aua ua i ai foi mea ua tutupu, a ua avatu le faaiuga a le Faamasinoga, ia ae pei ua agai i le Ofisa o Leoleo e fai mai e le Ofisa o Leoleo se mea ina ia taumafai lava e taofi ai le poloaiga a le Faamasinoga ua avatu.

Ae faafetai o lea foi ou te iloa o la e ua silafia foi e Malu o le Malo le latou matafaioi, e faamuamua e latou le Poloaiga a le Faamasinoga po o le faaiuga a le Faamasinoga. Ae o le a taatia nisi o itu leaga o lea e pei e faapena le agaga foi lele o le o atu pressure nai Leoleo se i fai mai se mea e faamalie ai le mea lea matou te loto ai a o la ua uma ona taatia se poloaiga mamalu a le Faamasinoga.

O vaega uma ia ua faalautele atu ai se faamatalaga ona e agai i ai i le fautuaga lea a le Komiti ma o lea ua manino atu i le Tali a le tatou Malo, ma e lagolagoina foi e lena itumalo ia silafia ma manino ma malamalama lelei le mamalu o si o tatou atunuu. E i ai lava le talitonuga, a malamalama o le a tau tuuaitia le tumutumu o le mamalu o le atunuu i i aua o la ua manino pe tatou te o atu lava e a o la ua i ai le faaiuga, pe tatou te o atu lava e a, ia o la ua i ai le poloaiga. Seiloga lava la ua uma ona faatino le Faamasinoga ia ona toe sui lea o se isi faaiuga pe a faapea o tulaga na o taualumaga e oo i ai. Ia ae... e pei o se faamatalaga lena ma se tuualalo.

FOFOGA FETALAI: Faafetai, malo.

Afioga FUAAVA SULUIMALO AMATAGA: E momoli atu ai le agaga faafetai i le Komiti mo le Lipoti aemaise foi le tatou faigamalo mo tali manino. Ia o se manatu lea faatauvaa o lena itumalo, manuia le fonotaga. Faafetai.

FOFOGA FETALAI: Malo faafetai. Tulai ma le sui usufono mo Salega 1.

Afioga FEPULEAI FAASAVALU FAIMATA SUA: Faafetai mo le avanoa i lau Afioga i le Fofoga Fetalai. E momoli le agaga faafetai i le Afioga i le Minisita ma le Matagaluega o Faamasinoga aua foi le Lipoti Faaletausaga sa tapenaina lea sa lauliliuina e le Afioga i le Taitaifono ma lana Komiti.

Faafetai faapitoa i le Taitaifono ma le Komiti mamalu mo le lauliliuina o lenei Lipoti Faaletausaga. Faafetai faapitoa ona o fautuaga, ua vaavaai atu foi i ai i fautuaga i le matagofie o fautuaga ua tuuina mai ae na o le tasi lava se fautuaga ou te fia agai i ai mo se fesoasoani atu.

O le fautuaga lona lua a le Komiti ina ia silasila i vaega e siitia ai auaunaga a le Ofisa pei o le faatinoina o ni aoaoga i tomai ma agavaa mo le aufaigaluega. Ua manino le Tali a le Malo, faafetai foi o lea ua silasila mamao. Ae o se tuualalo i lau Afioga i le Minisita, toe silasila ifo lava i tatou Faamasino o le Faamasinoga o Fanua ma Suafa. I le matou matau o lo o lelei, e leai se mea o faaletonu. Ae i le matau atu i le tele lava o tamalii o lo o nofoia nofoa o Faamasinoga, Faamasino o le Faamasinoga o Fanua ma Suafa, o nai tamalii lava sa galulue i totonu o Matagaluega ua lava le tomai, ua lava le agavaa ua i ai le poto masani.

Ae taua i lenei usugafono gauta i le Iunivesite lea sa faatino ai se pepa tau amata o le tau faamalamalamaina o Tulafono. O le manaia ia o le taimi sa... ina ua litaea se tasi o tamalii, tulou lea sa fai ma Faamasino Sili, Afioga ia Tiavaasue, sa ia aveina ai le pepa i gauta i le Iunivesite, sa tele lava se taua o lea taimi, o ē na aooga ai i lea taimi, o lo o i ai Faamasino o lo o alaala i Nofoa o le Faamasinoga o Fanua ma Suafa sa i lalo o le vasega lea pe sa aooina e lenei tamalii. O le taua o le mau a lenei usugafono, o le toe sasaa mai o tomai ma le silafia ma le iloa o Afioga i Faamasino ua litaea, tulou, e toe tapu'e ai Faamasino fou po o ē foi e naunau e fia auauna i lea foi tulaga faa-Faamasino.

O le tuualalo, pe le mafai ona toe faalatele le aoaoga lea aua na o le tasi lava le pepa la e ave i gauta na o le pepa 100, ae manaia ia pe a toe talatala atu i tua pei o le fautuaga o le a faatino ni aoaoga e siitia ai le tomai. Ae pe le mafai ona toe talatala atu i tua nisi pepa se lua po o se tolu e toe tapue ai le tomai. E le vaai maualalo se isi i tamalii o lo o nonofo i nofoa o le Faamasinoga ona o le taua foi o latou o lo o maua le tomai, o le agavaa ma le poto masani. Ae o le toe faalateleina i nisi matafaioi e le i au i ai se silafia, o le tulaga tonu lava lena e tuu atu ai le tuualalo i lau Afioga i le Tamaitai Minisita e tauala i le Matagaluega o aoga ina ia mafai ona faalatele ai lea vaega. Aua a silasila i ai, ia o le tele foi o nai tamalii la e Resitala i lenei taimi o lo o i ai foi le tomai ma agavaa e mafai ai ona fai ma Faamasino, ae faalatele atu ai le tulaga lea.

Ia pei na o le pau lena o se tuualalo...

FOFOGA FETALAI: Faafetai.

Afioga FEPULEAI FAASAVALU FAIMATA SUA: Ma se fesoasoani atu i lau Afioga i le Minisita ma le Matagaluega o Faamasinoga ina ia toe silasila

mamao ane i ai e toe faaopoopo nisi nai pepa se lua pe tolu, ae toe agai atu i ai latou sa i ai muamua. Faafetai lau Afioga i le Fofoga Fetalai mo le avanoa.

FOFOGA FETALAI: Malie lau Afioga se i... leaga o lea na e saunoa i le Tamai Minisita. O le a le sao o lau saunoaga?

Afioga FEPULEAI FAASAVALU FAIMATA SUA: Lau Afioga o le Tamaitai Minisita.

FOFOGA FETALAI: Ia faafetai, o lea ua toe faasao mai le saunoaga a lau Afioga i le sui usufono mamalu. Ia o lea ua matau atu o lea ua maea sui usufono. Tulai mai lau Afioga i le Taitaifono e talifuaitau foi i nisi o mataupu sa laga.

Afioga AUUPAAU MULIPOLA ALOITAFUA MULIPOLA (Taitaifono o le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae): Malo faafetai i lau Afioga i le Fofoga Fetalai mo le avanoa o le Komiti e talifuaitau ai i nisi foi o finagalo faaalua e tusa ai o Lipoti e lua sa fefaalua i ai finagalo o le Palemene.

O i latou na faaali finagalo e uiga i Lipoti e ui ina tomua se isi o le matou Komiti, ae o lea ua fai le faasaoga e lau Afioga i le Fofoga Fetalai. O le mea lea o le a ou le afea ai le finagalo na faaalua e se isi o lau Komiti. Onosai mai le tatou Komiti se i avatu se faatagaga a le Taitaifono ma le agaga faaaloalo, tatou uia Tulafono Tumau.

O le finagalo o Alataua Sisifo, na matauina ai le talanoa agai i le saunoaga i le tofiaina o Faamasino fou o le Faamasinoga o Fanua ma Suafa. Sao lelei le finagalo o le vaitaimi tonu lea na fai ai le finagalo ina ia tofia ni alii, tamaitai o le Faamasinoga e faatinoina le galuega lea. O lo o manino lelei i totonu o le Lipoti lea.

O le isi tulaga sa saunoa i ai le sui usufono mo Alataua Sisifo i lalo lava o le Lipoti a le Matagaluega o Faamasinoga, se talosaga e ave i le Malo pe le mafai ona toe siitia le tausaga e faamalolo ai le Faamasino mai ona tiute mai le 68 agai i le 70. Ia masalo o lea ua faafofoga le Minisita i le tulaga lea. E ui lava o lea foi e le o atoa ona tuu mai i totonu o le Lipoti, ae manatu o le a taoto atu i le Minisita ma se Tulafono Tau Faaofi e fesui ai le matua o le soifua e avea ai ma Faamasino o le Faamasinoga.

Ona oo mai lea o le saunoaga i le tulaga tau le Samoa Law Reform a le sui usufono lava lea o le Alataua Sisifo i le iloiloaina o Tulafono uiga i auupega i le Tulafono 1960. E manatu o le vailiu lea o lea ua tele i ai felafolafoaiga ma outou finagalo i le aso lenai. Ia, ona o le anoliu o le Lipoti ma lona tausaga na tuuina mai i le Komiti, ae manatu o lea ua fou mai se Tulafono e toe teuteu ai le vaega lea. O le a le oo la i ai se tali ona o lea ua tapena mai le Minisita e ou le Tulafono ina ia aumai i luma o le tatou Palemene. E momoli ai le faafetai i lea foi tulaga ae ua mautinoa o la e ua tapena le Tulafono mo le toe faaatoaina o le Tulafono lea o Auupega 1960.

O le isi sui usufono sa saunoa o le Maota o le sui usufono mai Falelatai ma Samatau sa toe aumai ai lona finagalo e uiga i le Komisi o le Toefuataiga o

Tulafono, ina ia moomia ni polokalame foi nei e faalautele ai le silafia ma le tomai o i latou o lo o galulue i le Komisi lenei o le Toefuataiga o Tulafono. E sao lelei le finagalo o lo o avatu ai foi le fautuaga, matua manaomia a ni websites foi lele ina ia maua ai le atoatoa o i latou aemaise o Loia ma le afaigaluega ina ia faalautele ai lo latou silafia. Ae manaomia la le tinoitupe e mafai ai ona tatou o e apo mai legal websites ia ina ia maua le atoatoa o le silafia o le afaigaluega. E le gata la o le Komisi o le Toefuataiga o Tulafono ae manatu foi e faapea foi le Ofisa o le tatou Loia Sili o lo o i ai foi se naunautauga faapea.

Ona oo mai lea i le isi itu i le vaega lava lea o le Komisi o Toefuataiga sa talanoa ma aumai ai le finagalo o le sui usufono mamalu o Falelatai ma Samatau i le itu lava lea o sikolasipi. E masalo e le fou i le Maota lenei le tulaga lea o lo o aumai pea i totonu o Lipoti nei. E vasaga lelei ai le Lipoti lenei o le Toefuataiga o Tulafono ia ma le Ofisa foi o le Loia Sili, o le faaitiitia o Loia o lo o galulue i le Matagaluega. Ia e le natia ona o faiga faavae lava a le Malo ia a foi mai le ua maua le faailoga Loia ia e ao ona tuli le bond foi lele e lua tausaga. Ma o le itu lea na oo i ai le suesuega a le Komiti o le mafuaaga lea. E foliga loa e uma le lua tausaga lea e faatino ai le bond lea amata loa ona toe tilotilo Loia i nisi Matagaluega a le Malo e agai i ai. Ma o le mafuaaga tonu lea e alai ona faapea le tuuitiitia o Loia e galulue i le Matagaluega lea. E ui o lea, lea ua avatu i ai le fautuaga malosi a le Komiti i le tulaga lea ona e manumanu i le faatupulaia o galuega a le Komisi o le Toefuataiga o Tulafono a le tatou atunuu.

Ona oo mai lea o le saunoaga a le sui usufono i mea o format foi nei e faatino ai Lipoti Faaletausaga po o KPIs. E sao lelei le finagalo o le sui usufono o le ala foi lena o le tuu atu i ai e matou o fautuaga agai i le Matagaluega ina ia aumai manino lava le vaega lea e faigofie foi i le Komiti ona matauina. O a vaega na fuafua e ausia, o a vaega ua ausia, o a foi vaega e le i ausia i le faatinoina o le auaunaga i totonu o le tausaga faaletupe.

Na saunoa foi le sui usufono e uiga i mo mea o... o le backlog foi lele o lo o i ai le Matagaluega. Ia e pei lava ona ou fai atu, e le overlap le talanoa a le Komiti lenei i tausaga o le Lipoti. Ae o tulaga na ua matou matauina o lo o ua i ai le suiga, ua tele lava le suiga ua le o toe i ai ni tatou galuega tuua na i ai.

Se'e mai i le saunoaga a le sui usufono mamalu mo Falelatai ma Samatau, faafesiligia Faamasino na faamalolo o lo o aumaia i lalo o le Lipoti. Ia o le tali manino a le matou Komiti, e faamalulu atu e le au i ai la matou suesuega pe na faapei ona fai le finagalo i alii Faamasino. Ua maea ona fai le faaiuga a le Komisi o le Faamasinoga ua gata foi la i ina le matou talanoa, matou te le auuina se mafuaaga autu. E liolio foi matou i tamalii ua afaina. Pau la matou tali ua fai le finagalo o le Komisi o le Faamasinoga e faamalolo ai alii Faamasino ia.

Se'e mai i le Taitai o le Itu Agai, sa saunoa i le Komisi o le Toefuataiga o Tulafono, e 16 tausaga talu ai na faatua ai le itutino lea. Ia ona saunoa foi lea i le faataua o tu ma aganuu i totonu o le Tulafono. Ia o lo o saunoa i se... masalo o lo o saunoa i se Tulafono foi lele ina ia maioio ma ia matuai matala mai ai o le Tulafono lea o tu ma aganuu. E ui o lea, sa saunoa foi i le 269 Tulafono ua

toe teuteuina ma faafoe ai le atunuu. Ia o lo o faapena lava ona taotao ai le Komisi lenei o Tulafono Toefuataiga.

Ona oo mai lea i le tulaga na saunoa i ai le Taitai o le Itu Agai o lo o i le Vaega 9 o le Lipoti lea o le Faamasinoga na ia taua ai, e 63 le aufaigaluega sa interview ma suesueina e foliga mai e faigaluega i le Matagaluega o le Faamasinoga ae ese le mea o la e faigaluega ai. Mo le faamaninoga o le vaega lea, e leai e le o tupu le mea lena. O totonu o le Lipoti o lo o faaulutalaina o le iloiloaina o le faatulagaga o le Matagaluega. E ono la vaega po o issues na maua i totonu o le toe faatulagaga o le Matagaluega e le Pule Sili na i ai. O lo o i ai la ma le vaega lua lea e faapea mai, e 63 o le 170 o le aufaigaluega, o i na toe fai ai le fetuunaiga e le Management po o fea e toe fetuunai ai le 63 lea. A o le mea sili lava ona taua o tagata faigaluega lava na sue e le Matagaluega o Faamasinoga ina ia aumai e faigaluega i totonu o le Matagaluega, lea lava na tupu internally. O la e la ua toe reshuffle latou i totonu o le Matagaluega. Ae o le saunoaga lea na maua atu faapea, faasalalau avanoa e foliga e faigaluega i le Ofisa o Faamasinoga ae ese le mea e faafaigaluega ai. E leai e le sao. O lea ua tali manino atu i le tulaga lea o lo o faatino lava le galuega a le Ofisa Sili ma le Matagaluega e toe fetuutuunai le atamamai. Afai lava e sau le na apalai mai ae vaai atu o lo o iai le kesi e lelei, e well equipped ma ave i ai lona atamai, ia o lena lava. Masalo la o i ina lea e taunuu ai le mea foi lele lea na saunoa ai le Taitai o le Itu Agai, o le common sense. E fetau lelei lava la le fetuunaiga o le 63 lea i totonu lava o le Matagaluega.

Ia ona ou se'e mai lea i nisi sui usufono sa faaalua o latou finagalo e pei foi o le sui usufono mo Safata 1. O le luitau i le toaitiiti o le aufaigaluega, pe le o le mea lea e tuai ai ona faatino galuega a le Faamasinoga. Ia o le tulaga lava lena, pei ona ou fai atu, ia ona o le Lipoti o le 2019/2020 ae ua ou matauina ma matou matauina le tele o le suiga lea ua i ai, ua le o toe i ai ni Faamasinoga Tuua ua i ai, o lo o ua agai mai lava ma ua faasolo, o la ua tulaga lelei le tulaga lea.

I le oo mai ai i le Toefuataiga o Tulafono, ia o lea foi ua ou talimanino e tusa ai o le finagalo faaalua i Auupega 1960 le Tulafono, ia ua ave i ai finagalo o le atunuu ma ua tapena mai i ai le Matagaluega e fitoitonu i ai le Tulafono.

O Aleipata Itupa i Luga, o lo o ave le finagalo i fautuaga e lua, o le process e faatatau i le Ofisa o Faamasinoga. Pei lava na ou fai atu o le Lipoti o le 2019/2020 ae ua ou matauina i le tausaga na te'a nei, o la ua faagasolo le process lea a le Ofisa o Faamasinoga, savalia o tatou afioaga e faamalamalama lelei taiala. Ma o se vaega foi ou te matauina ua matua tele lona aoga mo le tatou atunuu e aunoa ma le toe feomia'i o le tatou fale lea e i ila i mataupu e tau faaofi mai i le Faamasinoga.

Ia, faaiu le saunoaga a le sui usufono mo Aleipata Itupa i Luga i le Mataupu tau Savali po o le Nusipepa a le Malo. Ioe, o le vaegatonu lava lena o lea e taoto ai le fautuaga a le Komiti ina ia faaoga tatou Fono Faavae, e mafai ona tuuina atu i ai le Savali po o le Nusipepa e faaitiitia ai foi afioaga i le malaga mai iinei i Apia. Ua taugata le soifuaga i pasese aemaise ai e i ai lava afioaga e matua masii mai lava le pule mamalu a alii ma faipule ae manatu o le faaoga o tatou Fono Faavae ae tufa atu ai le Nusipepa lea a le tatou Malo, o le tele ia o le taimi e faasaoina ma tulaga uma faapena. A o lea foi ua faatino, ua matou matauina

foi e oo i lo'u Fono Faavae o lo o i ai foi nusipepa, o le tulaga lea. O le ala foi lea o le tatao atu o le fautuaga a le Komiti, ia ae manatu foi o lea foi ua faatino e le Matagaluega.

Ia e manatu na o le pau ia o sui usufono sa faaali o latou finagalo, e momoli atu lava le faafetai i sui usufono mamalu.

Afioga ALIIMALEMANU Moti Momoemausu Alofa Tuuau: Lau Afioga i le Fofoga Fetalai...

Afioga AUUPAAU MULIPOLA ALOITAFUA MULIPOLA: Sa faaalua o latou finagalo...

FOFOGA FETALAI: Malie lava lau Afioga i le Taitaifono, se i tulai mai le sui usufono o... Sa e saunoa i le Lipoti?

Afioga ALIIMALEMANU Moti Momoemausu Alofa Tuuau: Ia. Lau Afioga i le Fofoga Fetalai e i ai si mataupu taua. Faafetai i lau Afioga i le Taitaifono i le manino ma le auiliiliga maiga o le aotelega o manatu o le Fono. Ae i ai si mataupu taua lea na misi i le manatu sa faaalua e lenei itumalo. Lea ua e taua le siitia o tausaga o Faamasino i le 68 i le 70, ae o le auga atoa lava na avatu ai le manatu ona o lea e maualuga le tausaga litaeta o Faamasino. Pe le ua alagataua ona silasila le Malo e siitia le tausaga litaeta o le afaigaluega a le Malo mai le 55 i le 60 tausaga e faaopoopo ane i lau faasoia. Faafetai.

FOFOGA FETALAI: Tulai mai lau Afioga i le Taitaifono.

Afioga FUAAVA Suluimalo Amataga: Lau Afioga i le Fofoga Fetalai mo le faasaoia o le taimi o le...

FOFOGA FETALAI: Mo le faasaoia o lau Afioga i le Taitaifono, se i tulai mai le sui usufono mo Aleipata Itupa i Luga.

Afioga FUAAVA Suluimalo Amataga: Ia faafetai. O lo o manino le tali a le Taitaifono o le Komiti, faafetai tele lava. Ae o le tulaga foi lea o le Savali, pei o le uiga o le mea sa taumafai atu ai, aua o lea e aumai i le fautuaga, ia siitia le aofai o Savali e agai i tua. Pe agai pea la i Komiti foi lele a itumalo ia pe ave i Pulenuu. Ae pei o le agaga na avatu ai le tulaga lea i Savali, aua ua ta matamata foi i Savali e tele lava o mea tau Faamasinoga. Ae a i ai i totonu ma le tatou awareness lea, fai ai sina chart foi lele i le process. A i ai le iuga, e faapea ma faapea, e alu fai le apili, pei o nai mea foi ia e aware ai o tatou tagata, ia le gata e vaai le aso o lana Faamasinoga ae toe faitau ai foi i le process ina ia tau le omai ai nuu i tua e taugata pasese, ae ia i ai ni nai chart faapena e faamanino ai ia tulaga ia ma le agaga faaaloalo, faafetai.

FOFOGA FETALAI: Tulai mai lau Afioga i le Taitaifono.

Afioga AUUPAAU MULIPOLA ALOITAFUA MULIPOLA: Ia malo faafetai. O le a faasolosolo atu pea tali a le Komiti e tusa ai foi o finagalo na toe laga. O le finagalo o Alataua Sisifo o lea ua maua atu lou finagalo ona e lilifa i tagata faigaluega a le Malo. Ona ou manatu lea ia e ese la le Matagaluega e sau ai le tali lena, lea na e taua ai ma e saunoa i le siitia mai le 55 tausaga agai i se isi tausaga e finagalo i ai.

Ae o le Matagaluega lava ia, Ofisa o Faamasinoga lea e avatu i ai le tali lea, o lea e taoto i le 68 i le taimi lenei. Ae o lou finagalo lea e maua atu e foliga mai o tagata faigaluega a le Malo, masalo la o le PSC ma le Minisita e ou le Matagaluega lea e maua atu ai le tali.

Ae i le finagalo toe faaalua o Aleipata Itupa i Luga e uiga i le aofai o Savali, ia e faamalulu atu masalo o le vaega lena e fitoitonu ia i latou o lea e publish ina le tatou Savali po o le a le tele o le Savali e ave i fafo. Ae o le process lava latou ia, o lea ua amata ona matou matauina ua faatino e le Ofisa o Faamasinoga ma Fanua ma Suafa. E pei o le tulaga lena lea ua ou toe faamanino atu ai le tulaga lea.

Ae momoli tele atu le faamalo i finagalo foi na faaalua o le Maota e tusa ai foi o Lipoti e lua a lenei foi Komiti. E faamalo mo le fesiligia o le Komiti. E momoli atu foi le faamalo a le Komiti e tusa ai foi o le tatou galuega o taualo, ia faamalo faafetai. Faafetai foi i lau Afioga i le Fofoga Fetalai e tusa o le avanoa ua tuuina mai e talifuaitau ai le Komiti i nisi foi o finagalo na faaalua e le Maota. Ia manuia le Fonotaga a le tatou Palemene i lenei aso, manuia le atunuu o faafogafoga mai.

FOFOGA FETALAI: Malo saunoa i lau Afioga i le Taitaifono, atonu o lea foi ua manino finagalo sa faaalua e tusa o le Lipoti. Ia malo lava faafetai.

Tulai mai lau Afioga i le Minisita aua foi nisi o Tali a le tatou Malo e faamalamalama atili.

Tofa Hon MATAMUA SEUMANU VASATI SILI PULUFANA: Ia, e faafetai atu i lau Afioga i le Fofoga Fetalai mo le avanoa. Ae ou te faatalofa ma faafeiloai atu i le mamalu o le Maota, afio o lau Afioga i le Fofoga Fetalai, lau Afioga i le Tamaitai Palemia, lau Afioga i le Sui Palemia, saofaiga a Afioga i Minisita o le Kapeneta faapea Minisita Lagolago. Ia afio foi lau Afioga i le Taitai o lena itu, Sui Taitai, ia faapea sui usufono mamalu uma o lena itu o le Maota.

E faafeiloai atu foi i Ofisa Sili o Pulega o Matagaluega ma Faalapotopotoga Tumaoti a le Malo faapea lau Susuga i le Failautusi ma le Ofisa o le Fono o lo o tautuaina le Palemene.

E faatalofa atu i le faafogafoga tapuai mai a le Afioga i Le Ao Mamalu o le Malo ma le Masiofo, lau Afioga i le Sui o le Fono a Sui Tofia ma lou Faletua, lau Afioga i le Faamasino Sili ma le mamalu i Faamasino o le Faamasinoga.

E faatalofa atu foi i le faafogafoga tapuai mai a Taitai o Ekalesia faapea le aufaigaluega totofi a le Atua o lo o faanonomanu aua se manuia o Samoa.

Le faafogafoga tapuai mai a si tatou atunuu i ona tulaga faalupe i Samoa nei ma so o se tafa o le lalolagi o lo o faapea ona alaala ma papaaao ai. Malo le

soifua, faafetai tapuai a o alofaiva lau Palemene, aua e i ai le talitonuga o faiva e tapuaia e a'e manuia.

Ae le faagaloina foi le faafofoga tapuai mai a si ou itumalo o Faasaleleaga 1, Salelologa ma Tafua, i le susu o le aufaigaluega tofofi i so o se fatafaitaulaga i totonu o le tatou itumalo. Le paia o Tapaau ma Salelologa ae tainane le afifio o Taufaasisina ma Alaala Matuatala ma le mamalu o Toiloto. Faafetai mo la outou tatalo ma la outou tapuaiga.

Lau Afioga i le Fofoga Fetalai, e fia faamauina le agaga o le faafetai i le Afioga i le Taitaifono ma sui usufono uma o le Komiti sa iloiloina le Lipoti Faaletausaga a le Matagaluega o Faamasinoga ma tuu mai ai fautuaga. E faatauinaina e le Matagaluega fautuaga uma e poupu ai lana auaunaga mo le agai i luma.

Lau Afioga i le Fofoga Fetalai, o lo o faaauau pea polokalame o aoaoga mo le aufaigaluega o lo o aofia ai foi fuafuaga a le Matagaluega i tausaga taitasi i ana faalauiloa mo le mamalu o le atunuu i so o se Tulafono a le Matagaluega faapea ana auaunaga mo le silafia e le mamalu o le atunuu. E le o po foi se lilo o faasalalaua foi a le Matagaluega o lo o faaoga ai le nusipepa a le Savali.

O le mataupu lea mo aofaiga o kopi mo itumalo po o nuu, alaalfaga taitasi, o lo o i ai lava lea i le Ofisa o le Savali po o le Matagaluega a le Palemia ma le Kapeneta. Ae, ua i ai foi le isi auala ua tapenaina e le Matagaluega mo le faalauiloaina o mataupu tau le Matagaluega, o le faaogaina lea o le upegatafailagi e auala atu i le Facebook. O lea ua faaoga le Facebook page a le Matagaluega e faasalalau ai le tatou Savali i lea masina ma lea masina. Atonu o se auala lelei lea mo le mamalu, paia ma le mamalu o le atunuu o loo alaala ma papaaao mai i fafo. O le agaga lava o le Matagaluega ina ia mafai ona silafia e le toatele o le atunuu, aemaise o i latou e i ai ni a latou sootaga i mataupu eseese o lo o faasalalau atu i le Savali.

Lau Afioga i le Fofoga Fetalai, se i ou liliu ane i le Ofisa o le Komisi mo le Toefuataiga o Tulafono a Samoa. O le a ave le faataua i fautuaga a le Komiti. E fia faamauina foi la le agaga o le faafetai i le Afioga i le Taitaifono ma sui usufono uma o le Komiti sa iloiloina le Lipoti Faaletausaga faapitoa a le Komisi o le Toefuataiga o Tulafono a Samoa. E le gata i lea, e faapea foi ana fautuaga sa tuuina mai. Mo le silafia, o lo o lagolagoina e le Komisi o le Toefuataiga o Tulafono a Samoa fautuaga uma e pei sa tuuina mai. Ma o le taimi nei o lo o galulue pea le tatou Komisi o le Toefuataiga o Tulafono a Samoa i ni auala talafeagai e faatinoina ai vaega e pei ona fautuaina mai. O le taimi nei, o lo o faaauuina pea feutagaiga ma le Matagaluega o Tupe mo le faatauinaina o ana laisene mo upegatafailagi e faaogaina e le aufaigaluega.

O avanoa faasikolasipi mo loia ma alo ma fanau o le atunuu o le matafaioi lea o lo o feagai ma le Komisi o Galuega a le Malo. Ma o lea foi ua siitia avanoa faasikolasipi mo le tauaveina o le faailoga loia. I le faagasolo mai le tausaga ua mavae mai le 2020 i le 2023, e na o le tasi le avanoa sa mafai ona mauaina mai i le Matagaluega a le PSC po o le puleaina galuega a le tatou Malo. Ae o le tausaga nei ua faamaonia mai ua... e i ai le avanoa sikolasipi e tasi i lalo... mai le Matagaluega...mai le Malo o Niu Sila. E lua mai le malo o Ausetalia ma le lua ua faatupeina e le Malo o Samoa.

O le a ou talanoa atu i manatu sa faaalua e tusa o lenei Matagaluega. Faafetai atu i sui usufono mamalu uma o le Maota sa sausaunua i Lipoti ma tuuina mai foi a latou tuualalo ma fautuaga e faaleleia ai le auauunaga, e le gata i le Matagaluega o Faamasinoga ae faapea le Komisi o le Toefuataiga o Tulafono. Faafetai tele i le Taitai o le Komiti mo le taliina o nisi o manatu e pei ona sa faaalua. Ae ona o le tele o sui usufono sa saunua i le Arms Ordinance, o lea ua i ai le manatu e tataua ona avatu sina faamalalamalama puupuu e uiga i le tuai ona faatinoina o lea tulaga.

Mo le silafia e le Palemene, o le 2019 sa amata ai ona faagaoioi le toe lauliliuina o le Tulafono Arms Ordinance po o Tulafono i mea tau Auupega. O le tulaga sa i ai o le 2019 sa tau amata ai le faagaoioiga ma le faatinoina o le toe lauliliuina o lea Tulafono ae taunuu faatasi ma le taitai mo le Tulafono sa faaigoaina o le Toe Fetuunai Muniao. O le Toe Fetuunai o Muniao, o lea sa ave loa i ai le faamuamua a le Ofisa o le Komisi. O le Tulafono lea e pei ona silafia e le la itu o le tatou Palemene nei, o le itu lea sa...o le tulaga tonu lea sa toe iloiloaina ai pili e tolu ia sa... O le mea lea sa toe faataatia ai le faatinoina o le toe iloiloaina o Tulafono Tau Auupega ae ave loa le faamuamua i ai. O lea la mo le silafia e le mamalu o le Palemene i le taimi nei o lea ua maea ona faataamilo le Komisi i Upolu ma Salafai i le toe faaauuina ma le toe faatalanoaina o le Tulafono o Auupega. Aua o le mea moni atonu e matua le Tulafono o Auupega i nisi o tatou o lo o saofafai nei. Ae peitai ane o lea sa toe oo le fuafuaga i le 2019 ina ia toe iloiloaina. Ia, ae peitai ane foi sa i ai le mea sa ala ai ona toe taatia ae ave i ai le faamuamua a le Komisi. O le taimi nei la, ua soo mai Savaii, ua soo foi i inei i Apia i le faatamilosaga i faatalatalanoaga a le Komisi e uiga i le mataupu lea i le Tulafono lea o Auupega. O le taimi nei o lo o ua feagai le Komisi ma le tusiaina o lana Lipoti atonu e oo mai foi i totonu o le Palemene.

Ia, na pau lea o le mataupu sa ou fia talanoaina aua ua lava ma totoe tali a le Taitai o le Komiti aua mataupu po o fautuaga sa tuuina mai i sui usufono o le Palemene. E faafetai atu i sui usufono mamalu uma o le Maota sa sausaunua i Lipoti ma tuuina mai foi latou tuualalo ma fautuaga e faaleleia ai le auauunaga a le Matagaluega o Faamasinoga faapea le Komisi o le Toefuataiga o Tulafono a Samoa.

Mo nisi fautuaga ma tuualalo sa tuuina mai, afai ua le afea i tali e pei ona tuuina atu, o lo o sosolo lava tali i fautuaga sa tuuina mai ae taatia mai o le a toe tilotilo i ai le Matagaluega ma le Komisi mo le agai i luma.

Ona faaiua lea o se faamatalaga i le momoli atu o le faafetai tele i Ofisa Sili o Pulega faapea le afaigaluega a le Matagaluega o Faamasinoga faapea le Komisi o le Toefuataiga o Tulafono a Samoa mo galuega, faapea le tautuaina o si o tatou atunuu ma le Malo i na tausaga ua mavae e fitoitonu i ai Lipoti Faaletausaga pei ona sa lauliliuina i lenei Palemene.

Ia, faafetai tele i lau Afioga i le Fofoga Fetalai mo lou nei avanoa, ia manuia le fono.

FOFOGA FETALAI: Malo saunua i lau Afioga i le Minisita. Ou te iloa o lea ua faafofoga ma le manino le paia o le Maota e tusa ai ma saunoaga i nisi o

mataupu sa laga e sui usufono mamalu o le Palemene. Malo faafetai. Se i tulai mai lau Afioga i le Taitaifono mo le lafo.

Afioga AUAPAAU MULIPOLA ALOITAFUA MULIPOLA (Aiga i le Tai): Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Lipoti e lua (2) a lenei Komiti e pei ona iloiloina.*

1. P.P.2022/2023, Nu 95.
2. P.P.2022/2023, Nu 150.

Ma le faaaloalo.

Faaluaina e le sui usufono mo Faleata 1, sui usufono mo Gagaifomauga 2 ma le sui usufono mo Vaisigano 1.

Na faamaonia le lafo.

FOFOGA FETALAI: Ou te tapa lau Afioga i le Minisita mo Faamasinoga mo le lafo i le Tali a le Malo.

Tofa Hon MATAMUA SEUMANU VASATI SILI PULUFANA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i Fautuaga a le Komiti o Tulafono Tumau, Mataupu Tau Faigapalota, Talosaga ma Tofiga Faiga Faavae.*

Faaluaina e le Minisita mo Fesootaiga ma Faamatalaga Tekonolosi, Minisita mo Aoga ma Aganuu ma le sui usufono mo Aana Alofi 1.

Na faamaonia le lafo.

6. P.P.2022/2023 NU.157, LIPOTI A LE KOMITI O LE VAEGA TAU LE VA FEALOAI I LE P.P.2022/2023 NU.90, LIPOTI FAALETAUSAGAA LE FAALAPOTOPOTOGA FAAVAE TAU FATUGAO A SAMOA MO LE TAUSAGA FAALETUPE 2021/2022 - ILOILOGA

6.1. P.P.2023/2024 NU.100, TALI A LE MALO I LE P.P.2022/2023 NU.157

FOFOGA FETALAI: Tulai mai lau Afioga i le Taitaifono o le Komiti o le Vaega Tau le Va Fealoai.

Tofa ALE VENA ALE (Taitaifono o le Komiti o le Vaega Tau le Va Fealoai): Lau Afioga i le Fofoga Fetalai ou te tulai atu ma le faaaloalo tele e faatu le lafo, *Ina ia faautagia e le Fono Aoa le Lipoti a le Komiti o le Vaega Tau le Va Fealoai o lo o tuuina atu ai ana Sailiiliga, Fautuaga ma Iugafono.*

Ma le faaaloalo tele i lau Afioga.

Faaluaina e le sui usufono mamalu mo Lefaga ma Faleaseela ma le sui usufono mamalu mo Aana Alofi 1.

Na faamaonia le lafo.

FOFOGA FETALAI: Ou te tapa lau Afioga i le Minisita mo le Soifua Maloloina.

Afioga Hon VALASI LUAPITOFANUA TOOGAMAGA TAFITO SELESELE (Minisita mo le Soifua Maloloina): Lau Afioga i le Fofoga Fetalai ou te faatu le lafo, *Ina ia faautagia e le Fono Aoao Tali a le Malo e faatatau i Fautuaga a le Komiti o le Vaega Tau le Va Fealoai.*

Faaluaina e le Minisita mo Leoleo, Falepuipui ma Auaunaga Tau Tineimu ma le Minisita mo Faalapotopotoga a le tatou Malo.

Na faamaonia le lafo.

FOFOGA FETALAI: Ia o lea ua maea ona faautagia e le paia o le tatou Maota Lipoti e pei ona faaalai, ma o le avanoa leni o se tasi o sui usufono o le Maota e fia saunoa.

Tofa Hon TUUU Anasii Leota (Siumu): Ia, amatamea atu ia leni itu.

FOFOGA FETALAI: Ia, tulai maia le sui usufono mo Siumu, Malie Faleata 3. Tulai mai le sui usufono mo Siumu.

Tofa Hon TUUU ANASII LEOTA: Faafetai i lau Afioga i le Fofoga Fetalai. Ia, e faatulou atu foi i le maualuga o le Maota i ona tulaga faalupelupeina aemaise foi o le faafofoga mai a Samoa. Lau Afioga ou te manatu lava i lou finagalo i le tatou taimi ua vaai atu ua vave. Ae o le a oo sao lava i se Lipoti, i le Lipoti i lau Afioga o le a ou le agai i tua po o luma. Ae o le Lipoti leni, e faatauaina tele leni Lipoti. Mo lou tulai atu ou te momoli lava le faafetai i le Afioga i le Taitaifono ma i latou foi na saunia le Lipoti ona i lou lava talitonuga o le mea taua leni e le gata i le Palemene nei, e auala atu ai fautuaga i o tatou itumalo.

O le itu taua o lo o aumaia e le Komiti o le tulaga lea i le faamamaina o le toto. O le faitauaofai o lo o faamau mai i le tausaga lea, gasegase na faamama toto ua faamauina e 64 i le Tausaga Faaletupe lea 2021/2022. Lau Afioga, e momoli atu lava le faafetai i le Afioga i le Minisita e tusa ai foi o le tofamamao na a'e i le matagofie foi o le tatou fale fou o lo o faatino ai nei le galuega lea. Faafetai foi i le alii pule o lo o faafeagai foi ma leni auaunaga e taua tele mo le atunuu, aua lau Afioga, o le tulaga lea o le siitia pea o i latou ua aafia i leni gasegase.

Sa alu le matou asiasiga a le Komiti o Tupe Maua i le tatou Faalapotopotoga lea, sa maitauina ai le matalasi ma le matagofie foi o le fale fou lea ua tulai mai. Ae i ai nai mea laiti sa faavaai foi i ai le asiasiga o nai nofoa foi ia ua i ai le

faaletonu, o la foi ua uma na faailoa foi i le alii pule. Ae o le tulaga lea e i ai le popolega o lou sui usufono, ia o tulaga lava ia ua faasolosolo ina talavou a'e lava i latou. O le faamatalaga a le alii pule ua latalata i le 200 i latou o lo o ua nofoia nofoa nei. Ma i le saunoaga a le alii pule, o i latou ia ua faamama le toto e le toe i ai se togafitiga e toe fai i ai.

Na ona faamama lava ma faapena ona taumafai ai ina ia umi le soifua seiavagana ua i ai se mea foi lea, ua maua se donor o se kidney na faatoa mafai lea o se isi togafitiga faapena. A o le tulaga lava ia o lea ua agai i ai le tulaga e tataua ona tatou popole i ai o le afaina ai o le tatou atunuu i lenei tulaga o lenei faamai. Sa sueina ai o matou le matou Komiti pe toa-8 pe toa-9. O le mea sa i ai lo matou manatu i le sailiga o le suka ma le toto, ai o matou nei pei e tau faapea, ai e i ai ni faaletonu, ai e lelei. A o se mea o se upu masalo pe se... upu pe ofofofia pe matautia ae aumai le sailiga o le toto o le Taitai o le Itu Agai, sole fai mai le fomai, se o le toto o le pepe alii.

Ae ou te ofo ai foi i lea tulaga. Faafetai lava o lo o tausia pea e lana Afioga tulaga o le soifua maloloina. Malo faafetai. O le tulaga lea ua taua mai e 600 i latou ua latalata ona tietie i le nofoa lea. Ou te le o mautinoa la pe na o iinei i Upolu ae po o faapefea Savaii. O lou popolega lena o le faaletonu lenei ua tulai mai, a o lo o i ai le vaifofo. O lea e i ai le tatou Faalapotopotoga foi lea e tau o le METI, o lo o galue ai foi se tasi o tamalii ua leva ona taumafai mai si tamalii lea mo le auaunaga lea, e fesoasoani i le taumafataga i mea o polokalame ia o taumafa tataua.

Ua na o mea foi ia o veges a, e le aafia ai mo mea o meat. E toatele lava i latou ua molimau ua faamanuiaina i le auaunaga lea a le tama lea ae tataua ia i tatou ona tatou silasila totoa i ai i lea foi auaunaga. O lea foi sa i ai le fesoasoani a le Malo sa auala atu ai i le tatou Matagaluega, se i toe silasila totoa ane lava lau Afioga i le Minisita ma le Pulega pe le tataua ona toe faaauau le seleni lea pe \$200,000 ea i le tausaga ina ia faatinoina ai lea galuega lelei. Sa maua ai foi ma masini foi ia e manava pe a moetaagulu. Ma lou faaaloalo lava.

O le toatele ia o le lisi foi lea faatalitali ae ona o lea ua taofia, ae talitonu lava o la e silafia e le Afioga i le Minisita, o mea e tataua ona fai, e faataua lava le soifua o le atunuu. O lea foi e aumai i i le Tali a le Malo i le fautuaga lea ia uunaia taumafa e faatauina i aoga ma faleaiga ma nofoaga faitele o lea foi ua saunoa manino mai le Afioga i le Minisita o le mea tataua. Ae ou te manatua sa i ai le tatou Komiti i le Nofoaiga XV o le SPAGHL sa asiasi uma ai lava aoga, o kolisi aemaise o faleaiga tetele ia. O le a se finagalo o lau Afioga i le Minisita ma le Matagaluega a talafeagai e manaia foi ae toe faatulai mai e vave ai le asiasiga... o mea ia lea sa tatou vaai ai i isi mea ia e tutupu mai i faleaiga ae pei ua le malosi foi le tatou sailiili i ai.

O le tulaga i le faatupulaia o gasegase e aumai ai se vaega o mea sa sailia e le Komiti i a a o vaegatupe, o lea ua matauina ai le siitia pea o tupe faaalu ona o le tulaga lava lea e tau faaititia ma togafitia le tatou atunuu.

Lau Afioga o nai tali pupuu na o nai manatu lau Afioga e faamanatu e tuuina atu i luma o le Malo ae fia faaoga si tamai avanoa lea lau Afioga e fia momoli atu ai faamaisega ma faamafanafanaga i aiga faanoanoa aemaise si ou itumalo, ona o le amiga a le Atua i se tasi foi o tamalii o lenei itumalo le Afioga i le alo

o Asomua le Afioga ia Leatigaga Leau Lipine na amia e le Atua i le aso ananafi. Ia o le lagia lava lea o Siufaga ma Saumolia e Afio ai Tupuola, o Tafilipepe, Leatigaga, alaalatai lau Fetalaiga Utaileuo ma le mamalu i le Faletolu. Ia o le lagia lava lea o Mulivai o le Maota o Tofiga aua le paia ia Sa Asomua ma Aiga e Lua, alaalatai lau Fetalaiga Tuuu ma le Aiga Sa Tuuu, Falelua o Tulafale, o le Fofoga o le Alataua na ta'i ma le mamalu i le Faletolu.

Ia tatou loto tetele e leai lava se failoto ua fai lava le finagalo tutasi o le Atua, o le tao e velo i le maninoa o le ti'a foi e le ma seua, ae tatou tatalo ia alofagia e le Atua ia maua se nofoaga mau o le tama ia Leatigaga i le Malo o le Atua. Faafetai i lau Afioga i le Fofoga Fetalaia mo le avanoa. Manuia le fonu.

FOFOGA FETALAI: Ia malo le saunoa i lau Afioga i le sui usufono mamalu. Se i tulai mai Faleata 3.

Tofa LEALAILEPULE RIMONI AIAFI: Faafetai i lau Afioga i le Fofoga o le Fonu mo le avanoa. Faamalo le onosai faafetai mo le faafoeina o le tatou fonotaga. E le umi se manatu ae o le taua o le Lipoti. I le tuuina mai o le Lipoti a le Matagaluega, e tasi lava le manulauti lea e aumai ai pea, pe faapefea ona tatou taofiofia lenei faamai, i lenei oo atu o tagata i le faamamatoto, o se faafitauli ogaoga tele e feagai ma le tatou atunuu i le tele o tausaga. O le tali i finagalo e faaali pea, sa ou tautala ai foi muamua i lenei mataupu o le faataua lea o le Primary Health Care, pei o le tulaga lea sa sau ai aemaise lava i Asiasi Komiti, Tamaitai Asiasi Komiti sa i tua e fai tui puipui ma fautua i tina e tumama ma tulaga faapea. O le mea masani ai lau Afioga i le Fofoga o le Fonu, o le teine tausimai po o le teine tausisoifua maloloina e malamalama mai lava lona silafia i le tamaititi a o le i fanau mai ia pe le i soifua mai o lo o i lona tina, seia oo lava ina matua ma alu i le aoga. E matua malamalama i le igoa i totonu o Komiti nei. E fai lau tala lau Afioga leaga e masani na ma o ma lou tina, ou te uua lana ato lea e masani na fai ai ana tui ma tuu ai ana fualaau e tufa atu lava i tua i Vaiusu e oo i Lepale. O le taimi lena o laiti a taavale a le Malo e tau leai ni taavale a le Malo e o atu la tu i lalo ae savavali i luga o mauga ma mea matietie lea e fai ai Komiti nei. E ese le taua o lea tulaga, e tatau ona toe ave i ai le faamuamua a le Matagaluega i le prevention le mea a lea na amata mai ai tatou, e sili le puipuia nai lo le togafitia.

Ona oo lea o lau faamatalaga i le mea lea sa saunoa ai le sui usufono matua mai Siumu e tasi lea vaega taua tele lea na faatu e le Palemene, o le Advocacy Group lea le SPAGHL na Taitaifono ai le Afioga ia Laauli i le taimi a o Fofoga Fetalaia, e taua tele, na matou i ai i le Komiti lea.

O le mea moni o le Komiti lea na iloa ai le tele o faleaoga e le tatau ona toe tatala ua le fit mo tamaiti aoga. E tele faleaiga na matou tapunia i le taimi lea i le taulaga i le tulaga o meaai o lo o faatauina ai e le tusa ma le fofoga taumafa o le atunuu. Ae faafetai lava i lea foi vaega taua na fai i lea taimi a o tulai mai le Afioga ia Laauli i lea vaiata a o matou sa o matou i ai i le Komiti lea. A o le fautuaga, o lea foi e aumai le fautuaga a le alii pule i lana Lipoti lea na aumai, e toe faaauau le Komiti lea. Ia e fautuaina ai lau Afioga i le Fofoga o le Fonu, aua o le Komiti lea o le Komiti Faapitoa lava a le Palemene e tatau ona tatou

toe galulue. Ina ua faatu le NKF i le 2001 na o le 23% e maualuga a. E 23% tagata mai suka, 19% mai toto maualuga o le taimi lenei ua oo i le 30% ma ona tupu e maualuga tele le tulaga ua i ai.

O le mea e faafetai ai, sa matou i le 2000-2001 sa fai le talanoaga lea ou te le i oo mai i le Palemene, tele ia o finagalo o le atunuu na faaalua i le mataupu lenei ina ua fofou le Malo e faatu le mea lea o le National Kidney Foundation. Manatua na engage e le Malo i lenei taimi le kamupani mai fafo ma le Afioga i le Polofesa lea o Satupaitea e fai se feasibility study o le mea lea. Na aumai ai lea ma le latou tau e \$20 miliona Amerika i le tausaga. Ae matua le mafai lava ona faatinoina e le Malo o tatou, na faataatia ai loa lea le Lipoti lea aua o le manatu foi o le toatele, o le a tele tupe alu i le toalaiti ae faafefea tupe e tataua na alu ia i latou talavou ma puipuiga o le faamai. Ae faafetai lava i le lototele foi i lea vaitau o le Malo aemaise foi o le tulai mai o lenei foi Minisita i le vaitaimi lea le Fetalaiga ia Mulitalo Siafausa lea na faatu ai le mea lenei.

Ina ua tatala le mea lea i le 2005, na o le \$5miliona ea pe le atoa, a o au la sa ou tu i le pito lea ou te le auai e fai i le taimi lea. Peitai ane, e i ai si tama talavou e le atoa le 30tausaga sa nofo i tua atu o lou fale. O le tama muamua lava lea ina ua fai le masini lea ou te manatua pea o si tama o le Siumu, o Kalapu o Asuao le faaiu o le tama ou te manatua lelei. Ou te manatua lelei leaga na ou fai i ai po o ai la e palota i ai ae fai mai ou te palota ia Tuuu Anasii ona o lea e sau ma aumai au pusa moa. O lea ou te manatua ai pea. Faafetai i lau Afioga i le sui usufono. Ia...

Tofa Hon TUUU Anasii Leota: Lau Afioga i le Fofoga Fetalaiga.

FOFOGA FETALAI: Ia malie lau Afioga i le sui usufono mamalu, se i tulai mai le sui usufono mo Siumu leaga o lea ua e taua.

Tofa Hon TUUU Anasii Leota: Ou te fia manao e aumai molimau pe moni na palota ia te au. Ma lou faaaloalo. Ae i ai le tagata faapea, e sa'o. Faafetai.

FOFOGA FETALAI: Ia tau tuutuu mai le saunoaga i totonu...

Tofa LEALAILEPULE RIMONI AIAFI: E leai o le uiga lenei o le faamatalaga o le talavou o le tama, aua o lea e tele lava ina o tatou talanoa o tagata ua tai 60, 70 tausaga a o le taimi lenei, e 21% o tagata ia e faaaogaina masini ia e i lalo o le 50 agai i lalo tausaga, ua maualuga tele. O le uiga o le faamatalaga, ina ua matou asia e pei ona saunoa Tuuu ona e vaai laia... e 217 tagata ia ua taoto i masini. O lona uiga o le tala lata mai lau Afioga o tagata ia ua le toe... faapenei ua tatou faatofa i ai pe ana le faia le mea lenei.

Ae faafetai i le tulaga lea aua tatou te manatu i le aoga o lenei... a o le tulaga la lea e fia ave i ai sou manatu i le agai i luma, pe faafefea ona tatou faaauaua pea. Aua o le tala lea e aumai e le Matagaluega, e \$600 ea e faaoga ai le masini lea i le aso e tasi, e operate ai le masini lea i le aso e tasi mo le tagata e toatasi, a o lea na o le \$17 ea le totogi i le taimi nei pe a, ae sa \$10 i le 19 tausaga talu ai. O i ina la tatou te fetuunai ai. E moni foi la i le tulaga lea ua sii ai i le \$600

tagata mai fafo, Samoa mai fafo ia tatou te fetuunai foi aua o lea ua 19 tausaga e le sii lava. Ia, ae o le mea foi lea o le omai ae le logo mai aua e i ai le form.

Ae pei o lea na saunoa le Afioga i le Minisita i le mataupu lea talu ai, a omai lava e le mafai e taugata o atu e vaai ia e aumai se pau. O le vaega lena lea e i ai si popolega o lou sui usufono, e le faapena i lou talitonuga, aua o lona uiga afai e faapea ia o lona uiga e tatau ona pa'u uma lava tagata e omai. Ae lelei o lea ua tau i ai le tau, aua o le taua o lenei mea e i ai nai tagata e genuine. E i ai nai tagata tatou i atunuu ia ua leva ona toe fia omai i Samoa ae le mafai. Ae faafetai o lea ua i ai le avanoa lea e omai e asiasi mai tusa pe na o se tasi le vaiaso pe a, a o lea ua toe oo mai e toe vaai tasi lava ia Samoa, ona fetuunai ai lea.

O le tau lea ua ave nei i tagata e le sitiseni e \$1,000.00, e lagolagoina, e talafeagai. Ae o le mataupu lea... e lua fautuaga a le Komiti.

O le fautuaga muamua lea e faapea mai o meaa. Ia leaga o lea e sau le food security ia atonu e le sao lea upu, ae le afaina e mafai ona toe sui o lea e sao mai le faa-Samoa. O i la lea e ala atu ai le fautuaga e tatau ona toe tagai ai i le tatou Komiti lea faipule i aoga.

Lona lua o le fautuaga, faapea mai o le ACC e fund ina mea nei. Ia tailo i ai lau Afioga, e le lagolagoina e lou sui usufono lea tulaga. Manatua foi o le ACC ia o mea o tau i o faalavelave faafuasei, e eseese mamao ma o tupe foi a le ACC afai e manaomia e le Malo e ave agai i le Treasury, ave agai i le MOF e faasoasoa mai ai mo le lelei faasoaina, ae le mafai ona fautua e le tatou... mo le vaega lea, e faamalulu atu ai e le lagolagoina e lou sui usufono lea vaega.

Ae lau Afioga i le Fofoga o le Fono, ou te talitonu ia e taua tele le... lea faatoa uma nei ona tatala aua o lea sa ou vaai atu i le TV o saunoa mai le Afioga i le Minisita toe faamamafa foi lava i ana saunoaga le mea lea o le siaki. Aua o le mea lea e tupu i tatou tagata, seiloga lava ua lavea pe ua mai faatoa oo i le falemai. E le fiafia e o e siaki ma faigata ai galuega a alii ma tamaitai foma.

O le isi mea lea sa ou laga ina ua alu le matou asiasiga, sa ou talanoa i le Pule ma i latou o lo o vaaia, o le isi mea pito sili lea a o lea e le o aumaia e outou e faalauiloa, o le ma'i lea ua tele i Samoa, le mai gugu lea e inu ai le tele o tatou tagata i le fualaa lea o le voltaren, lea ua inu faa-panadol e tagata, e matuai tele le afaina ai o tagata i fualaa ia. E tele, e tatau ona aumai se faamalosiga e taofi ai le fualaa lea. E i ai lava mea e aoga i ai. A o i latou ia e gugu e muamua lava kili e le fualaa lea lou liver ma ou kidneys, ae ua inu faa-panadol e tatou tagata. E tatau ona ave i ai se fautuaga a lau Afioga i le alii Ofisa Sili o Pulega ma le Matagaluega. E momoli lava le faafetai. E moni le tulaga siitia ua i ai lea auaunaga mo le tatou atunuu.

Ia lau Afioga i le Tamaitai Palemia, afai foi e tusa ai ma lou finagalo, ua tele Taitai iloga o le atunuu ua faaigoa ai fale o tatou, tatau. Tatau ona toe sui le igoa o le fale lea NKF ia Mulitalo Siafausa Foundation. Ma le faaaloalo lava. Faafetai.

FOFOGA FETALAI: Ia malo faafetai mo lou sao aemaise foi fautuaga mo nisi o fualaa o lo o faaoga.

Tulai mai lau Afioga i le Sui Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO (Anoamaa 2): Faafetai i lau Afioga, ua faanoi atu, faafetai o lea ua maua sou avanoa, o lau Afioga lava o lo o i ai le pule...

FOFOGA FETALAI: Ia, e fetau lelei lava aua e te le o i totonu o le Komiti lea, o lea ua fetau lelei lava.

Tofa Hon LAUOFO FONOTOE NUAFESILI PIERRE LAUOFO: E pei o le mafuaaga lena e momoli atu ai le faafetai i lau Afioga.

FOFOGA FETALAI: Ae aua ne i toe faia ma le iloa au mea, fai ma le iloa... saunoa.

Tofa Hon LAUOFO FONOTOE NUAFESILI PIERRE LAUOFO: O lau Afioga o lo o i ai le pule...

FOFOGA FETALAI: Saunoa lau Afioga.

Tofa Hon LAUOFO FONOTOE NUAFESILI PIERRE LAUOFO: Tausiga ma le faamalosiiina o tatou Tulafono Tumau, e leai lava se isi, leai lava se isi o le Maota na o lau Afioga.

Ae faafetai, e faamauina foi le faafetai i lenei Lipoti taua ua aumai e le Komiti Faa-Palemene. O lea ou te manatua o le 2005 le tausaga na faatuina ai le falemai lenei faamamatoto, a o ou saofai mai tua i o i le mea la e saofai mai ai le Sui Fofoga Fetalai, o le Failautusi Faa-Palemene i le Minisita o le Soifua Maloloina sa i ai i lena vaitau, o le Afioga Mulitalo Siafausa. Sa tele luitau sa feagai i le tau faatuina o lenei falemai. Peitai ua alu alu ua taunuu lava ona sa manatu le Malo i lena vaitau o se falemai ua manaomia i totonu o le tatou atunuu. Ia sa lugâ lalô ai foi le Maota, tele foi nisi o sui usufono sa tete'e i le faatuina o lenei Maota Gasegase o le Faamamaina o Toto, ia faapea foi tusitusiga i Nusipepa ma nisi foi o le atunuu. A o lea la ua tatou oo mai lenei vaitau ia e faamalo, o lea ua toatele le mamalu o le atunuu ua faaumiumi ai lo latou soifua ona o lenei lava falemai taua.

O le piliota lea e talanoaina o le 2021/2022, o lea e matau atu i le Lipoti a le Komiti e 217 i latou gasegase sa i ai, e 64 latou sa amatalia i lena piliota i luga i nofoa faamamatoto, e 30 i latou na maliliu. Ae taua le matau atu i polokalame nei aua o le mea mautinoa o le falemai faamamatoto e le o se fofu. E le o se fofu o le gasegase lea, aua o le gasegase lea ua faaleaogaina fatugao po o kidneys, po o le kidney failure. E le o se fofu, o le fofu e amata mai tua i le tulaga tau taumafa aua o lea foi e matau i le... o lea e matau atu i le Lipoti o le tele o latou lea e agai i luga o le nofoa lea faamamatoto i le falemai lea, e mafua mai gasegase ia o gasegase tumau o le tino. E i ai le toto maualuga ma le suka. A maua loa i le toto maualuga ma le suka o lona uiga ua e sauni e te agai atu i luga o le nofoa faamamatoto. A o le mea e sili ona taua, i tua atu aua le i maua i le gasegase o le suka ma le toto maualuga, e taua lava taumafa paleni. Aua pei o taumafa lava e mafua ai ona aafia i gasegase tumau ia. A aafia loa i gasegase

tumau ia ua agai foi i luga o le... ua faaletonu ia fatugao ia ona agai loa lea e faamama le toto. Ia pei o vaega ia e taua ai lava le faaauau pea o tatou faalauiloa, faalauiloa ma ave pea le fautuaga i le atunuu. Ave le fautuaga i le atunuu ina ia taumafa paleni. O latou foi ua aafia i gasegase tumau, ia e tatau lava ona taumafai e faaaoga pea fualaau o le toto maualuga, fualaau o le suka, ina ia taofiofia ai, treat aua e le cure. Ae tau ina taofiofi ma treat ai tulaga o gasegase ia aua ne i faaletonu atu fatugao, aua a faaletonu fatugao pei ona talanoa, ua agai loa i le faamamaina o le toto.

O se mea mulimuli lava lea e taunuu i ai. Ae faamauiina lau faafetai foi i le Afioga i le Ofisa Sili o Pulega ma le Pulega faapea le Auaigaluega ona o lea e matau atu i le tulaga o tupe faaalu ma tupe maua. Ia, e tele foi le fesoasoani a le tatou Malo. A o tupe faaalu i le faiga o togafitiga nei, o lo o siisii pea i luga ona o lo o sii foi i luga le taugata, le taugata o vailaau ia faapea foi mea e manaomia mo togafitiga nei. O lona uiga e le faigofie. Ia ae se i silasila, aua e tatau ona lava fualaau mo latou ua aafia i le toto maualuga ma le suka, ia ma isi faamai tumau ina ia taofiofia ai le oo atu i luga o le nofoa. O lona uiga e tatau lava ona lava fualaau ia mo tatou gasegase, i latou ua gasegase.

O lea e maua o lo o fai ma sioki tatou fualaau ia, fualaau ia i totonu o le tatou falemai aemaise lava Salafai. E pei o Lipoti na lata mai sa ou maua e au ia o lo o fai ma sioki a tatou fualaau ia. E manaomia le maua pea o tatou fualaau. E le o mautinoa po o le a le mafuaaga po o le mea e le o lava le tatou seleni e aumai ai fualaau mai tatou suppliers ia po o le mea po o i ai ni tatou aitalafu o i ai e le i totogiina ua mafua ai ona tuai mai fualaau.

Ae i ai isi fualaau ia sa taua e le isi gasegase o lou itumalo, ua lua masina e le i maua se fualaau. Ia se i silasila ane le Afioga i le Minisita ma le alii pule o le tatou falemai o lo o manaomia e nai tagata o le atunuu a tatou fualaau ia. A o lea pei e maua atu pei e i ai le tausaga faaletupe na tea nei o lo o i ai nai seleni e le i faaaogaina. Ia ae se i silasila e faaaoga ia seleni ia e aumai a tatou fualaau ia ina ia taumafai ai ona tuuaititia i latou e aafia i gasegase.

Ae foi a le tala i le faalauiloa, taua tele le faalauiloa, le faamalositino ia faapea foi taumafa, o tulaga na e ave i ai le faamamafa a lou sui usufono. Ia ma le tulaga lea o le tatou Komiti, ona o lea e aumai i le fautuaga, le tali o le fautuaga a le Komiti ae faapea foi le Tali a le Malo i Komiti ia o le tulaga o... mo mea o taumafa e faaulufale mai i le atunuu. Ia o lona foi sa i ai le tatou Komiti o le CODEX e silasila lelei i ituaiga taumafa po o talafeagai ia e faaulufale mai i le atunuu o lo o faaaogaina e le tatou atunuu ma faapena ona faatauina i faleoloa.

Ia lau Afioga i le Fofoga Fetalai, o nai motugaafa ia e tusa ai ma lenei Lipoti taua ua fia oo i ai se faamatalaga. Faafetai mo le avanoa.

FOFOGA FETALAI: Malo saunoa lau Afioga i le sui usufono mamalu.
Tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUUEUA SAILELE MALIELEGAOI: Lau Afioga i le Fofoga Fetalai, e fia fai foi sina upu puupuu i le tatou Lipoti lenei. Ma e faamalo tele atu i le Ofisa Sili o Pulega o lo o vaai

le tatou faamamatoto faapea foi ma le alii fomai o lo o galulue ai ma tamaitai tausisoifua.

O lo o i ai le fautuaga taua o lo o aumai i le Lipoti ma ou te manatu foi e tatau ona tatou taumafai uma e uunai le fofu lea, le mea lava lea tau taumafa. E le i faigofie ona faatu le falemai lenei. Ma o le falemai lenei o le falemai a Samoa, le tatou Malo. Ona o lea ou te vaai atu i Lipoti pei e talanoa foi, sa ave le fesoasoani a le Malo i le Fale Faamamatoto, pei o se Faalapotopotoga ese. A o le Faalapotopotoga a le Malo.

Ou te manatua ai le tala a le isi fomai mai aso la ae le i faia nei mea e le i avea foi le toatele o ni tagata i Niu Sila, e sau loa lava lea toeaina ae sue ae maua atu ua lavea i le kidney. O le a le mea sa fai? Aumai loa le tui faagase ona tui ai loa lea ia aveese le tiga, alu loa o lona ua uma ua fofu lou gasegase. E le i atoa le vaiaso ae faalogo atu ua tagitagi mai le logo foi lele ua uma le soifua. Sa taofiofi foi Niu Sila i le avatuina o tatou tagata aua so o se Malo lava e siitia lona soifua, le soifua o ona tagata lautele, siitia taumafa e faaali i taumafa, taumafa lelei, feoi i taavale afi. Ua le toe savavali, vave tele i ai le gasegase lea o le suka ona sosoo loa lea ma le afaina o fatugao. O atunuu uma lava la ua maualuga le soifuaga ua maualuga tupe e maua, o le gasegase lea e tau o le gasegase o tagata mauoloa lea ua gasegase ai Samoa ona o le lelei o taumafa. E le i faigofie la.

E lua Minisita na aafia ai i. Ina ua Minisita le Afioga ia Misa ona alu lea ma le taumafai, e alu e taumafai mai i luga o le finagalo o le Kapeneta. Ia, o le taimi la lona, lea sa tau atu e le Afioga ia Leala e 20, e leai e \$40 miliona le tau a o le taimi la lea, o lea e taitai Leala i le itu foi lea o le Tautua e tetee mai i fuafuaga nei a le Malo a o lea foi ua malamalama i le taua tele o le taumafaiga lea sa taumafai i ai le Malo. Sau Misa, afio mai Misa, sole, e taugata. Na muamua lava i Tutuila. Ia, uma atu Misa sau Mulitalo, toe tuu foi lea i ai o le luitau lea ia Mulitalo. Sau Mulitalo ua talanoa ma kamupani Ausetalia e \$40 miliona tala Ausetalia a o le taimi lona i le tasoo mai o isi fomai mai le tatou falemai, “alofa Tuilaepa aua ne i faia lenei mea, aua, aua, aua ne i faia” E aumai le upu lona o matou lea e matou te mafatia i lo matou uso la e ua le toe mafai ona toe oo mai i Samoa, le Afioga ia Polataivao ma isi, e le toatele. Aua o le taimi lona, e te alu atu... e te lavea loa e le mafai ona e toe sau... alu ese mai ma Niu Sila. Ua e nofo mau ai loa aua e taitolu aso, taitolu aso ma fai le tui. Ia, sa i ai lava le manatu a ou alu atu i le isi aso ou afe i le uso, “Pola aua e te popole o lea ou te taumafai lava le tatou Malo e fai se tatou Fale Fatugao ina ia mafai ona e toe foi atu e fai lau tautua i Samoa ma... O le taimi lona e pei na o le toatolu ea a tatou mai. Pau lava lona o le avanoa na aumai inei i Niu Sila ona o le toatele o tagata Niu Sila lea foi e tau sue ni avanoa e togafiti ai a o le fesoasoani tele na sau na maua mai ia Benji, Dr Benji, o ia lea e maualuga lona tulaga i totonu o le Faalapotopotoga a Fomai i Niu Sila, a o le alii Initia...

FOFOGA FETALAI: Lau Afioga i le Taitai o le Itu Agai, ia, ua lava ia talaaga o le... O lea e agai i le tatou Lipoti. Ua manaia lava ae...

Susuga Hon TUILAEPA FATIALOFA AUELUA SAILELE MALIELEGAOI: O le taua ia o le mea lea, o lea la ua aumai o i ina lea na

maua ai le tatou fesoasoani ae malie le mea, ua talosaga, talosaga i luma o le tamaloa, o le Minisita a o la e flu si toeaina e leai sana solosolo...

FOFOGA FETALAI: Toe tasi le minute o le sui usufono.

Susuga Hon TUILAEPA FATIALOFA AUELUA SAILELE MALIELEGAOI: Tago loa se i ae le ofu, solo ai loa fai mai ma le tamaloa “Ua pasi lau mataupu.” Ua manao ia vave tuli ese, ia otegia loa ma le CEO aua ne i toe aumaia ni tagata faapenei ma te faafeagai. Lau Afioga, e ese foi auala na tatou maua ai lea faamanuiaga.

O le tulaga la i le fofu lea ua tatou maua nei o taumafa e ese le taua. Po o fea lava le mea tatou te agai i ai, e tasi lava le fofu tatou te agai mai i ai o taumafa. O le mamao ia o le mea na ou alu i ai, o le mea na valaau mai ai le Faalapotopotoga, le isi Faalapotopotoga a le Lalolagi i mea lava nei tau puipuiga o le siosiomaga. Ae valaau mai ai au mai Copenhagen, se i ou alu atu e i ai le fono taua, ae ou alu atu o meataumafa ae sau le tulaga o taumafa e amata mai i aoga. O le atunuu lea o Copenhagen i le taimi lea, e faatoa pogisa i le 12:30 i le po ae toe oso le la i le ta o le 2:30 i le vaveao. I le mamao o le mea, ae ou alu atu o meaai a tamaiti aoga ina ia amata mai i ina, amata mai i fanau le tulaga lea o le aoao o taumafa ina ia umi ai le soifua. O tatou i Samoa lau Afioga i le Fofoga Fetalai, o le taua ia o le tulaga lea...

Afioga Hon TOELUPE Maoiautele Puumulinuku Onesemo (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai pe maua se avanoa?

FOFOGA FETALAI: Malie lau Afioga i le Taitai o le Itu Agai, se i tulai mai lau Afioga i le Minisita o Fesootaiga.

Afioga Hon TOELUPE Maoiautele Puumulinuku Onesemo: Faafetai lau Afioga i le Fofoga Fetalai ua... E leai se agaga e faalavelave i le saunoaga matagofie a le Taitai o le Itu Agai aemaise foi le talatalaina o le tulaga na taoto ai le faiga faavae a le Malo i lena foi vaitau aemaise pei ona saunoa... E matauina ma le agaga faafetai si o tatou atunuu, siitia i le tulaga o taumafa. Pau lea o le agaga lea e tau molimoli atu, o le tele o taumafa ia na... taumafa tuu aisa, taumafa tuu aisa i le unaiina lea o pisinisi ma tulaga faapea, tele ai taumafa tuu aisa ae ua misi ai le tulaga galue i faatoaga o tatou tagata lea la e tupu ai le gasegase. O le uiga lena o le faiga faavae i lena vaitau e le gata e o tutusa taumafa, ae ia siitia le galue i faatoaga. E pei o le tele lava o mea ua privatize, ave i tua faapisinisi ae galo ai le soifua galue. Ma le agaga faaaloalo.

FOFOGA FETALAI: Faafetai, ia...

Susuga Hon TUILAEPA FATIALOFA AUELUA SAILELE MALIELEGAOI: Ae o le a faaiu atu lau Afioga...

FOFOGA FETALAI: Faauma maia le saunoaga lau Afioga i le Taitai o le Itu Agai.

Susuga Hon TUILAEPA FATIALOFA AUUEA SAILELE MALIELEGAOI: O le mea o lo o tatou faatauaina o taumafa tatau, ae o le lu'i lea o lo o i ai, o tatou uma lava, tatou uma lava o taitai o nuu ma itumalo, ia tatou faia se taumafaiga pe mafai ona tatou faatalitonuina o tatou tagata i le mea lea o le taumafa tatau ma le sootaga i le mai lea, i le mai lea tatou te talanoa ai. Aisea? O le anoano o tatou tulaga masani o faiga ai ia e fai i aso... o faalavelave. A mafai ona tatou uunaia o tatou aiga, o tatou nuu i mea nei o taumafa o faalavelave, e taumafai e taofiofi. So o se faalavelave, taofi ai ma taumafa o mea nei o toonai i le Aso Sa e masani ona fai. A mafai ona tatou faia le mea lea lau Afioga, e tele lava le fesoasoani mo tatou uma. O le ala lea e taua tele ai le tatou talanoa i le fonotaga lenei ona e na ona tatou talanoa pea talanoa pea ae tele taimi e galo ai ia tatou o mea ia tatou te faatauaina o mea tatou te mamai ai aemaise o le oo i le Aso Sa po o le a le faalavelave. E ave le tuala ma le faifeau, ave le isi ivi ma... ivi oo ma le alii o le nuu. O le a la le mea e maua? E na o le mamai, mamai, mamai ai o faifeau ma tagata matutua o le nuu i faiga ia tatou te masani ai. O tatou nei i totonu o le Maota lenei e avatu ai tatou fautuaga, po o le talia po o le lē talia ae o upu o le ola lea tatou te fetufaai ai.

Lau Afioga i le Fofoga Fetalai, ia, o le sao lena i le tatou mataupu.

FOFOGA FETALAI: Ia, malo faafetai. Ia...

Susuga Hon LAAULI Leuatea Polataivao Fosi: Lau Afioga i le Fofoga Fetalai...

FOFOGA FETALAI: Se i tulai mai lau Afioga i le Minisita o Faatoaga.

Susuga Hon LAAULI Leuatea Polataivao Fosi: Sa manatu lava se i saausi le saunoaga a le Taitai o le Itu Agai, aemaise foi le mataupu lea sa taua e le sui usufono mo Faleata. Na ona ou fia faatepa lava le Maota i le ogaoga o le mea lea tatou te talanoa i ai. O ananafi, ia na maliu ai le alo o le matou faafeagaiga i Sasina. O le kidney failure, o le tamaititi e 7 tausaga, talaatu ananafi. Fitu tausaga, fitu tausaga ae maliu lenei alualutoto. E taua tele le faalogologo i le taeao lenei le mataupu lea tatou te faasoia ai. O le a le isi vaifofo i luma atu? O le a le isi a tatou tilotilo o lea o le a savali le 15 tausaga o fai le Kidney Foundation. Lea foi ua taua na amata i le taimi ua mai lou tama i le mea lea, ave lea faaunuu i Niu Sila. A o le a le tatou mea sa tatau ona tapena i le taimi lena? Tapena le mea lea na saunoa tonu mai ai le Taitai o le Itu Agai. Saunoa foi Leala, o le Komiti lea, sefulu tausaga talu ai, sefulu tausaga talu ai na savavali uma ai le Palemene lenei e promote le healthy living i totonu o aoga, amata mai totonu o aoga. Siaki faleletaua, siaki faleaoga pala, siaki le vaiinu a tamaiti.

Lau Afioga ou te le toe fia foi i tua. Matou te o atu o ato laufuafua la e i totonu o toilets a tamaiti. Matou te o atu o atomaa la e i totonu o toilets a tamaiti.

Tapuni uma faleaoga na. Matou te o atu foi i faleaiga o le mea lava e tasi. Matou te o atu i Moataa ae pau mai le tamaititi i le fola o le faleaoga. Lea la ua tatou tautino nei i le aso lenei le matautia sa tatau ona tatou faia i le sefulu ma ono tupu tausaga talu ai. Fitu tausaga, fitu tausaga o le pepe meamea e le i...E le i aafia lona system i se mea e tasi ae ua fail kidneys. E avatu ai lau faamalosiua i lau Afioga i le Minisita ona ua tatou taunuu nei... E le toe manaomia ni tatou fai fagogo, po o ai na faia po o ai na amata po o ai na mamai ai. Ua tatau ona uma upu na. Tatou tilotilo po o le a le mea e foia ai nisi tamaiti e toe feoti taeao i le mea lea. Aumai le fofo, tatou tilotilo uma i ai ma tatou vaavaai i ai i le auala e foia ai le mataupu.

Ae ua ou manatu lau Afioga i le Fofoga Fetalai, I've been an E matua tele le aafiaga o le aiga atoa. Ua ou molimau atu au ia ma ou te le fia oo i ai, e matuai ou le fia oo lava i ai. Ae ua taua le talanoaina i le aso nei, it's an alert mo tatou uma o le Palemene ina ia matua tatou tilotilo lelei, tilotilo lelei i le auala e foia ai le mataupu lenei ma e avatu lau faamalosi. Lau Afioga i le alii Minisita, ia toa lou loto. Talofa e ia Mulitalo, ia e moni upu na... Oo ai lava i Singapore ma fai ai le tagisaga lea na mafai ai nei ona mafua na aumai le masini. Ae faafetai foi ua toe tata mai i totonu le vaa o Leala ua na iloa ai le sese o lana tetee i lena taimi. Ia manuia le tatou fono.

Tofa LEALAILEPULE Rimoni Aiafi: Lau Afioga i le Fofoga o le Fono...

FOFOGA FETALAI: Atonu o lea ua taua lava nei saunoaga uma ua opea i le Maota. Ae... Ia, tulai mai lau...

Tofa LEALAILEPULE Rimoni Aiafi: Leaga o lea ua saunoa le Afioga i le Taitai o lenei itu toe saunoa foi si ou uso ia Laauli. Se e faamalie atu o le taimi lena o la e ou te i tua ou te le i i Palemene, o le 2001 le mataupu, ae faatoa ou sau i le 2006 ma le faaaloalo lava.

FOFOGA FETALAI: Ia, tulai mai le sui usufono mo Safata. Ua lava ma totoe upu o lenei aso ae saunoa mai.

Afioga LEAANA RONNIE POSINI: Ia, faafetai tele i lau Afioga. E fia fai foi se manatu o lenei itumalo i le taua tele o le Matagaluega ua oo i ai le talanoaga a le tatou Palemene ma le latou Lipoti. E muamua ona ou faafetai i le Pule Sili ma le Matagaluega aemaise foi o le Pule Faatonu i le tulaga o le latou auunaga. O lea e fia oo sau tala... O lea ou te vaavaai atu i le Lipoti lea, o lea e tuu mai i i e toalua inisinia o le faamama toto ua faamavae, aua e ese lava foi le faaogaina o fomai o masini nei ese foi tagata latou te faia masini nei, aua a le lelei foi masini nei e le mafai foi ona galulue alii ma tamaitai fomai. O lau la fesili, po o i ai nisi o faatumuina avanoa ia. Aua o masini uma ia e i totonu o lou talitonuga i totonu... E ese lava masini e faatino e fomai ae ese foi inisinia latou te service ina tatou masini ia. Aua e taua i lau lea faitau atu i le Lipoti.

O le isi mea lea ou te vaai atu i i i le Lipoti lea, o lea e i ai le... lea e faapea e i ai le tomai fou lea e i ai aua o lea ua matau e faateteleina lava ē e agai i le tatou fale faamamatoto. A o lea e tau mai i i, e i ai lava le mea lea... E i ai isi togafiti fou lea e faapea e faaaoga le taga, lea e tuu mai i i, ou te le o mautinoa lelei la pe a fai togafitiga ia ona faaititia lea o ē e agai i le tatou falemai faamamatoto po o ua tupu lea mea aua o lea ou te faitau atu e i ai le tomai fou lea la faatino ai e faaaoga le taga vaeatu le paia o le Maota aemaise foi le faalogologo mai o le tatou atunuu pe ua agai i ai. Ae taua tele lenei Itumalo ona o lea e faatupulaia e e gasegase a o le vaai la a le tatou Malo pe faapefea ona faasaoina le mamalu o le atunuu o lea ua aafia, pe afai ua i ai se isi togafitiga fou lea e faaititia ai le agai o tatou tagata i le fale faamamatoto.

O le isi fesili, o lea ou te matau o lea e faapea mai i le mea lea o le tagata sitiseni lea e \$1000 le tau, a o le tele o tatou tagata ia e i fafo ua matutua soifua e tasi lava le latou sitiseni. Afai o la e nofo i Niu Sila, nofo i Ausetalia, nofo i Amerika, a o tagata Samoa, ae leai ni sitiseni Samoa. Ae afai e foi mai totonu o le tatou atunuu ae tuu atu i ai le \$1000, ia tailo i ai. E moni a na o le sitiseni i fafo a o le tautua lea e fai mai o latou aiga. A sau la ae fetai ma le \$1000 lea, ou te talitonu lava au ia ua matua mamafa tele lea tau, e moni lava e sitiseni i o a o lea e fai mai le tautua i nai o latou aiga. O le \$1000 e le o se tupe itiiti i lau lea vaai atu i le tulaga lea.

Ma le mea mulimuli, ou te lagolagoina le Komiti lea a le SPAGHL lea sa i ai, e tatalo atu foi le Taitai o le Malo lau Afioga i le Tamaitai Palemia, ou te lagolagoina lava le Minisita o Faatoaga e toe taitai i le Komiti lea. Ma le agaga faaloalo.

FOFOGA FETALAI: Ia tulai mai lau Afioga i le sui usufono mo Aana Alofi 2.

Afioga AIONO TILE GAFA (Aana Alofi 2): Faafetai lava i lau Afioga i le Fofoga Fetalai i le avanoa ona o le taua o lenei foi Lipoti ma le galuega a le tatou auunaga o togafitiga o fatugao. E momoli lava le agaga faafetai i le Afioga i le Ofisa Sili o Pulega ma le Pulega i lenei galuega taua, e faapea foi lau Afioga i le Minisita. E le tele foi so matou manatu, e manatu o lea ua saausi finagalo o le Maota i fautuaga foi ma timaiga aua lenei faafitauli. E le o se tamai faafitauli lea ua tatou maua, e tele aafiaga o le tatou atunuu.

O le mea muamua lau Afioga i le Fofoga Fetalai e sao lelei nisi o saunoaga ia, o le tatou atunuu, o le taumafa lava.

FOFOGA FETALAI: Malie lau Afioga i le sui usufono mamalu o lea foi ua maua atu o oe o se tasi o sui usufono o le Komiti lenei. O lea foi e te sainsi i le Lipoti.

O le mea lea, ua faagata foi i i le saunoaga a lau Afioga i le sui usufono mamalu.

Afioga AIONO TILE GAFA: Ia ua lava lea faafetai lau Afioga.

FOFOGA FETALAI: Ia se i tau faamaoni mai tatou sui usufono o Komiti i le tatou galuega. O le tatou sui usufono mulimuli lea mai Aleipata Itupa i Luga.

Afioga FUAAVA SULUIMALO AMATAGA: Ia faafetai lau Afioga mo le avanoa e faamautinoa lava ou te le o auai i totonu o le Komiti lea. O lea ua faafofoga le Maota i saunoaga e tusa ai foi ma le Lipoti a le Komiti aemaise ai foi Tali a le Malo o lea ua i ai aua na o le lua lava fautuaga.

Ia o le a agai sao loa i ai se faamatalaga a lenei Itumalo. I le Fautuaga muamua i le tulaga lea o le toe mataituina o taumafa, amata mai aoga aemaise foi le lautele o le atunuu, faleaiga aua lava le faaitiitia lea o faamamai le pepesi po o le NCD. O le tulaga lea e aumai i le Tali a le Malo e faapea, o le talafeagai le toe asia o Tulafono Tau Taumafa a le atunuu.

I lau matau leaga o lea na agiga i saunoaga a nisi o sui usufono i tele o tausaga, 15 tausaga o fai le tatou NKF le tatou faamamatoto, a o lea e matau atu, o le FDA a tatou o le 1967 le tatou Food and Drugs Act lea. O lea na i ai le teuteuga i Regulations i le 2011. O le 2011 la lea na faasa ai loa siusiupipi lea e i ai Regulation lea i i lea na amend ai le Vaega 7 o le Tulafono lea o le FDA. O le tapenaga lea a le tatou Malo ina ua faatu le tatou i le 2005 le tatou faamamatoto. Ua avatu se faamatalaga i lea, ona o la e sa tapenapena mai. Na tatou tapena muamua fai le tatou faamamatoto, tapena mai tulaga e faalelei meaai, faasa le siusiupipi. Oo mai i le 2015 ua fai le tatou Food Act lea Tulafono mo Taumafa 2015 ae faatoa fai Regulations lea e agai ile Safety ma le Quality. O lona uiga o le quality o meaai i le 2017. O lea lava la e taatia mai i i o lea sa progressive lava le galulue o le tatou faigamalo sa i ai talu ai, e tapena mea ia e auausia, galulue faatasi ma le tatou faamamatoto lea ua uma na tapena. E avatu se faamatalaga ona e taua le vaega lea o mea tau taumafa, taumafai e faatulafono ma faamalosi ona e i ai foi si au pitolaau sa i ai.

O le taimi lea o matou lea sa agai i Singapore e fai le study matou ma le Pule Sili o le EPC, o le vaega o le Building o le Ofisa o le Vai , o i i le Ofisa o Tupe ma le Ofisa o le Loia Sili, lea la sa fai ai le study lea, e tele falemai faapea i Singapore ma o lea na matou omai ai loa ma le tapenaga. Sue loa le fale ae maua ane o le fale tuai o Tamaitai Tausimai ma sa toe tapena uma ai le tulaga lea, toe faafou aua o le fale ua tele na faaleagaina ua pala aua e tele ina fau i le laupapa.

O le tapenaga la lea na ala ai ona agai i ai ma o i foi na matou iloa mai ai i aoaoga i Singapore e le na o tagata matutua e agai i totonu o Maota Gasegase nei e toatele foi alo ma fanau. A o le faiga la o le Scheme a le vaega e le na o le agai e faamama le toto se i tulou. e i ai au vaega a le patient lava ia e faatino ina ia mafai ona monitor le progress. O tatou pei a o atu lava e faamama omai toe nofonofu i le fale. O le tulaga lena lea tate vaai i ai. A o le taimi foi lea i le tapenaga i le vaitaimi lea o Minisita le Afioga ia Mulitalo sa taumafai e fai nai tulaga ia, e oo lava i totonu o le Falemai Faamamatoto, sa taumafai e fai nai TV fai nai Magazine e aveese atu ai le atu foi lea o le finagalo ma loto o patients aua e 3 itula e te taotooto ai ae gaoioi le masini.

Sa i ai foi le isi vaega sa faatu ai se tamai gym e sau fai ai nai au exercise. O vaega uma ia ae pei o le taimi lenei na ona o atu faamama toe omai agai le fale,

ae o le scheme e tele ona vaega aemaise foi la o le taumafa. A o lea e agai mai le fautuaga ma le tali manino a le Malo e toe agai i le Tulafono lenei i le taumafa.

E toe avatu ai se tuualalo a lenei Itumalo i le FDA lea, le tatou Food and Drugs Act lea. Ou te iloa o Amerika e faamamalu tulaga ia. O lea foi sa agiga i totonu o le Fono lenei, sa i ai foi se taimi sa avatu ai se tuualalo a lenei Itumalo i meaai taumafa ia e aumai mai fafo.

Ou te le o iloa po o ai o test ina tai pei o le FDA lea, o lea sa avatu ai se faamatalaga ona sa ou vaai ai foi i le tele o fonotaga sa ou agai ai. O le tele o manu nei e faatau e commercialize ai ina ia vave le tupu, vave na faatau, vave na maua le tupe. E i ai drugs na e tatui ai totonu, tamai moa e faatoa fanau 2 masina ua taulia ua lapopoa, lea foi na saunoa manino ai lava le le Afioga i le Minisita mo Faatoaga i le taimi lea sa laga ai foi. Atonu o le tulaga lea semeamanu e faapenei e le faapenei lou tino ona e i ai aafiaga. E i ai lou talitonuga e i ai mo le mea o le... o lea e alu lava le vailaau po o ua fasi lava ma mate le manu ae o la e i ai le vailaau lea i totonu. O lona uiga e i ai le residual foi lea tai pei o le mea lea faaoga i le test ina o le vai. Afai le chlorination e test le siusiu o le paipa po o au atu le chlorine lea tapeina le siama. O le test lena.

E i ai foi la lou talitonuga meamanu o lea e i le SROS, ou te le iloa po o faatino i le taimi lenei e test ai tatou aano o manufasi ia mai fafo po o la e i ai lava le vailaau lea na faatupu ai le tino o le moa ina ia vave ona taulia, vave na mamafa, vave na tele le tupe a le kamupani po o sau lava le moa lea ua uma na faapusa po o la e aumai ai.

E i ai lou talitonuga o la e i ai totonu toega ia o le malosi o le vailaau le residual lea e avatu ai se faamatalaga. O le taumafai foi lea e faamaumau lea tulaga, tulai mai le Tsunami 2009 i le itu lea o matou i Aleipata, e lua lava aiga na masofa uma tuugamau, se i tulou. Ua matou tete'i ua ova i le 5 tausaga toeititi 10 tausaga, ae maua mai tino o la e na tafetafea le sami o la e atoa lava. O i ina na oso ai se mafaufauga, o drugs lea e faaumi ai le tino o le tagata ma toe tuu i le aisa, o la ua teu a o la e tumau pea le vailaau fua i le le pala se i tulou le tulaga o le tino. Aua ou te iloa ana alu lava i le natura o mea ou te iloa pe tasi tausaga i le lua tausaga ua liu efuefu ma tulaga uma faapea.

Ma o lea e avatu pea se tuualalo faa-fautuaga a lenei Itumalo se i silasila ane le tatou Malo pe le faaauau se tulaga, ou te le iloa po o faatinoina nei. O lo o i ai le tomai ma le silafia e le tatou SROS e ona susesue ai tulaga ia. O le taimi lenei i lau matau i le tulaga lea i le tau o le soifuaga, ua alumia atu le paumamoe lea e taua nei. O le tele o fale fai kekepuaa ou te fesili lava o le moa po o le mamoe? O le pau mamoe. Ae vaai atu e sao lava, mealololo ia, o le fiafia ia o tagata. O le faaitu lea a matou o le ai ia o fale kekepuaa la e i ai. E savalivali mai lava le tagata i le taavale, e 10 lava kekepuaa e aumai. E ui ina le o toe lapopoa ae o le ituaiga meaai o lea e faaona e tatou o tatou tino.

Ae pei o se tulaga lena tatou agai ia i le taumafaiga ia faaitiitia le sau o le meaai lea e toe faaona ai lava o tatou tino e le tatou atunuu, aua e pei o nai ia foi lea tatou agai ai...

Susuga Hon LAAULI Leuatea Polataivao Fosi: Lau Afioga i le Fofoga Fetalai.

FOFOGA FETALAI: Ia se i tulai mai lau Afioga i le Minisita.

Susuga Hon LAAULI Leuatea Polataivao Fosi: E taua le finagalo o le sui usufono i le faafesili. Ae ua faafagogo tagiao le faasilasilaga a le SROS e ala lava i le mea lenei o le foia o mataupu uma ia tau faamai pipisi non communicable diseases. O lea ua outou silasila mai i fuafuaga a le Matagaluega, o lea lava e avatu pea le faamanatu e ala i le Matagaluega o Faatoaga ma Faiga Faiva, its about time now, o le tatou toe liliu uma le tatou food chain ma le tatou food system a Samoa i le mea sa tatou masani ai. E matua sao lelei lau saunoaga i moa ia e aumai mai fafo, e le sese lau tala leaga ua tatou o e tuli le mea taugofie, ua tatou o e tuli le mea vave, a o mea nei tatou te le o atinaeina la e manufactured mai e tagata la e i o e le o popole lava latou po o a mea la e i totonu.

O le a la le tatou fofu? Ia o le tatou fofu lea ua alu atu pei ona saunoa ua tatou pulupululima, o le tatou uluai seleselega, fafaga au moa, fafaga au puua, fafaga au povi, fafaga au mamoe, fai au atinae aua lava le mea lea e saunoa i ai le Taitai o le Itu Agai ai meaai felesi, taofiofi le tatou ai meaai lololo ma le ai maio ma le mau mea lea e tupu ai nei faamai a o lau saunoaga o la ua matua mataitu e le SROS ia suesuega eseese ina ia faaitiitia ai le tulaga o mea ia o lea ua saunoa tonu lava i ai. A o le soifua maloloina o lena lava e i ou aao. A e fia ola umi tausilou soifua maloloina a o le SROS o le la ua faatino mea na. Ma le agaga faaaloalo.

FOFOGA FETALAI: Ia malo saunoa lau Afioga i le Minisita. Ou te iloa lau Afioga i le sui usufono mamalu ua malamalama mea uma o lea ua manino e saunoaga a le Maota. Atonu foi o lea e faafogafoga mai le atunuu i tulaga uma o le faamoemoe o lenei Lipoti. Tulai mai e faaauau ma faauma maia le saunoaga.

Afioga FUAAVA SULUIMALO AMATAGA: Manuia le saunoaga a le Minisita ae pei o se mea foi lea e vaavaalua e faaouo ma le atinaeina o tatou lafumanu ma lafumo, tulaga uma faapena leaga e i ai lava vaega foi lea e aumai mai fafo e supplement ai le tatou taumafaiga, ae ia mautinoa la o mea ia e agai mai fafo o la within means o tatou suesuega lea i le SROS. Afai la o lea sa fai le Regulation lea i le 2011 e faasa le faatauina o le siusiupipi, ua tatau foi ona tatou tapena i le mea lea e taugofie nei le paumamoe lea ua... O le tele o faleaiga ou te fesili a o le mea lava lena o la e ua faaoga, e oo foi i fale kekepuaa ma mea na, e tatau foi la ona fai se tapenaga i le tulaga lea ona o lea lava e talia e tatou ma faafaigofi na toe consume a e tatou ma toe aafia ai le soifua maloloina.

O le tulaga i le tali lona lua i le fautuaga lea i le faaogaina o le tatou ACC, ia tailo i ai, ae pei e tau ese le agaga o le Tulafono o le tulaga foi na la e aumai ai le tali, ona o le tulaga foi lea aua o le ACC latou ia e mo faalavelave faafuasei

a o le tatou tapenaga i le fale lea o fatugao, faamamatoto, e pei se mea foi lele o le lifestyle o le tagata. Afai lava e te taumafai lava oe e ai mealololo, o lau lava lea lifestyle e te expect a la e alu a i o i le tatou fale faamamatoto, ae a taumafai a e faaoga ia...

FOFOGA FETALAI: Ia faamaea mai le saunoaga a le sui usufono ua maea lou taimi.

Afioga FUAAVA SULUIMALO AMATAGA: Ia tatou faatoaga esi ma mago ma tulaga uma faapena, ou te iloa foi o le a tuai ona e agai i le faamamatoto. E faamaea atu ai i ina se faamatalaga a lenei itumalo ma le agaga faaloalo. Faafetai.

FOFOGA FETALAI: Ia tulai mai lau Afioga i le Taitaifono mo se talifuaitau foi i nisi o mataupu sa laga.

Tofa ALE VENA ALE: Faafetai i lau Afioga i le Fofoga Fetalai. E momoli atu le agaga faafetai ma le faamalo i Afioga i sui usufono mamalu uma o le tatou Maota nei o ē sausaunoa foi i le tulaga i le Lipoti a le Komiti. Ia o lo o matua manino lelei saunoaga uma o lenei Tualumaga a le Palemene le matua taua tele o le tulai mai o le mataupu lenei, i se fofu ma se faafitauli ua tulai mai ina ia mafai ona foia.

E momoli atu le agaga faafetai i saunoaga a sui usufono mamalu uma e tusa ai ma le tatou mataupu ua i lumamea nei o le Palemene. Ae i le vaai a le Komiti i ai i le mataupu lenei, e momoli atu foi le faafetai i Afioga i le Pulega ma le Matagaluega e tusa ai foi ma le matou faatalatalanoaina o le Lipoti Faaletausaga. E pei e agai uma lava finagalo o sui usufono mamalu i se fofu ma se taumafaiga ina ia foia ai, e faaitiitia ai e pei ona saunoa foi nisi e le o se fofu le agai atu i le masini faamama toto.

A o lea foi ua manino ia fautuaga a le Komiti ua tauaaoina aemaise lava o le taumafai lea ina ia faamalosi le uunaia o awareness program aemaise lava i mea taumafa. I should think o le prime time lava... e pei o matua lava e tatau ona amatalia i a latou fanau the prime time o le soifua mai o le tamaititi o i ina e amata aoaoina mai ai i taumafa e tatau ona ia tausia mo le umi o le soifua pe a tuputupua'e ma matua. E pei e tasi lena itu e silasila i ai.

Ua saunoa foi nisi o sui usufono e tusa ai ma le fautuaga i le ACC, e leai o lena e avatu faa-fautuaga e le Komiti. O lea foi sa faatupe foi e le Faalapotopotoga lea o Faalavelave Faafuasei i se fesoasoani foi i le faatauina o le masini lea o le CT Scan, o lena e fautua atu le Komiti pe a tusa ai ma se finagalo o le Malo i se fesoasoani aua pei e... tasi lea Matagaluega a le Malo o le matua tele lava o le tupe la e i ai i totonu.

O le matau a le Komiti foi ma ana... o lea foi e tele nisi fesoasoani o lo o maua mai i le Matagaluega lea a le ACC. E pei o fautuaga na ua tuuina atu e le Komiti. Ae ou te iloa o isi mataupu ia e agai i ai saunoaga a isi sui usufono mamalu o le tatou Maota nei, ia ou te iloa o le a i i le Minisita le atoaga o nisi tali ia o mataupu ua laga e... Ae momoli atu foi le agaga faafetai i le Matagaluega,

faafetai atu foi i le matou Komiti e tusa ai ma Lipoti ua i lumamea nei o le Palemene.

Lau Afioga i le Fofoga Fetalai ma lou faaaloalo tele. Faafetai.

FOFOGA FETALAI: Ia malo faafetai, tulai mai lau Afioga i le Minisita e talifuaiteu foi i nisi o mataupu sa laga e le paia o le Maota.

Afioga Hon VALASI LUAPITOFANUA TOOGAMAGA TAFITO SELESELE: O le a vaivao ia le tofa i lau Afioga i le Fofoga Fetalai, aua o lea ua matamata atu i lenei aso o lea ua mavae lupe o pupula ua mavae foi lupe o mau ua tatou toe fesilafai i lupe o taulaumea. Ae sa matematelima lava le tamaitai o Pausisi pe tua ma ni a le aso. I le matamata i lenei aso ma le taeao na liu na lua, ua faaiu le Palemene i se Lipoti e sili ona taua ma o se Lipoti faafefe tagata se i tulou.

O se lipoti ua tomanatu ai le Palemene i tulaga e pei ona i ai le soifua ma le ola, e ese le matagofie. E momoli le agaga faafetai. O faaupuga uma lava ma saunoaga e leai ma se mea e tasi e teena e lou Minisita leaga o le taua lea. A o le tauluga o mea uma ma mafauauga o le Palemene lea na saunoa i ai le Afioga i le Taitai o le Itu Agai, o se call mo Samoa, o se valaau mo le Palemene ma Taitai o le atunuu ia mataala ma ia tulai mai. O lou faauigaina lea o se fofo o lenei faafitauli ogaoga.

Lau Afioga i le Fofoga Fetalai, e le umi sau folasaga aua o le matagofie o saunoaga a sui usufono mamalu ae o le tauluga o mafauauga, e tulaui lava. O le fesili tele ua na ona tatou faaupu ua na ona tolaulau o tomai ma agavaa, tolaulau o a tatou sailiiliga. A o le fesili, e faafefea ona faatino? O le a le fofo e pei ona valaau ma saunoa le Taitai o le Itu Agai i lenei aso. O le valaau sili lea ona taua ma ou te faatauaina foi i lenei afiafi ma ou te tatalo atu faapea. Le Palemene ala maia, Taitai o le atunuu o se valaau sili lea ona taua mo tatou uma.

A ou faamatalatala ma tau tomanatu i aafiaga mai le 2005 fai mai isi ua 15 tausaga a o lau faitau ua 20 tausaga talu ona faavae lenei Faalapotopotoga.

Sa amata i nai tagata toaitiiti pe na o se toa-6 ae sa o tatou saili i fafo e pei ona i ai lena vaiata, e taua tele. E le faaseseina se manatu ma e taua i le faalogologo le taumafaiga o na vaiata mo nei aso. Tatou te talitonu a lelei ona tapena nei, e manuia taeao. O lea ua tatou tolaulau le tele o tausaga ua alu ma mea sa tutupu ma na foi toa sa i ai i lena vaiata, i le asaina ma le sailia ma le faavaeina o le Faalapotopotoga ua tatou vaavaai ai i lenei vaiata.

I le molimau i Fiti lava ia, e leai se mea faapea i le Malo o Fiti, vagana private clinic nei e o i ai tagata e totogi ai tupe ae le o faatino e le Malo o Fiti le dialysis. O le Malo o Toga e leai se mea. Le Pasefika, vagana ia Amerika Samoa, vagana Niu Sila ma Ausetalia fuafua i le tatou... Ae to le pulou i le amataga mai o lenei fuafuaga ma faavae ai... O le ala lea o le fesili tele, o le a le mea ua faatupulaia mai ai i le 6 i le 200 ma ona tupu tagata ua i ai i le taimi lenei? Ae o le mau ma sailiiliga, ua 30% o le atunuu ua aafia i le mai suka ae 80% o lea ua tataua ona faamama le toto, o faamaumauga na.

FOFOGA FETALAI: Ua ou vaelupeina le saunoaga matagofie a lau Afioga i le Minisita ua i ai foi le manatu ua tatau ona fai se tatou malologa, ona faaauau ai lea o le tatou Fonotaga. E mo le silafia e maea loa le Lipoti a le Minisita o lo o saunoa nei ona toe tasi loa lea o le tatou Lipoti ma maea ai le tatou galuega. E faataatiaese Taulumaga a le Fono Aoao mo le malologa o le aoauli.

Na faataatiaese Taulumaga a le Fono Aoao mo lana malologa o le aoauli i le itula e 1.50 ma toe faaauau i le itula e 2.20 i le aoauli.

FOFOGA FETALAI: Ou te faasilasila atu ua toe amatalia nei Taulumaga a le Fono Aoao Faitulafono.

Faamalo le onosai i le tatou Maota, e le o toe tele foi se tatou galuega o lo o totoe. O lea ua sao i alo le tautega a o se faasiligamalosi o le aoauli sa alo atu i ai le paia o le tatou Palemene, malo le onosai.

E faataatiaese tatou Taulumaga mo le malologa o lo o saunoa talifuaitau le Afioga i le Minisita o le Soifua Maloloina.

Ou te tapa lau Afioga mo le faaauauina o lau saunoaga talifuaitau.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai ona ou... o lea ua uma ona e faafetai e tusa o le faasiligamalosi. Pau lava le fautuaga i lau Afioga ua fai si mamafa foi o lea taumafataga aemaise mea o fagu taumafa, mea o faguinu, aemaise lava o i lea ua tatou iloa ai ua tatau ona ave se Tulafono i mea nei o Fale Pizza, e atili gasegase ai le Palemene. Ia lau Afioga i le Fai Pizza ia o le a oo atu le Tulafono i se taimi.

Lau Afioga i le Fofoga Fetalai ona ou talanoa lea i tulaga o le ogaoga e pei ona taua e le Afioga i le sui usufono o Faleata aemaise foi le faamamafa a le Taitai o le Itu Agai i le valaau, ina ia silasila le Maota aemaise o tatou o Taitai o le atunuu ina ia mafai ona tatou foia, faafoia lenei faafitauli.

O le tele o sui usufono sa sausaunoa ma fautuaga tuualalo, e ese le aoga mo le agai i luma e faufau ai le tatou fale faamamatoto.

E momoli le agaga faafetai mai ia lava taimi ma le vaavaai, e tusa nei ma le 20 tausaga i le vaavaai i faamaumauga a le Matagaluega po o le fale faamamatoto talu ona faavaeina lenei Faalapotopotoga aemaise lava pei ona faavae mai e nisi toaitiiti ia a o lea ua...

O le tala lata mai ma faamaumauga mai le aso 1 Iulai 2023 i le 27 Fepuari 2024, ua faamaumauina ai e oo mai i le taimi nei, e 201 i latou ua faamamaina toto. E 210. E 23 tatou tagata i Salafai ma le 187 i Upolu nei, aemaise lava ia... E le o aafia i le numera lea le tele o tagata o lo o tautala i ai le Faalapotopotoga ua leva ona latou tuualalo ma fautua e omai e fai aoga, aua o lo o faatautaia e le Ofisa Sili o Pulega ma le Faalapotopotoga aoga foi nei e faufautua ma tuualalo i vaega foi ia ua fautuaina ua lata ona oo i le masini. O i la, e manatua foi e i ai vaega e 1, 2, 3 ma le 4. A oo loa la le tagata i le 4 ma le 5, o tagata sili la ia ona faigata. Ae a e maua i le 1, pe ua aafia lou fatugao a o la e lava e i ai

avanoa e faamatala ai e le Matagaluega po o le Ofisa ia fuafuaga uma e faasaoina oe mai na mea i le taumafai atu a le Faalapotopotoga e aoaoina ia aemaise lava le faaaogaina o taimi i tatou fualaau o lo o fautuaina.

A o le mea lea e tupu i le tatou atunuu vaeatu le faafofoga a Samoa, seiloga lava ua stroke, se i tulou, seiloga lava ua ogaoga faafitauli, ia faatoa iloa lea ua siimai i le falemai ma saili le... O le Aso Tofi na tea nei sa ou tatalaina ai le aso o fatugao o le Lalolagi. Sa ou faamamafaina ni tulaga o le puipuia o le vaiata lenei ia... E i ai lau tala foi lea vaeatu le Maota ma... sa ou talanoa ia i latou o lo o faafoea le tatou Faalapotopotoga, e pei ua tele le tatou tupe alu i le faaalaina ma le tau togafitiga o latou matutua vaeatu le... Ae a tatou target ina tamaiti ia e i lalo i aoga aemaise le faatoa tuputupu mai aua o lea ua faafofoga i le molimau a le Minisita o Faatoaga i se tasi o fanau ua maliu i le 7 tausaga, ua afaina le fatugao. O lona uiga e le faapitoa i le aumatutua, ae o le agaga o le polokalame e pei ona faufautua i fomai ia mafai ona tatou malosi le uunaiga o le atinaeina o alo ma fanau laiti, ia oo mai la i se isi sefulu po o le luasefulu tausaga o lumanai ua tatou maua se Samoa maloloina lelei fatugao.

E pei o le agaga lena o lea e tauave nei e le Matagaluega o le fautuaina o tatou tagata ina ia mafai ona own up ma o e... Ona fai lea o le matou polokalame i le Aso Tofi ona agai lea o le Faalapotopotoga i tua i falemai i Sataua ma Safotu lea e faafofoga mai le sui usufono. O le matua tumutumu aua na ou agai ai i Savaii i le taimi lea ma ou molimauina le tulaga o le... O nisi la tagata faatoa maua lea ua tete'i i le vaai atu ua agai i le stage 3 ia po o le 4 ae le i o lava e vaai ni fomai.

O le taua la lea o lea foi ua fautuaina malosi le Matagaluega po o le Faalapotopotoga o lo o faafofoga mai le Ofisa Sili o Pulega, ina ia uunaia ma faamalosi polokalame nei ma le faalauiloa agai i nuu i tua aemaise lava tulaga o le sailia. Pei ona ou molimauina ma avatu faamaumauga a le Matagaluega, e 80% o latou ua faamamatoto ma ua agai e faamamatoto i tulaga e pei ona... Ae 30% le aofai o tagata ua i ai auga ma aafiaga i lea gasegase.

Ou te faamauiina le faafetai tele i sui usufono mamalu na sausaunoa ma fautuaina le toe faatulai mai o le Komiti a le Palemene lea sa Taitaifono ai le Afioga i le Minisita o Faatoaga i na vaiata aemaise nisi o le Palemene o lo o i ai. Aua ou te manatua le taimi lea a o ou i ai i le Palemene i le 2005 sa ou mautinoa lelei na taimi i le tau faavaeina mai o le polokalame lenei ma le Faalapotopotoga. E to lava le pulou ia i latou foi sa faafoeina ma taumafai ina ia... Aua o le mea moni lava lau Afioga i le Fofoga Fetalai, ana leai lea polokalame, ua tatou vaavaai i le tele o tagata ua oo mai i le taimi lenei ua le tataua ona toe... e le o soifua pea. A o le tele o nisi o latou ua ova i le 10 tausaga o faamamatoto, se i tulou, e i ai nisi ua ova atu i le luasefulu tausaga. O lona uiga o lo o i ai pea le faamoemoe e soifua lelei pe afai e tausi ma usitaia ia tulaga pei ona i ai fautuaga a fomai.

O le auga atoa ma tulaga e pei ona i ai sau talanoa, pei ona aumai e le sui usufono o Siumu i nisi o Faalapotopotoga pei o le METI. Sa matou feiloai foi ma nisi o le Palemene sa matou... ma o lo o agai i le METI ma e tele le aoga o le METI i tulaga e pei ona i ai. O lo o faafofoga mai foi le alii fomai. Ou te alu atu i totonu o lo o i ai vaegatupe sa pasia foi e le Malo talu ai e tataua ona

faamatuu i tulaga e pei ona i ai ia o lea lava sa... Ae ua alu alu pei ua le faia le mea foi lea o masini o le moe taagulu, se i tulou. Ia ou te iloa o si toeaina fomai vaeatu Dr. Vermullen o se tagata sogasoga, o se tagata foi e vaaia lona maelega i le taumafaiga. O le tagata foi e sailimalo, a alu atu lava e poloka i lea mea ia e oso i le isi sitepu.

E pau lava le faafitauli na ou talanoa ai ia... i le sui usufono o Siumu aua e pei lava le sui usufono o Siumu e board ai i i i le METI ia aemaise foi le Tamaitai sui usufono mai le Alataua. O le aoga lea o mea ia. O lea la ua i ai le tuutuuga, ia taoto mai i faamoemoega aua o lea lava sa ave lava le fesoasoani i le METI i tausaga faaletupe uma lava ona o le naunauga ina ia mafai ona faaauau pea lea auaunaga matagofie. Pau le mea aua o lo o i ai feteenaiga a le METI ma le NKF e faapea e le fia galulue faatasi le NKF... A o lea la sa ou maua i le saunoaga a le Ofisa Sili o Pulega ma le Susuga i Fomai, e i ai le vaega e le mafai ona faafoia e le METI ona ua matuia tele. O vaega la ia po o le 5 i le 4, 4 i le 5 tulaga o le faaletonu o fatugao ae o isi vaega 1, 2, 3 o vaega tonu la na e aoga i ai le polokalame lea a le METI. Ma e faamauiina lau Afioga i le... pei ona e... e momoli foi le faafetai i lea foi tamalii ma lea foi vaega o auaunaga lagolago i le soifua maloloina ua leva ma sa faamatuu foi e le Malo talu ai fesoasoani pei ona tuuina mai.

Ia ma o lea ua vaavaai foi i ai ma ua... e le o faamutaina le fesoasoani a le METI e ala i tupe e ave i tausaga taitasi. Pau o le mea o lo o faafofoga mai foi le... ia ona o le toeaina, vaeatu le... e fai si manao ia faaleleia atili le tele o mea. Ae pau lava le mea e fautua lau Afioga Tuuu i le toeaina ia aumai ana accounts aua o mea lava na e pei e foliga e tau feteenai ai ma le toeaina, ae o le toeaina e ese le aoga o ana polokalame vaeatu le tatou Maota. E taua tele lea fautuaga aemaise tulaga e pei ona tulai mai.

O saunoaga a nisi o sui usufono ua faalautele se tali ma o le tele o fautuaga pei ona tuuina mai fautuaga ina ia toe silasila i faafitauli ogaoga nei, pau a lea o le tali pei ona tatou i ai, ia tatou atinae i le taimi nei. Afai e 20 tausaga talu ona faavae le NKF ae le o i ai se faaitiitia na o le faatupulaia, o lona uiga ua tatau ona tatou faia se fofo, ua tatau ona tatou ioe faatasi lenei Maota ina ia tatou tausia tulaga e pei ona i ai le taumafai. Aua e leai ma se mea e mafai a le tatou NKF pe afai na ona tatou talanoa i tulaga e pei ona i ai nei fuafuaga ae tatou te le i savalia ia aemaise ma tatou ausia tulaga o fofo e tatau ona i ai.

Ae ua ou faafetai tele i le valaau a le Afioga i le Taitai o le Itu Agai, ma e tuuina atu le lagolago malosia ina ia mafai ona tatou amata i le tatou Palemene ma Taitai ia tautalagia malosia tulaga e pei ona i ai.

O fautuaga e pei ona tuuina atu ma sa faamamafa i matou polokalame ma le NKF i le tatalaina o lenei faamoemoe, afai ua e aafia ma ua i ai tulaga... aua o le tele o nisi tagata mai suka e le iloa le auga ae seiavagana ua e oo i le fomai ma fai au sailiiliga. O lea foi ua faatonuina ma talanoa i le Ofisa Sili o Pulega, e tatau ona taulamua ina ia aumai le siaki o tatou faiga faapea, ina ia siaki muamua le tatou Palemene i le tele o tatou fonotaga aemaise lava tulaga e pei ona i ai a tatou fuafuaga.

O fautuaga sili ona taua pei ona tuuina mai e le tatou NKF, ia vaai loa se fomai po o se maota gasegase e vave faatino ai le suesueina o oe pe ua e aafia i

gasegase le pipisi po o gasegase tau fatugao. O lona uiga o tatou falemai uma i tua aemaise tatou nuu ma itumalo ia se i faamamafa ia fautuaga.

Lua, toe faatulaga lelei le soifuaga o le a e soifua e ala i le fuafua lelei o taumafa e te tausami ai, lea lava e aumai e fautuaga a sui usufono mamalu tulaga e pei ona i ai le taumafa. Faaititia pe tuu foi le tagofia o le avamalosi i le tele e le tatau ona i ai aua e tasi lena aafiaga o ia mea uma pe a... E le o faapea o faatonu atu e le Minisita e aua le toe tagofia le ava ae tasi lena mea, o le fautuaga sili lea na aumai i tatou fomai ia ma tuu le taumafa tapaa pe a o e silafia o...aua a oo loa ina faamamafa le Tulafono i le tulaga e pei ona i ai ma tatou o lava ia tatou tagofia le mea lenei. O lona uiga o mea na e ao ona tatou tilotilo i ai, faagaioi lou tino e ala i galuega po o taaloga po o le faamalositino. Ma le mea mulimuli, aumai le fautuaga malosi ia usitaia fautuaga e tuuina atu e fomai mo le tausiamai lelei o lou gasegase, usitaia fautuaga mo le taimi ma le inumaga o fualaa ma vailaau o lo o tausiamai lou gasegase aua le faaaogaina ma le tatau o fualaa aemaise o fualaa mo le gasegase o le gugu e pei ona taua. Aua e tasi lea mea ua aafia tele ai tulaga e pei ona i ai. O fautuaga la ia a tatou aua o le tele na o tatou pe fautuaga mai lava nai fomai ae pei tatou te le ano i ai. E pei ona tuuina mai le tele o latou fautuaga ae fai mai a o lea ou te malosi, e leai se mea ae o le tele o tatou gasegase ua lauina atu i le falemai, e pei o le matuia lea o le tulaga e pei ona i ai. Ae ou te talitonu o ia mea uma ua tatou manatu e taua tulaga e pei ona i ai tatou fuafuaaga.

O nisi o fautuaga e pei ona aumai ai foi le tuualalo e i ai le togafiti fou lea na taua e pei ona faafesili le sui usufono mo Safata 1, ia, o le togafiti e faaoga ai le taga o lo o taua ia na ona fuafua ae le i faaaogaina. O lea sa saili i le tatou Pulega ae o lea e aumai na ona talatalanoa ma fuafua ae le i faaaogaina i le taimi nei i tulaga e pei ona i ai.

O inisinia, o la lava e i ai tatou inisinia ae i ai nai mea sa tutupu i inisinia i se vaitaimi o le tausaga 2021/2022, sa i ai nai tamaiti sa train ai a o le mea e tupu ua malosi le faigaluega onana le aualii nei vaeatu alo ma fanau o le atunuu ia ua lote tatou masina ma mea faapena, e i ai mea sa tutupu ai ae te i ua suanoa mai le Pule Sili. Ou fai atu, afai o e iloa e sefe nisi tagata o lo o i ai tatou masini e faafoe ai, ona e le tatau ona faafoe ona, se i tulou, le Maota ia masini nei, nei meaane ua sese ona faatino.

O lea la lau Afioga i le Fofoga Fetalai o lo o lava ma lelei tatou masini e pei ona i ai. O le tele foi la o taimi ua train faapitoa lava tausisoifua ma latou aufaigaluega ua maua foi latou tusi pasi, e faapitoa lava le tagata mai Niu Sila e i ai lona poto faapitoa e train ina tatou staff nei mo le faaaogaina tatou masini.

E ese le taua o lea foi faamoemoe i sauniga a le Pule Sili ma le tatou NKF i tulaga o le faatinoina o ia fuafua uma. O lo o lava le tatou staff o lo o tuuina mai e 51 i latou e i ai le tatou full time Doctor, ma le tatou part time Doctor e fesui ai laua i tulaga o faiga ma le vaaiga. E pei o latou foi lea sa faasavalua le polokalame lea i Salafai.

O lo o i ai foi le Team mai Ausetalia e faafa ona omai, le team lea mai Ausetalia e i ai le fomai tipitipi sei tulou. O le fomai o le vaimoe, o le fomai e faapitoa mo alatoto pei ona i ai e faa-fa ona omai. E i ai le tatou fomai na te vaaia atoa ia fomai nei e autovaa mai o se faiaoga i ia foi matata e faalua ona sau i le

tausaga, a o ia tagata, le team lea e aumai e totogi lava e latou le latou omai aemaise mea e nonofo ai. E na o pau a le mea la e moomia o feaveaiga o latou i mea mai latou faletalimalo i tulaga e pei ona i ai. O le ala lea tasi ia Samaria agalelei o lo o fesoasoani malosi i le faafoeina o le tatou Faalapotopotoga i tulaga e pei ona i ai ia fuafuaga uma.

O nisi o saunoaga a sui usufono i fautuaga ma tuualalo e pei ona tuuina mai ia test ma silasila i tulaga o tatou taumafa mai fafo e pei ona taua moa ma tulaga faapea e tatau ona test i le SROS. Ia lea ua i ai foi fetuunaiga ma le Minisita ua leva ona talanoa foi le Minisita o Faatoaga i le tele o fonotaga a le matou Kapeneta, aemaise lava le faalauiloa a le SROS e oo foi i vaega o le soifua maloloina e moomia le fesoasoani a le SROS o lea lava e galulue faatasi.

Ae taua tele fautuaga ua tuuina mai aemaise lava tulaga o le fauina o a tatou fuafuaga mo le agai i luma.

Lau Afioga i le Fofoga ou te iloa o le tele ia o manatu e pei ona ou fai atu...

Tofa LEALAILEPULE Rimoni Aiafi: Lau Afioga i le Fofoga Fetalai.

FOFOGA FETALAI: Ia malie lau Afioga i le Minisita se i tulai mai Faleata 3.

Tofa LEALAILEPULE Rimoni Aiafi: Faafetai lava lea ua fofou faaiu le saunoaga matagofie a le Afioga i le Minisita, e le toe... E tasi a si vaega lea o le Minisita e lelei tele i gagana ia faa-Samoa. O le upu lea ua leva ona talanoaina i le Palemene lenei le igoa lea o le faamai lea non communicable disease o faamai le pipisi. E pei e le o atagia ai le ogaoga o le faamai i le igoa. E tatau ona toe silasila i ai lau Afioga i le igoa lea, faaigoa i se igoa e tau mai loa e fefe loa, pe te sauni ai loa a o le mea lea o le faamai le pipisi, e pei o se faamai foi lea e le pipisi mai ia te au, ae faafetai lava mo tali malamalama, pau lava lea o le vaega lea e ese le manaia ae tali le Minisita e ou lana Matagaluega.

A o lea e saunoa mai le Minisita lea o Fesootaiga i mea ia privatization ma mea ia, lau Afioga e pei ona tatou talanoa ai, o lea ua saunoa sao le Minisita e le faia i Fiti e privatize, e le faia i Toga a o le a mea le faia e tatou? Na o le \$10 ae \$500 i le aso. O le mea lena e fuafua aua e talanoa mai loa i le mea lea ona matou talanoa atu lea i le mea tau o le mortality rate o lena e te fua i ai le soifua maloloina o tagata o le atunuu. Faafetai i lau Afioga i le Fofoga o le Fono.

FOFOGA FETALAI: Tulai mai lau Afioga i le Minisita leaga o lea e...

Afioga Hon TOELUPE Maoiautele Poumulinuku Onesemo: E pei e ese le mea lea e agai i ai le saunoaga nai le mea sa ou agai le manatu o lenei foi usugafono i le tulaga o le tamaoaiga ua tupu le tamaoaiga o le atunuu, tupu le tausiga i meaai ma mea ua maua ae pei o lo o faatele i meaai tuu aisa lau mai.

E pei o le agaga lena ae ua faatuatuanai nai a tatou lafumoia tulou le Maota ma tulaga faapena. O le tulaga lea e agai i ai le \$1 miliona lea e avatu. Ma le agaga faaloalo.

FOFOGA FETALAI: Mo le faasaoina o lau Afioga i le Minisita, se i tulai mai lau Afioga le sui usufono mo Safata 1.

Afioga LEAANA Ronnie Posini: Lau Afioga i le Fofoga Fetalai faafetai tele lava i lau Afioga i le Minisita lea ua manino lelei le folasaga a lau Afioga ma tulaga o le faamalamalamaga e pei o lea na ou taua le fuafuaga lea i le mea lea e faaoga i ai le taga lea faapea o se tomai fou lea a foma. Faafetai tele lava, a o lau tuualalo leaga na ou talanoa i nai uso o lo o aafia i le tulaga, pei se tulaga foi lea aua pei e vaeatu le Maota lea, e pei e foliga mai e tui a i taimi uma, taimi uma, a le o mea ia o aao, ia ua oo lava i luga o le mea lea ua tui. Na faapea foi latou tala e pei e i ai foi faiga lea ua fai iinei e fai le tube foi lele e tui na ona avatu lava o le masini faapipii i ai alu loa i ai. Ae pei o le latou lea mau na tau aumai. Ae faafetai tele lava i lau Afioga o lea ua matau ua agai i ai fuafuaga a le Matagaluega faafetai.

FOFOGA FETALAI: Lau Afioga i le Minisita.

Afioga Hon VALASI LUATIPOFANUA TOOGAMAGA TAFITO SELESELE: Faafetai e moni lau Afioga i le sui usufono mamalu o Faleata, o le NCD po o le Non Communicable Diseases e pei o le mea lea aemaise le primary health care e mafua mai lava i o tatou aiga ma o tatou tupuaga aemaise le amata mai i o tatou afioaga ma itumalo.

O le mea foi la lea lea ua fautuaina malosi o lea foi ua tuuina i polokalame nei ina ia toe faaola malosi mai le tatou Public Health Care, aemaise sa tatou i ai i ia aso e pei ona talatala lau Afioga i le sui usufono. Sa tatou laititi mai aso ia o le malosi o Komiti Tumama a Tina. E pei e o atu le service a le tatou Falemai i tua ma tatou Polokalame ua leva ona tapena e Tina mai tua ia polokalame ma sa o faatasi le Ofisa lea o le Public Health ma Tina ma Tamaitai o le nuu e asiase le aai atoa.

E tasi la na mea o lea e foliga mai sa talanoa i Matagaluega ina ia faaolaola i tulaga e pei ona i ai ia aua ne i le faia aua e taua tele. Ma o lo o taumafai ai foi i ai le Matagaluega aemaise foi poloakalame leni a le NKF i tulaga e pei ona i ai tulaga o le tatou Tumama aemaise lava le tausiga o mea lea o lo o laualuga i le tele o fonotaga a le Lalolagi aemaise le WHO, o le primary Health Care aemaise lava mo NCD's tulaga e pei ona i ai le faafoeina ma le taumafai o atunuu e pei o tatou ina ia tatou tulitloa ia tulaga ina ia faaitiitia le tulaga.

Ona ou oo mai lea i le mea o lo o i ai nai fautuaga na tuuina mai, ae na o ni nai faamalamalamaga laititi lava ina ne i meaane ua faapea o le \$1000 lea e charge ai le sitiseni Samoa. O tagata foreigner foi lea e pei o palagi se i tulou, o tagata e le passport mai iinei ia tatou pe sitiseni a o se Samoa o le tagata lena o lea ave ai le \$1000. A o le \$600 e pei ona faatulagaina o le sitiseni Samoa mai Niu Sila, Ausetalia ma Amerika, ae silasila foi le Maota, ua outou silasila i asiasega a le Komiti ma nisi o le tatou Palemene, e le faigofie ma e le taugofie le run ina o le tatou NKF aemaise le Falapotopotoga e pei ona i ai i leni vaitau, ae pei lava ona taua e Faleata 3 tulaga e pei ona i ai tau o le tatou masini nei,

po o le faamamaina. Manatua foi e faatolu ona faamama le toto o le tagata soifua i le vaiaso.

O lea faatolu o tatou lava tagata o lo o nonofo i Samoa aua e pei o le mafuaaga na fau ai lenei mea mo tatou tagata Samoa o lo o nonofo i Samoa. O le tau la e i ai o tatou tagata e \$50 i le vaiaso lona uiga a faatolu ona faamama le toto pe a ma le \$17 ma sene i le faamama e tasi o tatou tagata.

Ae a talanoa loa i le sitiseni Samoa mai fafo, o lea foi sa ou faamaninoina i le tatou fonotaga o i ina la... ae le faapea afai e sau le tagata pe atoa le masina o nofononofo i Samoa i ni ona faafitauli i inei, o le mea masani lava e muamua apalai mai se avanoa mo nofoa e leaga o lo o i ai lava polokalame a le tatou Fale Faamamatoto i tatou foi gasegase i Samoa ina ia faatulaga le nofoa mo aso taitasi o le vaiaso.

Ae afai e oso faalava mai le tatou tagata mai fafo e aunoa ma se... e pei o manatu foi lava ia a tatou faapea tatou o i Samoa e mafai a ona fai, e tatou o atu a e faigofie a o le tulaga lena o lea e faafofoga mai foi le Lalolagi. O tulaga lena ia mafai ona tatou fetufaai ma faasoa ae i ai lava le agaga e tele foi nisi o tagata ua autovaa mai ma fesoasoani i ai i tulaga e pei ona i ai lo latou taumafai mai.

O tatou lava o le avafatafata ma le faaaloalo ae tatou te fetuiai i le faataualofa aemaise tulaga tiga ma faigata, ae taumafai lava ina ia mafai ona i ai se fesoasoani.

Lau Afioga i le Fofoga Fetalai ona ou oo mai lea i le faaiuga o sau faamatalaga. Ae ou te le i nofo i lalo, ou te momoli le faafetai tele i lau Afioga i le Taitai o le Itu Agai aemaise o sui usufono mamalu uma o lena itu sa sausaunoa aemaise tuualalo taua ma faufautua aua le Faalapotopotoga Tau Fatugao a le tatou atunuu. Aua o le mea moni lau Afioga i le Fofoga Fetalai e le taugofie e le faigofie mo le aufaigaluega le tulaga o le faafoeina o ia matata. Faafetai i lau Afioga i le Pule Sili lau Afioga Mulipola aemaise foi le Matagaluega po o le augalulue aemaise foi le Board a le tatou NKF i le Taitaifono ma ona sui usufono mamalu e le gata i lea o le aufaigaluega aemaise lava fomai o lo o tauaveina ia matata.

Aua o le mea moni e ese lava matata faa-fomai faa-NKF ese foi matata a fomai o lo o galulue i le tatou Matagaluega o le Soifua Maloloina, a o lo o vaaia pea le agaga galulue faatasi ma tulaga e pei ona i ai.

O le fautuaga lau Afioga i le Pule Sili o faafofoga mai, sa ou fautuaina lau Afioga ina ia faatino siaki a le Palemene i le isi fonotaga o lumanai ona ua vave lenei fono, ma ia faaauau pea aua o le mea e le faapea e tasi le siaki ona tuu ai lea e tatau lava ona faaauau, aemaise o polokalame ina ia faatinoina mo tatou nuu ma afioaga i nuu i tua ia tofua falemai ma taimi faatulagaina e pei ona faafofoga mai. O lo o tatala foi le avanoa i tatou Private Business e pei o tatou GDs faafetai mo a outou galuega lelei o i ina o lo o fautuaina foi ia aua ne i tulitulia na o le falemai. A o fea lava le mea e lata i ai le tagata soifua o le tatou atunuu, ia faigofie ona siaki oe ma ia vaai se vaiga faafomai ina ia mafai ona foia ia faafitauli.

Le Palemene, faafetai mo le faafofoga aemaise o se lui mo le tatou Palemene ia tatou tausisi i a tatou fuafuaga ma tatou Polokalame, tatou galulue e atinae tupulaga lalovaoa o le atunuu ina ia oo atu i le isi 10 i le 20 tausaga o lumanai

ua tatou leai a o lo o tulai mai se matagofie ma se lelei o ia fuafuaga o mea sa outou fuafua ma tatou taumafai ina ia faaleleia aua se lumanai manuia o Samoa. Aua e le mafai e se upu a le Minisita po o se faalauiloa a le Matagaluega ona tauaveina le finagalo lava o le tagata lava ia aemaise lona ia foi faitalia.

Ia le faafofoga mai a Samoa Aoa o i fafo ma... ia aua ne i faaseseina outou i faapea ua taugata le faamamaina o le toto, e sili atu ona taugata Niu Sila, Ausetalia ma Amerika, a o Samoa o le matua taugofie lava e oo mai i le aso. Ia faamanuia le Atua alofa foi isi ou itumalo e le tau taulagiina Vaisigano 2 ua outou manino ma malamalama, leai o le tou sui usufono lava lenei e tu atu ia e tou te faafofoga ai a i lona leo i fonu uma. Leai e le o moe le tou sui i le Maota, ia manuia tele le Afioga i le Palemia ma le Kapeneta, manuia le Taitai o le Itu Agai ma le Sui Taitai ma le la itu. Faamanuia le Atua i Ofisa Sili o Pulega aemaise Ofisa uma o le tatou Maota, soifua ma ia manuia.

FOFOGA FETALAI: Ua faamalo saunoa i lau Afioga i le Minisita e tusa ai foi o le talifuaiteu foi i nisi o mataupu aoga sa laga e le Maota, ia malo a faafetai malo le galue aemaise foi le Faalapotopotoga o Fatugao ia malo foi le galulue i le aufaigaluega.

Lau Afioga i le Taitaifono tulai mai mo le lafo.

Tofa ALE VENA ALE: Faafetai i lau Afioga i le Fofoga Fetalai, faafetai foi i lau Afioga i le alii Minisita i le saunoaga matagofie foi aua le talifuaiteu i mataupu uma sa laga e sui usufono mamalu e tusa ai ma le Lipoti. Lau Afioga i le Fofoga Fetalai ae le i faatu le lafo ou te talosaga atu ona e fia momoli atu faamaisega. O lo o lagia le Afioaga o Ale ma Ulu ma o la Aiga aua le tuumalo o le afioga ia Alofisaupo, le Tofa i le Igoamatua ia Ulu Kini faapea foi le tina ia Sinuu ma le... Sa i ai le faamoemoe tatou te faatasi i le tuumalo o... aepeitai o lea ua outou silasila mai o lea ua faaauau fonotaga a le Palemene.

Ia o lea ou te faamaisega atu ai ma faamafanafana le Agaga o le Atua i le valaau paia i le afafine.

Lau Afioga i le Fofoga Fetalai ua ou tulai atu ma le faaaloalo tele e faatu le lafo; *Ina ia faamaonia e le Fono Aoa le Lipoti a le Komiti e pei ona iloiloaina nei i le:*

P.P.2022/2023 Nu.157.

O le lafo lea lau Afioga. Ma le faaaloalo lava.

Faaluaina e le sui usufono mai le Vaa o Fonoti, Minisita mo Leoleo ma Falepuipui ma le sui Usufono usufono mamalu mo Aana Alofi I.

Na faamaonia le lafo.

FOFOGA FETALAI: Ou te tapa lau Afioga i le Minisita mo le Soifua Maloloina mo le lafo.

Afioga Hon VALASI LUAPITOFANUA TOOGAMAGA TAFITO SELESELE: Lau Afioga i le Fofoga Fetalai ou te faatu le lafo, *Ina ia*

faamaonia e le Fono Aoao Tali a le Malo i Fautuaga a le Komiti o le Vaega Tau le Va Fealoai. Faafetai

Faaluaina e le Minisita mo Leoleo ma Falepuipui ma le Minisita mo Faalapotopotoga Tumaoti a le Malo.

Na faamaonia le lafo.

FOFOGA FETALAI: O le tatou Lipoti mulimuli...

7. P.P.2023/2024 NU.91, LIPOTI A LE KOMITI O LE VAEGA O ATINAE ESEESE I LE P.P.2022/2023 NU.162, LIPOTI FAALETAUSAGA A LE AUAUNAGA O VAA A SAMOA MO LE TAUSAGA FAALETUPE 2021/2022 - ILOILOGA

7.1 P.P 2023/2024 NU.152, TALIA LE MALO I LE P.P. 2023/2024 NU.91

FOFOGA FETALAI: Tulai mai lau Afioga i le Taitaifono o le Komiti o le Vaega o Atinae Eseese.

Afioga FEPULEAI FAASAVALU FAIMATA SUA: Lau Afioga i le Fofoga Fetalai ou te faatu le lafo; *Ina ia faautagia e le Fono Aoao le Lipoti a le Komiti o le Vaega o Atinae Eseese o lo o tuuina atu ai ana Sailiiliga, Fautuaga ma Iugafono.*

Faaluaina e le sui usufono mai Lefaga ma Faleaseela, sui usufono mo Vaisigano 1 ma le sui usufono mo Aana Alofi 1, sui usufono mo Safata 1 ma le sui usufono mo Falelatai ma Samatau.

Na faamaonia le lafo.

FOFOGA FETALAI: Ou te tapa lau Afioga i le Minisita mo Galuega, Felauaiga ma Atinae Eseese.

Tofa Hon OLO FITIAFOA VAAI: Lau Afioga i le Fofoga Fetalai ou te tulai faalua atu i lenei Fonotaga, ou te faatu le lafo; *Ina ia faautagia e le Fono Aoao Tali a le Malo e faatatau i Fautuaga a le Komiti o le Vaega o Atinae Eseese.*

Faaluaina e le Minisita mo Faatoaga ma Faiga Faiva ma le Minisita mo Faalapotopotoga a le tatou Malo.

Na faamaonia le lafo.

FOFOGA FETALAI: Ua maea faautagia e le Fono Aoao le Lipoti a le Komiti faapea foi Tali a le Malo i Fautuaga a le Komiti.

Ia o le avanoa lenei mo se tasi o sui usufono e fia saunoa i le tatou Lipoti. Tulai mai lau Afioga i le Sui Taitai o le Itu Agai.

Tofa Hon LAUOFO FONOTOE NUAFESILI PIERRE LAUOFO: Faafetai mo le avanoa lau Afioga i le Fofoga Fetalai e tuuina atu ai foi nai manatu, nai motugaafa e tusa ai ma le tatou Faalapotopotoga lea o Vaa o le Samoa Shipping Services.

O se Faalapotopotoga taua tele ua leva foi ona taumafai mai, a ua tele foi nai tausaga o manuia ai le toatele o alo ma fanau o le atunuu faapea foi nai o latou aiga. E pei o le mafuaaga foi lea sa tutulai atu ai lenei itu i lenei vaiaso ae faapea foi sa taua i lenei aso, e molimoli atu nai fautuaga e tusa ai ma le tatou Aoga lea o le Maligi po o le Maritime School ona o le aoga lea o lea e faaoga e le tatou Kamupani nei ia alo ma fanau ua faauina mai i le tatou aoga lenei. Ma o le taua ia o lenei Polokalame, o le fesootaiga lea o le tatou aoga lea ma le Kamupani lea o le SSS ona o faiga faapaaga a le tatou SSS ma Kamupani Vaa Tetele i atunuu e mamao i fafo, aemaise lava le kamupani lea o le MSC. O le kamupani lea o lea matau o lo maua ai galuega a fanau seila a le tatou atunuu i luga o vaa lau pusaoloa faapea foi mo mea o meli laupasese. Ia ma o se fesoasoani tele foi lea i le tamaoaga o le tatou atunuu, o lea e matauina o lo o manuia ai le tele o nai alo ma fanau.

O le mea e matauina foi i lau matau atu, masalo po o le 10 pe sili laitiiti atu i le 10 tausaga po o le 15 tausaga talu ai pe a, e na o le tasi lava si tamaitai o lea ou te manatua sa i ai i le... sa avea ma tamaitai seila sa galue ai i galuega ia i luga o vaa. A o lea ua matau atu o lea ua faatupulaia nai alo tamaitai o le tatou atunuu ua maua ai avanoa e galulue ai i luga o vaa nei, ma e le faigofie foi nei faamanuiaga ua maua. Ae faafetai foi i le Ofisa Sili o Pulega ma le Pulega i le tele o tausaga aemaise lava le vaiata po o le vaiata o le Lipoti lenei 2021/2022, aua e pei o vaiata ia o lea faatoa tuana'i atu lava le feagai ai o tatou ma le faamai o le Koviti-19.

E le o po se lilo i tulaga sa aafia ai foi nai alo ma fanau ina ua aafia le lalolagi i le faamai lea sa poloka i luga o meli ma vaa sa galulue ai i atunuu e mamao, ae tele le galuega ma le luitau sa feagai ma le Ofisa Sili o Pulega ma le Pulega i lenei vaiata i le taumafai lea e toe faafoi mai nai o tatou alo ma fanau sa o latou faapena ona poloka ai i fafo ona o le faamai sa aafia ai le lalolagi ma faapena ona taofia ai le feoaga o vaa.

Ae faafetai o lea ua matau atu o lea ua maua tupe faasili e pei o le vaiata lea o aafia tatou ma le lalolagi i le Koviti-19 ia sa faaletonu ai le tupe maua a le tatou Kamupani. Ae ina ua tuana'i atu ia lenei vaiata leaga sa feagai ma tatou, o lea ua matau atu i le Lipoti a le Komiti Faa-Palemene ua toe recover po ua toe maua tupe faasili i le tuana'i atu ai o le Koviti-19. Ae matau atu la e oo mai i lenei vaiata ia e momoli atu lava le faamalo ma le faafetai i le Pulega ona ua siisii pea i luga le tulaga o tupe maua.

A o tulaga ia e pei ona i ai fesootaiga ma le tatou Aoga lea o le Maligi e taua tele ona e... o i foi e taua ai le siitia o le tulaga o aoga o lo o i le aoga Maligi, ina ia aoina ai isi tulaga maualuluga tulaga Ofisa i luga o vaa aemaise mo mea o galuega faa-Kapeteni ina ia ausia e le tatou aoga lea agavaa faapena ma

faailoga maualuluga aua la galuega maualuluga ia e fesootai ai ma le tatou Kamupani lea. O se tulaga taua lena i le matau atu i ai.

O le mea lea e momoli atu ai le faamalo ma le faafetai i nei foi galuega lelei sa faatino aua o lea e matau atu, ia pei o le Afioga i le Minisita o Tupe lea ua seei i le tofi Minisita o Tupe, o ia lea sa Ofisa Sili o Pulega i lena vaitau. E momoli atu foi ma faamau le... se faafetai ma le faamalo a lenei usugafono i le Afioga i le Minisita o Tupe, i lona ia foi tulai mai i lena vaitau e taumafai le tatou kamupani.

Ia faafetai lau Afioga i le Fofoga Fetalai mo le avanoa.

FOFOGA FETALAI: Ia malo le saunoa, tulai mai lau Afioga i le sui usufono mamalu o Faleata 3.

Tofa LEALAILEPULE RIMONI AIAFI: Faafetai i lau Afioga mo le avanoa ia e le umi, e faamauina foi pei ona saunoa le Afioga foi i le Sui Taitai aua o lea ou te vaai atu o le Lipoti lea, o lea e saina mai ai le Afioga i le Minisita o Tupe. O le mea taua o le Lipoti e \$20 miliona o le tupe lea e inject lea e faaopoopo i le tamaoaiga o Samoa i galuega ia a seila ma i latou o lo o auala atu i lalo o le SSS. E le o se tupe laitiiti lea tupe ae ou te talitonu o lo o i ai le avanoa e faalautele ai ma faatele ai le tupe lea.

Ona oo mai lea o lau faamatalaga lau Afioga i le fautuaga i fautuaga a le Komiti. O le fautuaga 1 i le aoga lava lea ona e manatua foi o tatou seila ia e ave i fafo e tauva foi ma seila a isi atunuu. E i ai atunuu o le Pasefika e faamoemoe tasi lava lo latou tamaoaiga i seila nei i galuega faa-seila. A o tatou tasi lea... e le o lelei ona faalauiloa i aoga ae tasi lea alagatupe tele a tatou. Faafetai i le faafoeina o le Kamupani lea ua leva ona faafoe mai e lelei le faafoega o le Kamupani ma tatou tamafanau e ave i fafo. A o le mea lea e tilotilo i ai i le Aoga ina ia sao tonu a le mataupu lea e aoga ai i totonu o le aoga ma le manaoga o Kamupani tetele ia mai fafo.

Ia avatu a tatou seila e fetai tonu lava le mea lea o lo o aoaoina ma manaoga o vaa tetele nei, ona faigofie lea ona faamuamua o tatou tagata faigaluega i lo tagata mai isi atunuu o le Pasefika ma isi foi atunuu o le lalolagi. E 103 i latou ia na o atu i le tausaga lea, e toatele. Faafetai. A o le fautuaga la lea na aumai lona lua a le Komiti, ia taumafai e tilotilo e le na o mea foi ia tau seila a o mea foi ia faa-seila i lalo... faa general works foi ia a o le taumafai e tilotilo i luga o le Office level i luga i... agai atu i luga i le isi tulaga maualuga i le faafoega o vaa mo mates foi lele o class... ia oo atu ai i luga o le Pailate po o le Kapeteni ae le gata i lea o le vaaiga o afi o ofisa e pei o le tulaga lea o lea ua tataua ona tagai i ai le tatou aoga lea. O lea la e aumai le fautuaga, pe mafai ona toe aveese mai lalo o le NUS ae faatutoatasi pe tuu loa i lalo o le Kamupani Vaa a le SSS. Na umi lava se felafolafoaiga a le Palemene i le mataupu lea talu ai. E manatua foi sa fai le aoga sailor a le SSC Samoa Shipping Corporation ona fesiligia lea e le Komiti i le taimi lea na matou i ai, o le a le mafuaaga ua faaauau ai pea le tou aoga a ua le o e fai le aoga lea e tasi i o i le NUS ma le alu solo o resources a le Malo.

O le tali na tuuina mai e le Ofisa Sili o Pulega o le Kamupani Vaa i lena taimi e tau eseese laititi mea ia e aoga ai le vaega lea i gauta ma manaoga lea e mananao ai matou sailor ia pe a foi mai. O le tele o nai tamaiti a iu mai e toe omai tigaina matou e ao. E eseese e pei o lea ua tele i le Theory gauta ae le o lava ai le manaoga atoa i le faatinoga o galuega i luga o Vaa.

O le ala lea na fai ai lava le aoga lea a le Kamupani Vaa i tausaga se tele, ona filifili loa lea o le Malo talu ai e tapuni ae toe omai e faifaatasi le le aoga lea i lalo o le NUS ona o le aoga fou lea ua fai i gatai i i tele le tupe na alu ai ma le faafouina ma le upgrade ina o le aoga lea.

O lea la ua toe aumai le fautuaga a le Komiti Faa-Palemene ua tataua ona toe tilotilo le Faigamalo i le mea lea na sau ai muamua, ona la o faafitauli ia ua toe tulai mai foi. O lona uiga e sao lava le mea lea na aumai muamua na ala ai ona fai le aoga a le Samoa Shipping Corporation. Ou te lagolagoina la le finagalo lea o le Komiti. Ou te lagolagoina aua o le mea lava e tasi. E pau a le mea o le a aveesea foi lena avega ma le NUS latou ae tuu tonu i lalo ia latou o lo o lava lo latou silafia ma le malamalama i manaoga o lea e moomia mai atunuu i fafo aemaise foi totonu o le tatou lotoifale i le aoaoga tonu i le curriculum ma le ituaiga training e ave sao lava i tama fanau. E le gata i lea, e le gata i levels i lalo o le level 1, level 2 seia oo lava i Office Level ua tataua ona lea ona oo i ai le tatou aoga aua ua lea ona fai le aoga lea e le o se aoga fou. Ae ou te lagolagoina le finagalo o le Komiti ma le Tali mai a le Malo o lea ua tagai i ai i le tulaga lea. O lou lea talitonuga a o le mea lava e tasi a o lea o lea ou te iloa e tele le efforts e tele le agaga o le a faatino ai le aoga, tele foi le tupe ma tulaga faapena o le a tuu ai i i pe a toe fetuunai mea nei. O mea lava e fai e tatou. A tatou vaai atu o le mea lelei ia faaauau, ae a tatou vaai atu o le mea e tataua ona toe sui, ia o le tulaga lena e i ai.

A o le isi la fautuaga lea e i ai e faapea e tuufaatasi le SSS ma le SSC, ou te matua a i ai lau Afioga. E eseese mea ia e lua o le kamupani vaa lea a tatou o lea e nafa mo le sailor a o vaa, i feoaiga a o tatou tagata i motu e lua ma Tutuila ae pei o le SSS o mea lava tau tama sailor, ma e galulue faa-Ofisa i luga o vaa tetele.

E le lagolagoina la le finagalo lea, le fautuaga lea a le Komiti Faa-Palemene ae pei a o lea foi e le lagolagoina i le Tali mai a le Malo. Faafetai. Manuia le tatou fono faafetai.

FOFOGA FETALAI: Malo faafetai, malo saunoa. Tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUJELUA SAILELE MALIELEGAOI: Lau Afioga i le Fofoga Fetalai ua ou vaai atu o lea ua tea laititi lava le 3 a ua atili ai ona ou fia fono se i tau lava taeao i le taua tele o mataupu ia e talau mai.

O lea ua uma ona saunoa sui usufono e toalua i le Lipoti lenei, ma o le itu e faataua o le maua pea o avanoa nei e tatou tamafanau e feoi ai luga o vaa i le lalolagi, ma o lea foi e matau ua aafia ma tamaitai aua o luga o vaa mo mea o crewships e leai lava se mea e ese ai ma faletalimalo. O lona uiga o tamaitai nei

e galulue i luga o vaa meli tusa o la e galulue i faletalimalo . O le itu taua lena o i ai foi ma tamaitai. Ae ua fai si leva o ou mulimulitaia pea gaoioiga a le tatou Kamupani lenei e amata mai lava i aso a o i Mulifanua le latou Headquarter faasolo mai lea i gatai ma matauina pea le faagasologa o le aoga ma le ave o tamaiti i fafo. Ma e so o se taimi a e valaau mai ai le Matagaluega o le a o le a o tamafanau e fia fai sina au upu ou alu, fai le upu ma ave lau fautuaga. Ona e faatolu ona ou aafia i mea ia o le Taitai o le Malo ona e tasi le tama na... e le i toe maua alu atu lava ma le iloa atu ai. O le isi tama a o isi tama e toalua na aafia i le fasiga o le Filipaina maluu i Ausetalia. O le isi tama na faaoga le fesootaiga faava o Malo e faasaoina mai ai o i Take ona o se faalavelave na tupu i totonu o le Night Club.

E le mafai la ona ou tuua lou auai pea i taimi e o ese atu ai ma ave lau fautuaga vaai la outou amio. O le problem tele lena o lea e faafeagai lea aumai i i o le amio. E o lua ma le mea lea o le ava lea foi la e lavea ai le toatele o tatou tamaiti. O le fautuaga tele i matua o lea ua faigofie ona fesootai ia telefoni, aua le tuuna le tou fesootai o fanau ave i ai le fautuaga lelei, soso ese ma le ava aua le fai kegi ma ia lava le seleni e fesoasoani mai ai i aiga o lea e faatali atu.

O le amio a la o se mea faigata tele lau Afioaga. O le mea lena e pesepese ai pea le tatou Malo. E i ai le taimi na matou o ai 3 tausaga talu ai, na ou alu ai le i fonofono tele a... fonofono foi faaletausaga a le Iuni Lakapi matou o faatasi ma tama e o le vaega tele e 20 ma ona tupu e o i Spain ae alu na o le toatasi e alu i Italia.

Na matou toe talanoa atu lava lea. E foi mai le faigamalaga ae toe omai ma isi e i ai faafitauli sa feagai ina ua matou taunuu mai i le isi airport, ua logo atu e le maua.. e leai se visa e lele ai agai Niu Sila. E tele lava gaoioiga sa ou faia mo tatou tama fanau, i le faafesootai maiga o le Ofisa i le mea e tatau ona fai mo tama ia ua faaletonu. E taua tele le tulaga lea e tatau ona faaauau. E i ai le isi taumafaiga na fai muamua i le mea lava lea, e tatau ona tuufaatasi. Na iu lava ina faamuta ai e le isi foi Minisita ma faataape ai le afaigaluega ae fai mai e aveifo e tuufaatasi e fai e le Samoa Corporation

i le talitonuga maumauai o lena Minisita e leai se aoga ae na iu lava ina toe fai. Ua fai fai fai ua matua aafia a tatou tama fanau. E i ai le agaga foi lele, se a fai lava o la e lelei le mea la e i ai se aua le toe lotea ma le tele o mea e tau fufulu.

E faapena foi la i le tulaga lea ua tulai mai i le fetotoai o mafauaiga ia o lo o i ai i le faatasi atu ma lea faatasi atu ma lea, ae tatou mataitu, afai lava o la e lelei o le a le mea e toe lote ai.

E i ai le fautuaga taua lea e aumai i le Page 11 o le Lipoti lenei o lo o faapea mai ai i le taimi lea e sili atu ona tele uta na aumai i Samoa i vaa... faalele mai vaalele nai lo o uta o oloa o lo o lau mai vaa. Sau loa ma le mafuaaga, o le mafuaaga e laitiiti tele le tatou uafu, laitiiti tele, space is limited, ma e taua lava le feau lena, e leaga ua leva ona tatou talatalanoa le tatou atunuu, e tatau ona toe tilotilo i le mea lea ua laitiiti tele lava le uafu i tai i Matautu.

Tofa Hon OLO Fiti Afoa Vaai: Lau Afioaga i le Fofoga Fetalai...

FOFOGA FETALAI: Malie lau Afioaga se i tulai mai le Afioaga i le Minisita e faauilavea.

Tofa Hon OLO Fiti Afoa Vaai: Faafetai. Ae na pau lava le mea e faamanatu atu pea, e le o i ai se tulaga foi lea e mataitu ai e le Samoa Shipping Services tulaga ia i mea tau faamomoli ia e aumai luga o le uafu. O lea ua ou faalogologo atu o le a alu alu taamilo lea o le a toe oo mai lava i le uafu lea na taofi atu. E faamalulu atu i lau Afioga i le Taitai o le Itu Agai, o lea lava e talatalanoa tulaga e pei ona e taumafai mai ai lena vaitau.

FOFOGA FETALAI: Tulai mai lau Afioga i le Taitai o le Itu Agai.

Susuga Hon Tuilaepa Fatialofa Auelua Sailele Malielegaoi: O le Itulau 11 lea o lo o aumai ai... Se o le mea lea e leaga ai le osovale, lea ou te talanoa atu ai i le 11, ma o se mataupu e taua tele.

Tofa Hon OLO Fiti Afoa Vaai: Lau Afioga i le Fofoga Fetalai...

FOFOGA FETALAI: Malie lau Afioga i le Taitai o le Itu Agai se i tulai mai le Afioga i le Minisita.

Tofa Hon OLO Fiti Afoa Vaai: O lea ou te talanoa atu o luga o le uafu lea e aumai ai le faamatalaga. Se aua foi le avatua le faaaloalo i lou matua ma mea e tau tuutiai mai ai ma tuulafoai mai mai au faamatalaga. Toetiti... Ia faafetai.

Susuga Hon TUILAEPA FATIALOFA AUELUA SAILELE MALIELEGAOI: Lau Afioga i le Fofoga Fetalai o lo o manino i le Itulau 11 o lea o lo o aumai ai le maualuga o uta na faaulufale mai i Samoa na aumai i vaalele nai lo uta na aumai lalo ona o le feomia i o le space. O le faaupuga lena o lea e i i, ma o se itu e faatupu manatu ia tatou uma leaga ua le tasi le lua ona tatou talanoa i i i le uafu lea. O le a faagata ai i i lau upu. Na o le pau lava le mea o lou faataua o le Lipoti lenei lea e aumai ai mea ia. Manuia tele le fonu.

FOFOGA FETALAI: Ia tulai maia lau Afioga i le Taitaifono.

Afioga FEPULEAI FAASAVALU FAIMATA SUA: Faafetai i lau Afioga i le Fofoga Fetalai, faafetai foi i le mamalu o le usugafono aemaise foi o le mamalu o le Palemene i finagalo faaalua i le Lipoti a lenei Komiti. Faafetai foi i le Komiti le tapuai mai se i fai se tatou tali e tusa ai foi ma mataupu na laga.

Lau Afioga i le Fofoga Fetalai i saunoaga a sui usufono mamalu e tele lava o fautuaga i tulaga i mea tau sailor ma le faatulagaga o le aoga. Ua maua foi i le saunoaga a le Sui Taitai o le fautuaga lava. Ae ou te tali atu i le finagalo o le sui usufono mamalu mai Faleata.

Faafetai mo lou finagalo malamalama i le tulaga na ala ai ona mafua ona avatu se fautuaga a le Komiti. O le manatu o le tausaga po o le 2021/2022 sa silasila ai Samoa ma le atunuu ma le lalolagi atoa i le mea sa tupu mai i se tasi o vaa sa agai ai alo ma fanau a le tatou atunuu. Sa i ai le tagata na pau i lalo i le sami, e le i i ai ma se sailor na taumafai e laveai le soifua o le tagata lea, na o le alo mai Samoa na mafai ona ia faatino le galuega laveai muamua na mafua ai ona

laveaia le soifua o lea tagata. E pei o le tasi lena vaega taua lea ua maua mai e le sui usufono o Faleata, o le eseesega o le faatinoga o aoaoga.

O le taua ia o le aoga e faatino i tai i i, aua o mea ia e tau o tomai faapitoa a maualuga le aoaoga i le theory ae maualalo le silafia i le practical, e le lelei tele. Aua po o le a le lelei ma le maualuga o lou aoaoina i se Matata Eseeese, ae a le mafai ona e fatinoina le galuega lea ua aoaoina ai oe, ia o le upu moni e le atoa le 100% o lau tautua. E faapena se agaga ma se mafaufauga o le Komiti na ala ai ona manatu e toe tuu mai le aoga i i ina ia tutusa le aoaoga a tamalii foi o lo o faatinoina le galuega faa-faiaoga i le au seila po o alo ma fanau a le atunuu ua ofo o latou soifua e galulue faa-seila i le tomai ma le silafia ma le faatinoga o galuega i luga o le vaa.

Na tala le isi au uo Kapeteni i le Aso Sa na ou sau ai mai Savaii, o le taua o le mea sa i ai le aoga i tua i Faleolo, o le lata i le sami, pei la o le tulaga lea e i ai nei. Aua a alu alu ae le lelei sau fai meaaoga pe le faia lau meaaoga, pe faasala foi oe, o le faasalaga o lou aau i tai, alu e aau i tai toe aau mai. O lea e koloni alo ma fanau aua o le tele o isi seila e lelei tele ae le iloa aau. Ia pei o se faatupu manatu lena a si au uo Kapeteni lea. O le manaia lena o le tulaga lea o le tutusa o le aoaoga i totonu o le potu aoga ma le faatinoga i fafo mai ma le potu aoga. O le agaga lena, faafetai i le Afioga i le sui usufono mamalu lea ua maua mai le agaga tonu. O lea foi ua matou vaavaai atu i le Tali a le Malo ia o le latou foi lea finagalo o le a tomanatu ma toe tuu i ai se isi faamamafa tele ma ua talia foi ma le fautuaga.

O le tulaga pei ona saunoa i ai le Taitai o le Itu Agai i le tau faatulagaga o oloa i luga o le uafu, ia, o le Itulau 11 lea e te saunoa ai, e sao lelei. Ae ua ala ona aumai e le vaega lea ona o le vaega tolu o le faaauauina o auaunaga o le vaa ma le mataituina o oloa i vaa ia e faigaluega ai alo ma fanau a le atunuu. Ae leai se agaga faapea ua faatulaga mai e le SSS le laitiiti o le uafu ma le tele o oloa. Ae o se lipoti e aumai e faamatalaina mai ai le taua o nei vaa e omai, tele le oloa ae o lo o i ai alo ma fanau a le tatou atunuu.

Ia faafetai foi mo le faamanatu, faafetai foi mo le tuualalo, ua matagofie le fautuaga.

O nisi o fesili, ia e agai uma i le Afioga i le Minisita, e tulai mai lea ma aumai se tali.

Tofa LEALAILEPULE Rimoni Aiafi: Lau Afioga...

Afioga FEPULEAI FAASAVALU FAIMATA SUA: Ia, ae faafetai tele mo sui usufono mamalu uma sa afea lenei Lipoti.

FOFOGA FETALAI: Malie lau Afioga i le Taitaifono se i tuu atu le avanoa ia Faleata 3.

Tofa LEALAILEPULE Rimoni Aiafi: Faafetai lava i lau Afioga. Leai na o si... Faafetai i le Afioga i le Taitaifono, faitau pea lau Afioga i le mafuaaga lea na saunoa atu ai le Taitai o le Itu Agai, na e manino lava i ina le mafuaaga, disruptions le mafuaaga o le.... O lena e manino lava o le laitiiti o le avanoa i

luga o uafu, lena e cover uma mai ai i ina. Leai e le o se mea tatou te finau ai ae o mea na e manino lava le Lipoti ma le faaaloalo lava.

FOFOGA FETALAI: Tulai mai le Afioga i le Taitaifono.

Afioga FEPULEAI FAASAVALU FAIMATA SUA: Ia faafetai. Ia o vaega uma na lea e i lalo o le vaega lona tolu. O vaega uma na lea e i ai le siata lena mo le faalauteleina. Ia ae o le avanoa lenei, faafetai tele i sui usufono mamalu na laga finagalo mo lenei Lipoti. Ia faamanuia foi le Atua i le usugafono ma lau Afioga i le Fofoga Fetalai, faafetai mo lou avanoa.

FOFOGA FETALAI: Se i tulai mai lau Afioga i le... pei lava e te lavea i le Komiti ea lea a?

Afioga LUPEMATASILA Galumalemana Tologata Togia Tile Leia: Ia, o au o le sui usufono o le Komiti.

FOFOGA FETALAI: Ia, saunoa.

Afioga LUPEMATASILA Galumalemana Tologata Tile Leia: Na o si fesoasoani i le Afioga i le Taitaifono ona o lea sa faaalua nisi o finagalo o le Maota i le matou fautuaga foi lea e le o talia e le Malo, e le o talia foi e sui usufono ia na saunoa nei. O le tuufaatasi o le SSS ma le SSC. Ae mo le silafia e le Maota, o le mafuaaga na ala ai ona oo le matou Komiti i le fautuaga lea ona o le vaavaai foi a le Komiti i le mea o lo o i ai le auaunaga a le SSS i le taimi lenei. E le gata e i ai vaega e fetai ma mafai ona share ai resources i le va o le SSC ma le SSS, a o le tulaga o lo o i ai le Faalapotopotoga i le taimi lenei aua na o le Ofisa Sili o Pulega lava ma Pule Lagolago e toalua, e le atoa foi se toasefulu o le afaigaluega. E pei o le vaega lea sa tilotilo i ai le Komiti ia lea na ala ai ona aumai le fautuaga. Ae faafetai o lea foi ua tali malamalama le Malo, ia e leai se loto e faia o le Komiti, na o le fautuaga e tuu atu i le Malo ia ae pule lava le Malo i le sitafu o lona vaa. Faafetai.

FOFOGA FETALAI: Malo faafetai, malo mo le finagalo malamalama.

Afioga LEAANA Ronnie Posini: Lau Afioga i le Fofoga Fetalai.

FOFOGA FETALAI: Ia. E te lavea foi i le Komiti a?

Afioga LEAANA Ronnie Posini: I, o le matou Komiti, fia fesoasoani foi i le matou Taitaifono aua e talitonu lava e ese le taua o le fautuaga lea, le tulaga lea o le aoga lea a seila a tatou, lea e tau faapea e tutoatasi ma tulaga faapena. A o le aoga lea a tatou lea e i lalo o le tatou Iunivesite, pei lava ona ou taua foi i le taimi ua sola. O le aoga lea e le mafai ona... e le o faia e tatou le silapasi e aoaoina ai ia tamafanau a tatou, o lo o fai mai i fafo i le International Maritime. E mafai ona faatino e latou, a le ausia la e le tatou aoga e le mafai ona o tatou

alo ma fanau i luga o vaa tetele. O lea e faatino e le tatou aoga faa-seila i le taimi lenei. O lona uiga o lo o tulaga maualuga le tatou aoga. Ae pei e i ai foi le naunautaiga lena lea e avatu ai le matou fautuaga e tau tuu... foi lea e aveese mai le tatou Iunivesite. Aua o le tele lava... lea e tau tomanatu foi i le taimi lea na pulea ai e le aoga foi lea a Seila lea na omai ai Siamani e fai, o le tele ia o fesoasoani. Pei o le tasi lena mea na mataitu foi lele pei e vaai mai atunuu ia e fia aumai latou fesoasoani, ae a sau loa e tau mai i lalo o le igoa o le Iunivesite pei lea ua tau i ai nai faafesili e i ai. Ae a sau sao lava le fesoasoani i luga le aoga lea a le Maritime lea ua tutoatasi, e tele avanoa e maua ai le fesoasoani.

Lona lua lau Afioga o le mea lea o le amio pulea, lea foi sa matou feiloai ma le Ofisa Sili o Pulega ma tulaga faapena. E silasila ifo le Afioga i le Ofisa Sili o Pulega ma le Pulega, alo uma lava ma fanau lea o le a agai i fafo e faailoa mai foi lele, lea foi ua i ai ia mea o Fono Faavae, saili afioaga e agai mai ai ia alo...

Tofa Hon OLO Fiti Afoa Vaai: Lau Afioga i le Fofoga Fetalai...

FOFOGA FETALAI: Ia, se i tulai mai lau Afioga i le Minisita.

Tofa Hon OLO Fiti Afoa Vaai: O lea o le a toe lauga le sui usufono o le Komiti i le tulaga lea aua lea sa lauga mai ai i mea la, a o lea ua toe tali i ana lauga na fai. Ae a pe a malie lau Afioga leaga, e le o i ai se tulaga foi lea na o le Taitaifono lava e tali mai a o lea o le a uma ifo lava le Komiti ona toe tali uma mai lava ma alu ai ma le tatou taimi.

FOFOGA FETALAI: Ia, e talitonu lau Afioga i le sui usufono mamalu o se tasi foi o sui usufono o le Komiti ia lea foi ua maua lou finagalo ma le lagolagoina o le tou Lipoti. E i ai se isi mea e ese mai?

Afioga LEANA Ronnie Posini: Lau Afioga i le Fofoga Fetalai, leaga e taua ia matou nei e i totonu o le Komiti. O le matou tiute foi lea e matou te fesoasoani i le Taitaifono, ua uma foi ona fai le matou tala ae matou te le i agai mai i totonu o le Palemene, e fesoasoani mai matou. Leaga o mea ia o Lipoti nei e te le sau e te tafao ai i totonu o Komiti, e tele le matou taimi e faasoa ai ma faaali ai mea ia e taumafai e faamatala atu.

Tofa Hon OLO Fiti Afoa Vaai: Lau Afioga i le Fofoga Fetalai, se i faasoa atu lava le mea lea...

FOFOGA FETALAI: Tulai mai le Afioga i le Minisita.

Tofa Hon OLO Fiti Afoa Vaai: E moni e talatalanoa i totonu o fonotaga faa-Komiti a o faamaumauga ma le faagasologa o galuega e tali le Taitaifono. A lena e manino atu lava i le avatuina o Pepa na e na o le Taitaifono e tali. Ma e leai foi se tulaga faapea o le a agai mai sui usufono o le Komiti e tali uma mai, [.....]. Sa tatau ona matua mautu lelei tou Lipoti

ma tuualalo i o i le Taitaifono e tali uma i mea ia. A o le mea la lea a outou lea ua fai o lea ua tai faalua faatolu ona tou tulai mai e toe fai tou lauga i mataupu sa outou faia. O le ala lena e leaga ai le faaalua o le taimi, totagi tou alauni ae aumai e le atoatoa mai tou tali.

FOFOGA FETALAI: Ia ua i ai foi le manatu lau Afioga i le sui usufono mamalu leaga o lea foi e sao foi le Minisita i se isi itu...

Afioga LEAANA Ronnie Posini: Lau Afioga i le Fofoga Fetalai.

FOFOGA FETALAI: O le tou Komiti e faataga mai e le Taitaifono a outou Afioga ia ae o le tuu avanoa atu lava o se isi tulaga. O le mea lea ia malie ia le sui usufono mamalu.

Afioga LEAANA Ronnie Posini: Lau Afioga i le Fofoga Fetalai o le a le toe faia se matou tali. Ae pau lava le mea o le aveese o faamaumauga ia, e iloa ia le vaivai o le Komiti. E le taua i totonu leaga e ogaoga foi ia tala.

Lau Afioga i le Minisita tatou saunoa mamalu pea i totonu o le Maota. Ia o le a e tau faavaivaiina le Komiti nei e tele galuega sa faatino?

Afioga MASINALUPE Makesi Masinalupe: Lau Afioga i le Fofoga Fetalai...

Afioga LEAANA Ronnie Posini: Ia ae o le a le toe oo se tala i le Lipoti lea. Ma le agaga faaalalo.

FOFOGA FETALAI: Malie lava lau Afioga i le Minisita. Se i tulai mai le sui usufono mo Lefaga ma Faleaseela.

Afioga MASINALUPE Makesi Masinalupe: Ia faafetai mo le avanoa, o le sui usufono o le Komiti. O le agaga lava ia e saolele. Ou te iloa o lea ua manino le saunoaga a le Taitaifono, ae pei o le agaga lava ia o le Komiti e i ai nai mea o la e fia faamalamalama. Ia ae o le sui usufono foi lea e saunoa i le vaivai o le Komiti, toe aveese faamatalaga ia. E lelei lava pe a faailoa na o le aualii la sa... a o lea o le a aafia uma ai ma matou. Manuia le fonu.

FOFOGA FETALAI: Ua manatu foi le Nofoa o le a faatonu le Failautusi ina ia tuueseina ia saunoaga. E manatu foi i le tulaga aloaia o le tatou Komiti ia aemaise foi o le taua o latou galuega. O le mea lea ia...

Tulai mai lau Afioga i le Minisita e te sausaunoa.

Upu na faatonuina e le Fofoga Fetalai e aveese mai Saunoaga a le Minisita mo Galuega, Felauaiga ma Atinae Eeseese: “[E iloa mai ai le vaivai o tou mea sa fai.]”.

Tofa Hon OLO AFOA FITI VAAI: Ia faafetai, malo lava i le Komiti malosi. E a ua tou fiafia i lena tala ua avatu?

Lau Afioga i le Fofoga Fetalai o lea ua saunoa manino le Afioga i le Taitaifono ma sausaunoa foi lana Komiti atoa, ou te iloa ua manino uma tulaga sa laga foi e le Afioga i le Taitai ma le Sui Taitai faapea foi le sui usufono o Faleata 3 i tulaga e pei ona faataoto mai ai fautuaga a le latou Komiti ma le Tali atu foi a le Malo.

Na o nai vaega lava ia lau Afioga i le Fofoga Fetalai, ae faamalulu atu lava se i uma ou tali atu. Lau Afioga i le Fofoga Fetalai ou te faanoi atu i le agaga faaaloalo ona o le tulaga foi o le valaau paia a le Atua, e momoli atu ai le faamaisega a Tama ma Teine tuai o Avele i le valaau paia ma le tuua o le Malo e le Afioga ia Seiuli Paul Wallwork. O le upu moni e le taumasina so tatou iloa ma le finagalo o le Atua, e pule le Atua i le soifua ma le ola. Aua o lenei tamalii le Afioga ia Seiuli e le tau faamatalaina lona sao taua i totonu o le tatou Malo. E le gata la ia matou i le toatele o le aufaigaluega paia a le Atua sa aotauina e le Afioga ia Seiuli ma lana taitaiga i Avele ae faapena foi i totonu o le Maota lenei. O lea ou te iloa e toavalu lelei lava tatou, o lau Afioga i le Fofoga Fetalai ma le Sui Fofoga Fetalai ma maua ma le Afioga i le Minisita o le Soifua Maloloina ia ma le au faafitauli lava ia i le Afioga ia Seiuli, o le Afioga ia Leaana ma le Afioga ia Tologata i lena taimi. E momoli atu ai le faafetai foi i le aiga ona o le tautua a le Afioga ia Seiuli, e tau ina matou... se matou tala e momoli atu ai faamafanafanaga i le Afioga foi i le Faletua le Tina ia Su'a, ia o le nofoaalo ma Aiga na Lua. Ia manuia foi le malaga a le Afioga ia Seiuli.

Ae o le tulaga na ou fia talanoa atu ai, e moni le tulaga foi lea, o lea e aumai ai le tatou fautuaga e fia siitia le tulaga o tatou seila o lo o aoaoina iinei. O le upu moni lau Afioga i le Fofoga Fetalai i le tulaga lea e eseese... o le tele ia o laasaga o tatou alo ma fanau e aooga seila e faasolo atu i le tulaga foi lea o Ofisa mauaululuga i totonu o vaa. Ia faapea foi le tulaga o le Kapeteni. I le tulaga la i le standard o tatou i le taimi lenei, e le o mafai ona ausia e tatou le tulaga la lena o aoaoga ma le level e aoaoina ai le tulaga lea o le Class 1, 2, 3 pe oo ea i le 6 Classes o le mea ona e le o i ai ni tatou resources. E manatua le tulaga lea o le Class 1-6 e fua i aoaoga i se ituaiga vaa foi lea e feoai ai lea e fua i le latou Cross Carnage ma tulaga o le tetele o afi o vaa e mafai ona faaaogaina. Manatua foi pe a fua i o i le tatou vaa lea e alu i Savaii o si tamai afi ma lona mamafa foi e le mamafa tele. E fua i vaa a lauoloa ma vaa laupasese meli tetele e faapena la ona fua ai aoaoga ia. Manaia le fautuaga lea e aumai e talosagaina ai le tatou Faigamalo agai le PSC mo ni avanoa sikolasipi a alo ma fanau a le tatou atunuu lea o lo o aooga i totonu o le Maritime e faalautele ai lo latou silafia ma taumafai e ausia ia ituaiga level lea e manaomia e tusa ai ma le fautuaga.

O le tausaga foi lea na tea nei, oi le amataga o le tausaga nei sa matou agai atu ai i le fonu a le ILO International Maritime Organizational, o la foi ua faaulu atu ai la matou aisiga lena vaega i ni avanoa sikolasipi e train ai o tatou tagata i le Malo i Singapore ma ua talia mai e latou o lea ua fai feutagaiga i le vaega e faafetai ai lena tulaga.

E faatasi ai laia ma ni tatou fesoasoani a le tatou Malo e faauai atu i i le PSC ona ou talitonu lea o le a i ai se isi laasaga fou ma le laasaga i luma atu I le mea lea o lo o taoto ai nei le tatou aoga lenei.

A o le foi e faamauina le agai i luma i le toatele o alo ma fanau ua pasi mai i le tatou aoga lea i totonu o le NUS, ae pei e mafua ona aumai le fautuaga lea e pei ona saunoa ai nisi o sui usufono, o le tulaga foi lea ia i ai se practical e o faatasi le taimi lena, ma o lo o toatele foi nisi o alii vaa ua retire mai latou galuega o lo o i ai le experience e mafai foi ona fesoasoani i aoaoga ia i alo ma fanau i le aoga lea a tatou.

O le mea la e le mafai ona faatinoina se tutoatasi o le tatou Maritime School i le taimi lenei e tatau lava ona pipii i ai le Malo ona e pei o le tala lea na ou fai atua e le mafai e se faatutoatasi i se taimi ona tulei le fautuaga ma fai e alo ma fanau ona oo atu i levels ia i totonu o vaa, atonu e i ai se taimi ona i ai lea o lena fuafuaga.

O mea ia o amio pulea o alo ma fanau o lo o i ai lava le polokalame masani a le tatou Pulega o le Samoa Shipping Services e faatino lava latou orientation i le amataga ae le i agai atu alo ma fanau e galulue i fafo. E i ai foi lava Codes of Conduct a o mea lava ia tau Maritime e tatau foi ona ususitaia ma mulimulitai ai le sailor.

E pei foi ona malie i le sunoaga foi se tasi o sui usufono, o le aoga lenei masalo o le 90% o le latou aoaoina e fua agai international policies po o Tulafono i mea tau maritime, e faigata lava la ona i ai se curriculum e mafai ai ona lava lo latou silafia i Tulafono Faava o Malo i le gataifale po o le international maritime. E pei la o le vaega lena, ae atonu foi e alu alu foi se isi taimi ua i ai foi le mafaufauga ma ni tulaga foi i nisi o le a agai mai ua mafai foi ona latou faatino lea vaega.

Ae pei o specialize trade ia e faigata lava ona maua ia se avanoa iinei e mafai ai ona galulue ma maua le silafia o alo ma fanau ina ia compile lo latou galulue ma latou agluega agai i international laws.

Lau Afioga e pei foi ona fai atu se tala ua faamauina le tuualalo a le Afioga i le Taitai o le Itu Agai ma le Sui Taitai ma le Sui o Faleata 3, o lea foi ua faafogafoga mai le tatou Pulega. O le mitamitaga foi o le agaga ia i le Pulega o le tatou Samoa Shipping Service e sao o lea ua outou molimauna foi le taumafai a le Itupa o Tamaitai.

O lea ua i ai le tatou Kapeteni muamua o lo o galue nei i le SPA ma e pei o lea ua maua lona avanoa i luga o le Vaa Leoleo i le tofiga Kapeteni.

A o le taimi lenei ua toaono tamaitai ua agai atu i le tulaga lea o seila ae 451 alii o lo o galulue nei i le taimi lenei ma le siitaga la lea ua i ai nei e 136 alo ma fanau seila lea ua i ai, o lea la e tau faasoa nei e le tatou Pulega o le Samoa Shipping Services ni o latou avanoa e galulue ai i vaa oloa ia i isi atunuu faapea foi ma vaa meli.

E pei na pau lena o vaega sa laga i le tulaga a ua faamauina fautuaga e momoli atu ai le faafetai tele i a outou Afioga sa aumai le fautuaga lea foi ua faalogologo manino le Malo aemaise lava le Pulega i le faatinoga o latou galuega.

Faafetai tele mo le avanoa lau Afioga faamanuia foi le Atua i Afioga i sui usufono o le Maota. Soifua ma ia manuia.

FOFOGA FETALAI: Malo faafetai saunoa lau Afioga i le Minisita mo Mataupu foi sa laga i le Lipoti. Faafetai foi o lea ua faafogafoga ma le totoa le paia o le tatou Maota i tulaga faagasolo ai i le lumanai ma le agai i luma o le tatou Faalapotopotoga. Malo saunoa.

Ou te tapa lau Afioga i le Taitaifono mo le lafo.

Afioga FEPULEAI FAASAVALU FAIMATA SUA: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a lenei Komiti e pei ona iloiloina:*

P.P.2023/2024 Nu.91.

Faaluaina e le sui usufono mai Safata 1, sui usufono mo Falelatai ma Samatau, ma le sui usufono mo Faasaleleaga 5.

Na faamaonia le lafo.

FOFOGA FETALAI: Ou te tapa lau Afioga i le Minisita mo Galuega Tetele mo le lafo.

Tofa Hon OLO FITI AFOA VAAI: Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa Tali a le Malo i le Fautuaga a le Komiti o le Vaega o Atinae Eseese.*

Faaluaina e le Minisita mo Faatoaga ma Faiga Faiva, Minisita mo Faalapotopotoga a le tatou Malo ma le Minisita mo le Soifua Maloloina.

Na faamaonia le lafo.

FOFOGA FETALAI: Ua faamalo le usufono i lenei aso, faafetai foi le faatoatoa i le paia o le tatou Maota. Ua faaumiumi lava le tatou fonu i lenei masina ona o tatou galuega sa fitaituga ai tatou Komiti ae faapea foi le pitolaau a le Malo malo faafetai.

E ao lava ona momoli se faafetai a le Fofoga Fetalai i Afioga i Taitaifono ma sui usufono o a outou Komiti Faa-Palemene e tataou silafia ma iloa uma le le faigofie o le faatinoga o la outou pitolaau. Peitai o lo o matauina le lelei faagasolo o a outou iloiloga ma le tele o Lipoti ua tuuina mai i le Laulau a Fono mo le iloiloina, ua laulausasa foi lo outou faiva i le faamaninoina o a outou Lipoti i le Palemene.

E ese le manaia le vaavaai atu le galulue faatasi i le taliina o mataupu e fesiligia e le tatou Maota. O le agaga foi lea ia maua lo outou galulue faatasi ina ia manuia ai lo tatou valaauina. O le manuia foi lena o Samoa o lo o tapuai mai. Malo faafetai le galulue faafetai le onosai i a outou Afioga i Taitaifono ma sui usufono mamalu o a outou o tatou Komiti Faa-Palemene.

Lau Afioga i le Taitai o le Malo, lau Afioga i le Taitai o le Maota, lau Afioga i le Tamaitai Palemia ma le paia o le Kapeneta, e momoli atu le faafetai a le Fofoga Fetalai. E tele tuatuagia o lau Afioga ma le Kapeneta e le gata o atinae

faagasolo a o tapenaga tau faamaea o le tatou taligamalo. Peitai e le o faavaivai ai lo outou manatu mai le Palemene ma la outou pitolaau. E le o tuulafoia foi i la outou silasila lea vaega o la outou matafaioi tauave ia manino le Palemene ma le atunuu i galuega faatino a le Malo o lo o lipoti mai i le Maota nei. Ua faamalo faafetai le tautua Malo. O lo outou lea valaauina. A o le tatalo ia tumau le faauuga a le Atua i lo outou tulai mai. Ia saga faaauepegaina ma saga faataleniina a outou tofa ma le uta a le Atua ina ia manuia le faatautaiga o le sa o le atunuu. Ia faamanuia le Atua i le alofaiva o lau Afioga ma le paia o le kapeneta i galuega faaauau o feagai ai mo le atinae manuia o Samoa.

E i ai itu taua sa matauina e le Fofoga Fetalai i a tatou iloiloga, ou te talitonu foi e aoga tele mo le lumanai. E tele timaiga ma fautuaga lelei ua saunoa i ai le paia o le Palemene. O se fesoasoani tele foi lea i taualumaga o iloiloga a Komiti i le lumanai aemaise o le faatonufolau a le tatou Malo.

O le mataupu muamua o le tulaga i le sainiga o tatou Lipoti e sui usufono o Komiti, e taua tele finagalo faaalua ma tuualalo i lea tulaga ona o faamaumauga ina ia manino mo le lumanai. Ua manino le tatou Tulafono Tumau i isi mafuaaga e ala ai ona le saina se sui usufono i se Lipoti, ua taoto foi laasaga mo le faatinoina o lea vaega. O lo o manino foi le isi itu taua o le vaega lea i le tulaga o le lagolagoina e se vaega toatele o le Komiti o la latou Lipoti, peitai o le itu taua i lau matau, o lo o manino le tatou Tulafono Tumau 166(3) o le a tatau ona saina le Lipoti a se Komiti Faa-Palemene e sui uma o lea Komiti.

O itu taua ia i le vaai a le Fofoga Fetalai e ao ona faataua mo le lumanai, o se tulaga foi e ao ona silasila i ai Afioga i Taitaifono ma le Komiti o le vaa o le Komiti e faufaatasi. E le aoaga ona faanatinati se Lipoti tuuina mai i le Laulau a Fono ae o lo o tuatuagia isi sui usufono o le Komiti.

I le vaai lava ia a le Fofoga Fetalai e le o se tulaga lelei le tuuina mai o se Lipoti i le Palemene ae toafa pe toatolu sui usufono e le o saina. E ui o lo o fulisia le Komiti i le sainiga o se Lipoti ae a manatu i le taualoa o le galuega o le ala lea o se tuualalo a le Fofoga Fetalai. O le naunautaga ia faataua faamaumauga mo le lumanai ae taoto atu i aai o finagalo. Ua ou matauina foi le tele o saunoaga e le agai sao i le Lipoti o lo o iloiloa ae ua faaofiofi mai ai ma isi mataupu e ese mai ai. E foliga ua fau saunoaga a le toatele o sui usufono mamalu e pei o ni saunoaga faalauaitete i taimi e talanoaina ai se tala o le tupe ae ua tuu le anoliu i mataupu o lo o agai i ai le iloiloga.

O lo o manino lava le faatonufolau a tatou Tulafono Tumau i laasaga o galuega a le Maota, o le mafuaaga foi lea o le toso o le tatou iloiloga. O le popolega ia te au ona o le le manino o le tali mai a Taitaifono ma le Malo i ni mataupu e fesiligai ai, ae le o i ai i ni tatou lipoti ina ne i matau mai foi le atunuu e faapea e le o tapena le Taitaifono ma le Malo.

O le mafuaaga foi lea o le taumafai atu o le Fofoga Fetalai ae i ai lava nisi o lo o tuuaia le taitaiga a le Fofoga Fetalai. O le taua o le mataupu lea ia manino ma malamalama mataupu e laga i saunoaga a o silasila faafofoga mai le atunuu. E tasi lea faatinoga o matafaioi mataitu a le Palemene ae tatau lava ona tatou mulumulitaia aiaiga o tatou Tulafono Tumau. E aoga tele se faamanatu a le Fofoga Fetalai e saga matimati ai lea vaega o le tatou galuega, ui i lea o le aotelega o le tatou galuega e momoli atu le faamalo ma le faafetai. E i ai foi le

talitonuga ua faamalieina le faafofoga a le atunuu i le tele o mataupu taua sa lauliliuina e le tatou Maota.

Ou te asuasua atu foi malu i puega i finagalo o le paia o le Palemene. E i ai lava le upu a le atunuu e le atoa atu i le liu o le vaa, ia alofagia ma faamagalo se faaletonu o le Fofoga Fetalai i le faatautaiga o tatou Taulumaga. O lo outou finagalo faale-Atua e tua atu i ai le tausiga o le Nofoa. O ai foi se finagalo ua afaina ia alofaga ma faamagalo se faaletonu. A o le tatalo faaauau ia sagai ane ai o le tai ia taoto pea le fogaa i le alititai o le moana uli o la outou tofa ma le uta lena e maua ai manuia mo le tapuaiga a Samoa.

Samoa ma lau faafofoga tapuai mai, ua iu le galuega a lau Palemene i leni masina. Faamalo tapuai faafetai tatalo ua ae manuia ai le faiva o le Palemene. Ia tumau pea le alofa ma le filemu o le Atua i le paia o le atunuu.

Le tapuaiga a Ofisa Sili o Pulega o Matagaluega ma Faalapotopotoga Tumaoti a le tatou Malo e momoli atu le faafetai, e fai ai le leo ma sui o le Palemene o lo ouotu valaauina e tua atu i ai le Malo ma le fonousu a le atunuu tulou le Gagana. Faamalo le usufono faafetai le onosai. E talitonu e tele galuega o feagai ma outou ae lagona lava le fiafia i le vaavaai atu i lo outou taupati mai e lagolago taulumaga faaauau a le Palemene.

E faamanuia atu lau Palemene i lo outou valaauina, e le faagaloina foi ia auaunaga uma o lo o tautua pea e le gata mo le lelei faatino o taulumaga a le Palemene, a o le puipuiga o le saogalemu o le tatou Maota.

E momoli atu ai le faafetai tele i le auaunaga faifaipea a Malu o le Malo, auaunaga a le 2AP, auaunaga tau Tinei Mu ma Faalavelave Tutupu Faafuasei ma le Kamupani a le Cooline, faafetai tele mo a outou auaunaga ma ia saga faamanuia le Atua i tofi ma tiute o lo o feagai ai.

E fia momoli foi le faafetai i le Failautusi o le Fono Aoaofa Faitulafono ma le aufaigaluega mo le auaunaga lagolago o lo o tautua ai le Palemene i le ao ma le po. Faamalo le galulue faafetai le tautua Palemene. Ia agalelei le Atua ma foi pea lo outou malosia aua le valaauina.

Pe a tatou tatala i leni aso ia alofagia e le Atua ma puipui lo outou soifua i ala uma i lo outou afio atu, manuteleina ia faiva ma tiute o faatali mai i toega o leni aso.

Ae tatou te le i tolopo, ou talosaga atu i le Afioga i le sui usufono mai le Itumalo Palota 3 se i saunia se tatou tatalo se i faaiu ai le tatou fonu.

Malie lau Afioga Lagaia se i tuu atu le avanoa lea i le Afioga i le Tamaitai Palemia.

Afioga Hon FIAME NAOMI MATAAFA: Ioe ou te lagona ua vela foi le fala i lau Afioga ma le mamalu o le Maota i sui usufono. Ae faafetai mo le avanoa ae ou te manatu e ao foi ona faaoo atu se leo o le vasega o sui usufono e faafetaia ai lau Afioga i le faatautaiga o le tatou Fonu. Atonu e tulaga ese le lua vaiaso ua mavae, lea ua faagasolo ai se galuega tele i le tatou faagasolo lea o galuega a Komiti ma Lipoti ua tuuina mai ma Tali a le malo.

Saunua lau Afioga i nisi foi o tulaga ua mataituina e le Nofoa i le faagasologa o le tatou galuega. E faapena foi se vaaiga a le tatou Malo po o le vasega foi o le Kapeneta i le aotelega o le momoli mai o tatou Lipoti.

O le mea muamua lau Afioga i le Fofoga Fetalai, o lo o tuai pea le faagasologa o Lipoti. Ia, o le tele o lipoti ia ua tatou faagasolo i ai. Ia, o le 2019, 2020. O le faamoemoe i le galulue faatasi o le Kapeneta ma lau Afioga ma le Fono e... tatou te taumafai e momoli mai le tino o le galuega lea o le lipoti mai o Matagaluega i le Fono i se tulaga e mafai ona tatou talanoaina ai mataupu ua le mamao tele atu. O lona uiga, ia, masalo e tele le galuega. A silasila i le Pepa o galuega o lo o tele pea le faagasologa o tatou Lipoti o lea e le i oo mai mo le iloiloaina e le Palemene. O le mea muamua lena ma ou te manatu e le o se galuega faigofie.

Lona lua lau Afioga i Lipoti ia ua tatou faagasolo i ai o lea ua amata na pue atu i se tulaga aoatetele se vaaiga i Komiti i auala e lipoti mai ai Matagaluega i le faapea e tatau ona i ai se faavaa po o se template e faafaigofie ai le tapue e le Komiti le faagasologa o galuega aemaise o lona faatinoga. Aua o le mea moni lava lau Afioga i le Fofoga Fetalai, o Lipoti Faaletausaga o i ina o lo o faamatala mai ai le faatinoga e le aufaigaluega ma Matagaluega i le faauluulu i ai o Minisita o le Kapeneta o galuega a le Malo. Ma ou te manatu e taua foi lea mau o lo o momoli mai e tatou Komiti i auala e faafaigofie ona faagasolo ai a tatou galuega.

Ou te manatu e tele nisi o lesona taua ua tatou maua ma ou te faafetai ai lau Afioga ma le Taitai o le Itu Agai i se tatou faasofoa foi i le faagasologa o le tatou galuega lea na faatino i le lua vaiaso ua mavae atu. A o lea tatou te iloa foi le umi naua o le galuega po o le a se isi laasaga e mafai ona faagasolo ai i se tulaga vave le tele o le tino o le galuega lea o lo o aliali mai pea i le tatou Pepa o Galuega. Ia, tau ona matou faapea atu, e vaavaai atu foi i le kalena o fonotaga a le Palemene. Ia, atonu o lea o lo o i ai le avanoa mo ni a tatou fonofaapitoa e mafai ona faagasolo ai lea foi vaega o le galuega Faa-Palemene e ese mai ai i Tulafono e tapena mai e le Malo. A o Lipoti o le isi vaega tele lea o le galuega a le tatou Palemene.

Ia, lau Afioga faafetai tele. Malo foi i lou finagalo onosai i ni amioga foi a le Maota ma sui usufono o le Palemene. Ia, o le mea sili lava o lo o faapena pea ona faamafanafana le finagalo o le Alii i le tofa i lau Afioga. Faafetai atu i lena itu o le Maota e tusa ai foi ma le tatou galuega. E faataua foi e le faigamalo le sasaa mai o le tofa ma le fautua. Ia, o le tatou galuega lea na filifili mai ai tatou e le atunuu.

Ia, o si a matou upu lea e tau ona matou piiama atu ai i le saunoaga e taualuga i ai lena foi faagasologa o fonotaga a le Maota i le lua vaiaso ua mavae atu. Ma le faafetai i le vasega o sui o Matagaluega aemaise foi le Failautusi ma le tatou Ofisa o le Fono, ma i latou uma o lo o lagolagoaina le galuega a le Palemene. Ia manuia ma soifua.

FOFOGA FETALAI: Malo faafetai. Ia, se i tulai mai lau Afioga i le Taitai o le Itu Agai.

Susuga Hon TUILAEPA FATIALOFA AUELUA SAILELE MALIELEGAOI: Lau Afioga i le Fofoga Fetalai, ou te tulai atu ma le agaga faaaloalo e momoli atu foi le faamalo i lau faatautaiga o le tatou fonotaga.

Faamalo foi i le Afioga i le Palemia i le auala ua faatino ai le taumafaiga mo tatou Lipoti. E taua lava uiga ia o le tatou felogonai pea. Aua e taua ia matou, e taua foi i le Afioga i le Palemia aemaise lou faatuatua mai... faatuatua mai foi i le fesoasoani atu a le tatou Maota e faaoga ai se auala e faagasolo ai le tatou fonotaga. Manaia le auala faataitai lea na tatou amata. Ia, ae le uma ai le fai aso i le agai atu i le lumanai o le tulaga lava ia sa tatou matauina i aso ua tuanai pei e uma atu loa fonotaga leai se avanoa mo Lipoti. Ae o lo o tele a nai o tatou fonotaga foi mo le agai atu i le faaiuga o lenei tausaga. Ia, e malie tele le faiga faavae lea, o le a lava le avanoa e faagasolo ai tatou fonotaga. Po o le a lava po o le Tala o le Tupe o fono ua uma ona faataatia, ia faalaolao pea se aso e tasi po o ni aso e lua, e alu alu lava ma maea ai le tatou tagofia o Lipoti e aoga lea mo tatou uma lava. Ia ae a le faafogafoga mai foi a Samoa i faafitauli o faafeagai ma le tatou Maota Fono lenei ma le taumafaiga o lo o tatou taumafai uma i ai ina ia foia.

O le matou tali atu lea ma le faaaloalo.

FOFOGA FETALAI: Malo saunoa i lau Afioga i le Taitai o le Itu Agai. Ia, ua malele foi le Afioga i le Tamaitai Palemia po o le Taitai foi o le Maota aua foi le faaiuina foi o le tatou fono i lenei aso aemaise foi o lenei lua vaiaso. Ia, e talitonu foi le Nofoa, ia e pei lava ona saunoa o le tatou galuega faifaatasi ia ma si fuafuaga taua. Ia, o se alafua e talafeagai lea aua le agai i luma o tatou Lipoti ma le talanoaina. O le mea lea e le itiiti foi le agaga e faafetai atu i le fesoasoani mai aua foi le faagasologa o le tatou galuega. E tele le tatou galuega i lenei lua vaiaso, e 35 tatou Lipoti ma o Lipoti uma foi ia lea ua uma ona faaoo mai Tali a le Malo. Ia, o lea ua tuumamaina ma ua leai se tatou Lipoti. A o i ai se Tali a le Malo i le taimi lenei O lea ua maea uma lava i le aso fono lenei.

Ae faafetai foi i le mau fautuaga ma saunoaga ia o le a faapena ona fai. O le a faagasolo pea i luma ma agai i luma aua lava tatou Lipoti e maua mai, ia e faapena ona toe faatulaga ai tatou aso fono mo le agai i luma. Ae mo lenei taimi, faafetai tele lava mo mea uma. O lea ua mama le tatou Laulau i Lipoti ua taunuu mai Tali a le tatou Malo aua le faatinoina. Ae faafetai tele mo le fesoasoani mai aemaise o le faatonufulauina o tatou taualumaga ia lea ua maea le tatou galuega. Viia le Atua. O le a se galuega ua tatou mafaia ia viia le Atua i mea uma. Ae faafetai mo timaiga ma saunoaga e faalototele ai foi le agai i luma o le tatou Palemene. Ia, aua lava tatou galuega mo le agai i le lumanai. Ia faamanuia e le Atua.

Lau Afioga i le sui usufono mamalu mai Palauli 3, ia saunia mai se tatou tatalo e faaiu ai le tatou fonotaga.

Na tolopo Tausalumaga a le Fono Aoao Faitulafono i le itula 4:06 i le afiafi seia aulia le Aso Lua, 28 o Me 2024 i le itula e 9:30 i le taeao.